

TWÊTÙ KATWÈNA

DÌNGUMBA BWÀ CINYÌ?



Ndyèsè dya kwikala mwalukile cyakabidi apa mu cyambilu emu, paanyima paa, ngeela meeji, ngondo mitwe ku yisatu yîmvwà nciyipu to. Nshindi mmipete lutatu, ne mêmè paanyi. Kaa, nansha nanku, ndi mupeteku diikisha, mpindyewu, nenku udi utâmba kudyumvwa anu bu udi muswe kubwela cyakabidi mu mudimu. Nenku tudi bindile mpindyewu bwa kubanga lumingu ludi lûlondà elu, diloolo dya mu diisâtù dilwalwà edi, bwa di—ditabuluja mwab'ewu mene mu tabernacle emu. Nenku Nzambi Yèyè mwanyishe, ndi bu... Mukalenge mmundaye mushindu mushiilangane ne mupyamupya wa mudimu wa bwambi. Nenku Yèyè musanke bwa kucyenza, ndi ne ditekemena dya kubanga mushindu mupyamupya wa mudimu awu—awu mu lumingu lûlwalwà elu, muneemu mu tabernacle, bwa musangu wa kumpala.

² Ne pashiishe, ncyèna ne masangisha madyanjila kuteeka mu ndongamu to, pa kuumusha anu Australie ne Nouvelle Zélande, bwa ngondo wa kumpala ulwalwa ewu. Ne pashiishe Mwaneetu Osborn udi ubiikila bwa kwenza disangisha dya twêtù bônso pamwe dîmvwà mumulaye mu mushindu kampanda mwaba ewu kukaadi ntanta, mu Tulsa, kadi paanyima ndambu, kadi katwena banji kwikala batwishiibwe bwa ciine aci to.

³ Bivwa bîmpè bushuwa, Mwaneetu Jeffreys, mûngààpeci mpùngà wa kukulabula ku cyanza lwà paanyima apa, kabidi ne wa kuumvwa mwaneebe wa balume wimba musambu awu, ne wèwè mwikale wimba cisanji. Ntu munange bya nanku awu mu mushindu kampanda, taatù ne mwanende. Kanwenaku peenu banange aci anyi? “Kolesha mwânà mu njila udiye ne cya kwendela.” Ncya bushuwa, Mukalenge Guenther, udi—udi mumanye ne aci ncyà bushuwa, nwènù bônso babidi. “Kolesha mwânà mu njila udiye ne cya kwendela, nenku paakolaye kacyakuumumuka to.” Bwa aci ncyà bushuwa. Bidi mwa kwenzeka misangu mikwabo ne yèyè umukeku, kadi cyôci kacyakuumumuka to. Nwamonu anyi? Neci—necishaale anu nende misangu yônso. Dilongesha dya ntwadijilu adi ne cyônso cyakamukoleshilabo bwa kwenzaye aci, neci—necishaale nende anu cya bushuwa. Mpindyewu, eci cidi . . .

⁴ Ndi mutuutakeene ne Mwaneetu Jeffreys pambelu pààpa, ki mêmè kwamba ne: “Mwaneetu Jeffreys . . .” Mvwa ndyambidila, nudi bamanye's, ntu misangu yônso anu ne disanka dya kumona yônso wa ku bânà beetu baa balume bàdi balwa

kutumwenekelaku mwaba ewu aba, kadi diloolo bu nunku bwa mwaneeta mwenyi kulwaye! Edi diloolo didi anu bwa batu balwa ku tabernacle, anu kumpala kwa ditabuluja edi. Edi ndiloolo. . . Tudi baswe kwangata diloolo edi, ne maalaba mu dinda, ne maalaba diloolo, anu pa bitudi twitabuuja mu tabernacle emu, bwa—bwa kubyambulula cyakabidi. Tudi ne ndambu wa bintu bya bwalu bukole be bitudi twitabuuja, bikole be bwa kubyumvwa, kadi mu mushindu kampanda anyi kansanga tudi tubisanga mu Bible ewu. Bidi bimweka biikàlemù bushuwa.

⁵ Nunku mpindyewu, kwôkò kufwanyine kwikala mwaneetu wa balume anyi wa bakaji mwenyi muntu emu, mwikale mwena dingumba kampanda, anyi—anyi mwikale ubibenga, mwikale anu kacya wàsomba bwa kuteeleja byôbi ebi bwa diloolo edi, tudi baswe bwa umanye ne tudi tukwakidila anu ne mwetu mwônsò. Wamonu's, tudi tukwakidila anu ne mwetu mwônsò. Kadi mpindyewu ndi ntekemena ne. . . Peetu's tudi tuvwiya bwalu ebu bwikale bûme cyoncyoncyo. Nunku padibi bimweka ne kwêna ubiitabuuja to, ee, mpindyewu, enza anu bu mûntù mêmè ngenza pândi ndya minyiinyi mikalanga ne tumpùlùmànjà. Nunku pândi ndya dyâmpà dyela tumpùlùmànjà, bu mudibi ne ki cîntù munange ngamba kufwa aci, misangu yônsò, pândi. . . Pândi ndya dyâmpà dyela tumpùlùmànjà, padi mênù akatwa pa kaalutete, ncyêna ngiimansha minyinyi mikalanga ayi to. Ndi—ndi ngiimansha anu kaalutete aku kadi kutungunuka anu ne kudya minyiinyi. Pa nanku, anyi bu mudi kudya kwa nzoolo. Mpindyewu, nwênù bônso nutu banange nzoolo, nwamonu's. Nunku paudi ukatwa mênù pa mufuba, kwêna ulekela didya to, udi anu uya wenda ukunya ku nyungulukilu wa mufuba aku utungunuka ne kudya munyiinyi wa nzoolo awu. Ee, mushindu awu ki uwenza diloolo edi, bwa bîngâmbà mwaba ewu, udi anu. . . padi mênù ebe akatwa pa cintu kampanda, amba ne: "Mpindyewu, ncyêna—ncyêna anu. . . ndi musômbè paanyi anu nteeleja, bu Malongesha a kaeeleeziya kakese, mu masangisha asatu adi alonda aa. Bôbò nyewu badi anu bambulula cyanaana mu mushindu kampanda bidibo—bidibo biitabuuja, biikale babikenketulula."

⁶ Nunku mushindu umwepele wa wêwè kufikisha muntu pabwîpi ne kuCiitabuuja, ngwa kupoopela musonso bikole too ne mundekeelu mu mushindu wa yêyè umanya ne Cyôci aci ki cintu cidid cya bushuwa. Mushindu awu ki umwepele wûdi mwa kucifikisha ku dikwata anu ndendende. Anu bu mulunda wanyi, Mukalenge Wood ûntù nende ewu; wêwè mupoopele musonso citupa, dibaya dishaale dyônsò didilekelele, lupeepele neludiponeshe panshi mu mutanci mukese. Kadi bidi bikengela uwubweje bikole, kuwukwacisha bikole. Pa nanku mpindyewu mêmè anu muvwije cintu eci kaciyi bukalanga menemene mu yimwe ya ku myaba eyi, ne bwenu nwênù beenyi badi basômbè

diloolo edi aba, ncyêna—ncyêna nkeba bwa kunusaka ku luseke to. Ndi nditacisha anu bwa kupoopela musonso bwa ekeleeziya ewu pa bitudi twètù twitabuuja. Bònsò badi bumvwe aci bîmpè menemene mpindyewu, ambaayi ne: “Amen.” [Disangisha didi dyamba ne: “Amen.”—Muf.] Eyo. Abi—abi kaayi mbîmpè. Nenku mpindyewu ndi nguumusha abu bujitu pa byanza byanyi. Ne pashiishe—pashiishe. . . Badi munkaci mwa kubikwata pa mikaba ya mêyi, ne bikwabo, bwa pashiishe, piikalabo mwa kukeba kujandula pashiishe bitudi twimanyina cya bushuwa, ne myaba yitudi biimanyine, mikaba ya mêyi eyi ke yikala mwa kubyamba. Ne pashiishe tutu twenza cyôci ku musangu ne ku musangu, bwalu kutu bantu bapyabapya batu babwela nenku—nenku tudi tutungunuka batangile kumpala. Nenku mpindyewu katwakukookesha kwakula pa Malongesha ônsò a ekeleeziya to, kadi anu amwe a kudiwu ngatùdi tujinga bwa—bwa kwakulapu. Nenku mpindyewu, mu diisâtù diloolo, nansha nanku, kudi kubanga. . .

⁷ Mpindyewu, mu dimwe ne mu diibîdi, ndi nguumuka, bwa kuya kasambila, kudilongolola bwa disangisha dya dyondopa. Nenku nudi mwa kwangata telephone yenu, anyi mwaba wònsò uwajinga awu, kulwa ne muntu yònsò uwaswa kulwa nende awu, bwa ditabuluja dilwalwà edi. Nenku mpindyewu nùbãmbilè bwa kabàlu mu disumpakana to, kabayi balwa, bamba ne: “Ee, mpindyewu nêmbwelè lubilu bwa kunsambidilabo, diloolo edi. Nenku maalaba diloolo, byònsò bidi. . .” Kanwenji nanku to. Udi ubwela wanji kuteeleja ndambu, bwalu tudi baswe kwangata dîbà bwa kwadija Dîyi adi diikàle ditòokesha menemene mu mushindu wa dyabulu kayi upetaku kaaba nansha kakese kaa kunyungaye to. Ne dîbà adi paudi ulekela diitabuuja dyebe diya too ne kundekeelu kwadi, mu mushindu wa wêwè ubanga kwitabuuja, pashiishe ulekela kandondo keebe kaa mwoyi kabanga kwenza maalu, ki piikalà diitabuuja dya Nzambi mwa kukàtwa nyama ku mikolo. Dîbà adi neupatuke uye. Nwamonu anyi?

Bwalu, diitabuuja dyebe wêwè kadyakwenza byàbûngi menemene to. Bidi bikengela bwa kandondo keebe kaa mwoyi katentemuke kaye kenda kalonda njila umwèumwè udi diitabuuja dyebe diya awu, nenku diitabuuja dya Nzambi didi dilonda paanyima bwa kushindika byònsò abi. Nwamonu anyi? Kadi, cyôci ciikàle diitabuuja dyebe wêwè ne: “Kaa, eyo, ndi naadi mpindyewu mene!” Nenku nansha kandondo keebe kaa mwoyi kiine, kakokangana kaalukila cyanyima mwaba ewu, kamba ne: “Ndi ndikonka ní byakumbana bwanyi mêmè’s?” Kabyakukumbana anu mwaba awu to. Wamonu anyi? Pa nanku tudi baswe eci ciikalè disangisha dya bushuwa dya dyondopa. Ne kumpala kwa mêmè kubweja nî nganyi nî nganyi mu bibambalu emu, ne bikwabo, bwa dyondopa, anyi bwa mudimu mupyamupya ewu, ndi muswe bwa bôbô kuumvwa menemene

cidibo babwelelamu. Nenku wavuluka anu ne, ulwe kutusamba, ne twètù netwikale ne disanka bwa kukwakidila.

⁸ Mpindyewu nwavulukaayi ne, mpindyewu, mu dinda, netutungunuke ne Dilongesha dya ekeleeziya. Ne diloolo dya maalaba bya mwomumwe. Mpindyewu tudi tunujingila difika dilenga bwa difika dyenu, ne muntu kana yònsò udi anu mwa kulwa. Tutu misangu yònsò ne disanka dya kumona muntu kana yònsò. Kadi eci mpindyewu, diloolo edi, nciludikila anu bantu badi baa tabernacle ewu, baa—baa bwena badi bakoleshila mu Dilongesha edi. Bwalu, pântù mpatuka mu budimi bwa bwambi, mu budimi bwa butangadiki, tutu twangata anu Malongesha a Mifundu a butangadiki, a nshindameenu menemene. Kadi mwaba ewu ku tabernacle eku, tudi ne meeji etu twètù ne bintu byetu twètù bitudi twitabuuja, twètù bu—bu—bu ekeleeziya, nenku pa byôbi abi ki patwikala ne cya kwakula, diloolo edi.

⁹ Nenku kumpala kwa twètù kubuulula Dìyì Dyende dibenesha, katwenaku mwa kwinyika anu mitu yetu cyanaana bwa katanci kakese kaa disambila anyi?

¹⁰ Nzambi wa Bukole bwònsò ne wa ngulu yònsò, Wèwè, kumpala mene kwa dyulu ne buloba kubangabi kunyungulukangana pa kapwishipwishi kaa kumpala, Wèwè uyuwa Nzambi. Kutu mwanji kushintulukaku nansha kakese to. Ne piikalàku kakuciyi kabidi tupwishipwishi bwa kubikwata, ne piikalàku kakuciyi kabidi dyulu ne buloba bya kukwata, Wèwè newikale anu Nzambi. Wèwè udiku bwa kashidi, ne kacya ku kashidi. Wèwè ngudi Nzambi. Kutu mwanji kwikalaku ne ntwadijilu wa matuku, anyi ne ndekeelu wa mwoyi nansha. Newikale anuku misangu yònsò. Nenku, Taatù, Wèwè bu mùdi kuyi ne mikalu to, ne twètù biikàle ne mikalu, nenku tudi tulomba luse Lwebe lwa Bunzambi, Nzambi, bu mutudi bamanye ne nyuma wetu twètù ewu neikale ne cya kubwelakana mu Cyendelele, upatuka mu bintu bidi byenza bya cikondo ebi, ubwela mu Cyendelele. Ki bwa cinyi, Mukalenge, tudi mwaba ewu bwa kukenketa lupandu lwetu, bwa kumona ne tudi biimane mushindu kaayi kumpala kwa Dìyì Dyebe, ne kumona mutudi tusanganyiiwba mu malabula etu. Tudi ne nsòmbelu udi uKusankisha Wèwè anyi? Nyuma wetu udi ufila bujaadiki bwa Nyuma Webe anyi? Ne dilongesha dyetu didi difila bujaadiki bwa Bible ewu anyi? Nenku, Taatù, swaku bwa tukenketeku byònsò bibidi, ne ntema yònsò, munda mwa masangisha asatu adi alonda aa. Enzaku nanku, Mukalenge.

¹¹ Beneshaku mpaasata ewu, balami, balubuludi, ne beena kwitabuuja bònsò, bantu bàdì balwa mu ekeleeziya ewu aba. Kacya anu matuku ànkaadi mwenze mwaba ewu aa, Mukalenge, kudi bààbùngì, bààbùngì be bàndi nciyi nansha mumanye mènà abo to, anyi kudibo bafumina, kadi ndi mutwishiiwba ne Wèwè udi mumanye byònsò bidi bibatangila. Nenku tudi mwaba ewu mmu kiipacila kamwepele aku, diloolo edi, Mukalenge, kaa

kwikala mu bwobumwe banyungulukile Dîyi difunda. Nenku utupeesheku Nyuma Mwîmpè mu nsòmbelu yetu, bwa twamona mwa kusòmba ne ditalala, ne dicincika dya maalu, ne mu diciina dya Nzambi, ne kukenketa nsòmbelu yetu ku Dîyi Dyebe. Enzaku nanku, Mukalenge.

¹² Nenku mu citanda eci, diloolo edi, Mukalenge, mudi bânà beetu baa bitupa bishiileshiilangane bya—bya ekeleeziya. Nenku, Mukalenge, ndi ne kusakidila kwâbûngi bwa mudibo balwe mwaba ewu bwa kwikala mu bwobumwe. Pâmwâpa tudi bafwanyine kubenga kupetangana pa tuumêyi tukese twa Malongesha. Kadi mu dîyi dikulu dimwepele dinene dya kumutu kwa ônsò adi, tudi biimane bu bânà baa muntu badisange ku mwalu wa mvita. Aci, Éyi Nzambi, swaku bwa cikoleshe bwo—bwobumwe munkaci mwetu, ne yetu...ne myonji ya ngâsà ne dinanga dya Nzambi biikalà pa twêtù ne bubanji bwabi. Mpindyewu, mutùdì tufika ku dyumvwa, Mukalenge, ne ewu mudimu mmupite bukole bwa muntu kwenzaye, bwalu mwaba ewu tudi tutangila, diloolo edi, mwaba udi misuuka yidi yiya ku Cyendeleele ne cya kwikala. Pa nanku tudi tulomba bwa Nyuma Mwîmpè abwele anu mu Dîyi, ne àDyâdijè ne àDyûmvwîjè mu mushindu Wende Yêye mwine, utuwmvwiya twêtù, bintu bidiYe muswe bwa twêtù kumanya. Enzaku nanku, Mukalenge. Ne piikalà misangu yisatu...yisatu ya masangisha ayi piikalayi mijike, swaku bwa twêtù kuumuka kuya bu ekeleeziya mukoleshiibwe, mudisange pamwe, bwa kuteeka myoyi yetu ne twipacila twetu twònsò pamwe, ne beena mwabo neetu baa Bukalenge bwa Nzambi, bwa twêtù kuya kumpala bipite bya kwònsò eku.

¹³ Ndi muswe kuKusakidila, Mukalenge, mu bwikadi bwa ekeleeziya ne—ne bwa bantu badi kaaba aka aba, bwa mùdi Wêwè mumpeesheku mbingu mulongolongo ya diikisha dilenga. Ndi ndyumvwa bilenga bya dikema diloolo edi bwa Bwikadi Tusebe ne dibenesha Dyebe. Éyi Nzambi wa yàâyà, nyewu busambila bwa mwaneetu wa balume ewu, mwaneetu udi uya dyamwamwa dya mbû ewu, ukabwela mu matunga adi kâyi bukênkè, a mîdimà ne manyaanu awu, mwikalà mwoyi wende mwine mwa kushaala bu cya diludikila mikete. Éyi Mukalenge, beneshaku Mwaneetu Jeffreys payaayaye apu, ne mwanende wa balume, ne mukajende, umupe ditanta dinene. Swaku bwa yêye kutubula masoso mu mîdimà amu mu mushindu wa ne Bukênkè bwa Evanjeeliyo bûteema too ne kule ne bûtangalaka. Utûmvwèku, Taatù, bwalu tudi tulomba dilomba edi mu Dîna dya Mukalenge Yesu Kilisto, Mwan'Èbe. Amen.

¹⁴ Mpindyewu, diloolo edi, ndi mbala mu Bible wanyi mukese wa Scofield. Ndi mfuma ku dipicisha bidimu makumi abidi ne bitaanu, matuku abidi aa. Ne ncidi anu mwa kumubala, kadi udi wenda ushaala mubwicidile bikole be. Pa nanku ndi musùmbe

binete bya kubala naabi bwa pândi ndonga, nenku nêmmone mudibi byenza diloolo edi, bwa musangu wanyi wa kumpala.

Mpindyewu ndi ne byena-bwalu, bu mudi ebi, ne: “Ekeleeziya udi ne cya . . .” Kaa, bintu byâbûngi, bu twêtù mwa kufika ku byôbì. Cimwe cya ku byôbì: “Tudi tubikidiibwa Ekeleeziya bwa cinyi? Twêtù katwena dingumba bwa cinyi? Twêtù tudi twitabuuja mu dikubiibwa dya Cyendelele dya musuuka wa mwena kwitabuuja bwa cinyi—bwa cinyi? Tudi tupiisha bayiishi bakaji bwa cinyi? Tudi tubatiiza mu kwinyijangana kwa mu mâyi bwa cinyi? Ne Ekeleeziya neapicile mu Dikenga dinene anyi?” Ne byena-bwalu abi byâbûngi mwaba ewu, ngeela meeji ne ndi naabi dikumi ne bitaanu anyi dikumi ne mwandamukulu, bwa diloolo ne diloolo dya ndambu wa matuku adi alonda aa.

¹⁵ Pa nanku ndi ngeela meeji, diloolo edi, cya kubanga naaci, cya kutwadija naaci, mbimweneke bu ne Mukalenge udi uteeka pa mwoyi wanyi anu cyena-bwalu eci cya ne, ka- . . . *Twêtù Katwèna Dingumba Bwà Cinyi?* Kabingila kâdi kènza ne . . . Mpindyewu, katwena cilumbu ne bantu bakwabo badi biikâle dingumba abu to. Katwena naabo cilumbu nansha cimwe to, kadi ndi njinga kuumvwija bwa cinyi kacyakacya twêtù katùtu banji kuswikakanaku ne dingumba nî ndya bishi nî ndya bishi. Mémè ewu batu banjidile mu kaekeleeziya kakese kaa ba-Baptistes, bu munutu bamanye. Ne ba-Baptistes biine kabeena dingumba to, kabavwa dingumba to, anu matuku abidi mashaale aa, nenku mpindyewu bakaadi benda bashaala bikole dingumba anu mudi makwabo ônsò awu. Kadi, kabingila kâdi kènza ne kacyakacya twêtù katùtukù bashaale dingumba . . .

¹⁶ Mpindyewu, twêtù tudi bulongolodi kampanda. Tudi bulongolodi kampanda, badifundishe mwaba ewu kwa—kwa mbulamataadi, bu bulongolodi kampanda, cisumbu kampanda cya bantu badilongolole pamwe bwa kukuukwila Kilisto, kadi katuyi mu dingumba kampanda nansha. Muntu nansha umwe kaakwikalaku ne bukookeshi kumutu kwetu to, nwamonu’s. Kî ndingumba to. Cidi—cidi anu bulongolodi cyanaana, bwobumwe munkaci mwa beena kwitabuuja beena Kilisto. Bantu balwalwa mwaba ewu mu ekeleeziya. Nenku eci cidi cishaala ekeleeziya udi bu ne ki kwabo kumbelu padibo bajinge kwikala kulwamu, matuku abo ônsò a mwoyi.

¹⁷ Kabidi bantu badi mwa kulwa apa ne kubenga kupetangana ne byônsò bitudi tuyiisha abi. Abi bidi anu bîmpè menemene. Udi anu, bu mudibi anu wêwè udi mwena Kilisto, udi ne bwobumwe, ne cyanza cikwolwela anu mushindu umweumwe ùdici cyolwela bakwabo bônsò awu. Wamonu anyi? Mémè mwambe ne ndi ngiitabuuja mu dibatiiza dya kwinyijangana mu mâyi, kadi wêwè witabuuja mu dimyaminangana dya mâyi, ne mushaale anu kacya wîmanyinapù, netutungunuke anu ne kushaala mutúvwà mwa kwikala bu ne tuvwa bapetangane ku

mèyì twêtù bônso babidi. Tudi bafwanyine kwikala katuyi ne mmwenenu wa mwomumwe menemene to, bifwanangane. Kadi bu mudibi anu ne wêwè udi mwaneetu mwena Kilisto mulume anyi mukaji, tudi tukwakidila anu bilenga bya menemene, wamonu's, bantu bônso.

¹⁸ Pa nanku twêtù katwenaku ne dingumba kampanda to, bwalu ndi ngeela meeji ne dingumba didi dikosolola bwânâ bwetu. Bamwe bantu nebâmbè ne: "Ee, katwena ne cya dyenza mu ditabuluja adi to. Adi nditabuluja dya ba-Méthodistes." "Ee, adi ndya ba-Baptistes. Katwena ne... Twêtù tudi ba-Méthodistes. Katwena bwalu naadi to." Mwaneetu, piikalâ Kikisto mwikalemu, twêtù bônso's tudi—tudi naadi bwalu. Bidi bikengela tuteeke wetu... Mubidi wa Kilisto's ngudi—ngudi—ngudi usaama. Ne ndi mmona aci bikole mu matunga leelu ewu, mushindu utudi ne... Mpindyewu, Kilisto kacya, musangu nansha umwe, kâtukù mulongolole ekeleeziya kampanda wa dingumba to. Mpindyewu, itabaayi bwa nwikaleku anu batwishii bwe bîmpê pa bwalu abu.

¹⁹ Mpindyewu, mpindyewu, nênnûkonkè maalaba diloolo, bwa bintu binudi nujinga kumanya ebi, bu mudi maalu malonda makwabo ândi nteela aa, anyi cintu kampanda cikwabo. Ncyêna ne dîbâ menemene dya kubyamba kubimana to, bwalu ncyakumona mwa kufika ku cikwabo cyena-bwalu to, bwalu mbifwanyine bya muntu wenza mbingu ne mbingu anu pa cyena-bwalu cimwecimwe aci. Kadi paudi muswe kumanya ne mmwaba kaayi, nî ncinyi cyônso, ungeele anu lukonko, uluteeke anu pa—pa cyambilu apa, nenku nênkwandâmùnè ku lwôlô.

²⁰ Mpindyewu, dingumba dya kale ku ônsò, ne ekeleeziya wa dingumba wa kumpala utukaadiku bapete, ng'ekeleeziya wa Katolike. Baakamuvwija bulongolodi bidimu nkama yisatu ne bya mu njila paanyima paa lufu lwa mupostolo wa ndekeelu. Bwa aci ncyâ bushuwa. Udi ucipeta mu Baataatù baa Nicée baa kumpala, ne udi ucipeta mu mifundu ya Josèphe, ne, kaa, yâbûngî ya—ya bafundi banene baa maalu malonda. Nwamonu anyi? Nenku pa bidi bitangila mu ba—ba...cyônso cya ku bikondo bya ekeleeziya, kuya too ne ku lufu lwa mupostolo wa ndekeelu, ne bidimu nkama yisatu paanyima paa bapostolo, kakuvwa ekeleeziya ya cyena mangumba to. Kadi Katolike nguvwa dingumba dya kumpala dya ekeleeziya.

²¹ Ne ekeleeziya ya Mishònyì mmangumba adi mapatukile mu dingumba dikwabo. Dilongolola dya kumpala dyâkalwâ, divwa n'Luther; paanyima paa Luther kwakalwa Zwingli, paanyima paa Zwingli kwakalwa Calvin, kuyabi anu nanku too mushindu awu. Nenku too ne ku Ditabuluja dya beena Wesley, too ne ku Alexandre Campbell, John Smith, ne bakwabo, nwamonu's, anu nanku. Ne nkwaka ya ndekeelu yitudi naayi mpindyewu ki bitupa bishiileshiilangane bya cikondo cya Mpenta ebi.

²² Kadi ndi ngiitabuuja ne Nzambi mmukwate mudimu mu cikondo ne cikondo cyònsò. Kadi nukaadiku bamone ne, musangu wònsò udi ekeleeziya kampanda upangila, ne padibo anu badyenza bulongolodi badi bashaala bakaadi benda bapangila anu kupangila pa dîbà adi anyi? Ne musangu wònsò udibo anu bapangila, Nzambi katu ujuululula ekeleeziya awu cyakabidi to. Ùdi umba upangila bukole. Mpindyewu nudi anu... Panudi baswe kumanya maalu malonda pa bwalu abu, tudi—tudi mwa kunupa byôbì abi, bwa ne—bwa ne ekeleeziya nansha umwe, mu maalu malonda a maeeleeziya, kacya kakutu dingumba nansha dimwe dikaadiku didishinde kadi dijuuke cyakabidi to. Ba-Baptistes, ba-Méthodistes, ba-Presbytériens, ba-Luthériens, nansha biikàle banganyi, pavwabo anu badishinda, kwabo kuvwa kumba kujika. Mpindyewu, aci's neya bushuwa. Mpindyewu, eci, ndi—ndi munwâmbile's, vwalaayi nkooci, bwalu netupoopele musonso pa cyôcì eci bikole. Nwamonu anyi? Kacya kaditu dyanji kwikalaku to, musangu nansha umwe. Pavwà anu muntu upatuka bu muntu nkaaya kadi ulongolola ekeleeziya, divwa dibanga.

²³ Nzambi utu ukwata mudimu ne bantu nkaaya, kî nne dingumba to. Kacya Nzambi mu cikondo nansha cimwe kâtukù mukwate mudimu ne dingumba to. Ùkaadi mukwate mudimu misangu yònsò anu ne muntu nkaaya. Mu Dipungila Dikulukulu, Yèyè utu mukwate mudimu ne muntu nkaaya. Mu Dipungila Dipyadipya, Yèyè mmukwate mudimu ne muntu nkaaya. Mu cikondo kana cyònsò, Yèyè uvwa ukwata mudimu misangu yònsò anu ne bantu nkaaya, kî nne mangumba to. Nenku, ki bwa cinyi, pîikalà Nzambi kayi mu dingumba to, nebinkwacishe ku cinyi bwa mèmè kwikala bwalu ne cintu paaci ne ndingumba? Mpindyewu, bândi ngamba kî mbantu badi mu diine dingumba adi to, ndi ngamba dingumba dyôdì diine, bwalu bantu baa Nzambi badi mu mangumba ônsò awu.

²⁴ Mpindyewu, Nzambi kacya katu ulekelaku cintu cyenzeka kayi Yèyè ufila didimwija pa bwalu abu to. Ncyèna mèmè ngiitabuuja ne kudiku cintu kampanda cidi . . .

²⁵ Mpindyewu, mbyenze bu mutudi ne nkonko yidi yijuuka, mu maeeleeziya, bu mudi lutuvwa bapete matuku abidi aa pa bidi bitangila mashi ne maanyi, ne bikwabo. Nenku nudi bamanye mukanda mumfundila ne “Mwaneetu Branham Munanga” awu, ne bikwabo. Kadi kabingila kàvwà kènza ne mèmè nkandameene cyôcì aci, mbwalu kacyna mu Dìyì to. Ne ki bwa cinyi ndi mbengangana ne dingumba, mbwalu kadyena mu Dìyì to. Nenku bidi bikengela ciikaleku ne cintu kampanda citudi mwa kushindamijilapu diitabuuja dyetu. Nenku pîikalàbi ne katwenaku mwa kudishindamijila pa dingumba kampanda, s'bidi bikengela twètù kudishindamijila pa Dìyì dya Nzambi. Bwalu Dyôdì ki cishimikidi cimwepele, Dìyì dya Nzambi adi.

26 Nenku pìikalà Dìyì dya Nzambi kadiyiku dyakula bwa dingumba, kadi diikàlè dyakula dibengangana ne dingumba, pa dîbà adi's tudi ne cya kwakula bilondeshile Dìyì. Katuyi tucyuka bidi mwepiskopo, anyi cidi nî nganyi wamba, cidi nî nganyi wela meeji, cidi nî mmuntu mwîmpè kaayi wamba, padici kacyi cikumbanangane ne Dìyì dya Nzambi, nanku's ncyà mafi. Nudi numona anyi? Cidi ne cya kwikala, Dìyì ndidi ne cya kwikala cintu cya ndekeelu. Dìyì dya Nzambi ndidi ne cya kwikala amen wa ndekeelu.

27 Mpindyewu nwavulukaayi ne, ncyèna nyenga muntu bwena Kilisto bwende (ikalaayi bumvwe aci) mu mangumba to. Kudi binunu makumi bya misuuka ya mushinga mukole mu miine mangumba awu, biikàlè bânà baa Nzambi. Kadi kubakosolola ne kubasunguluja, ki cîndî mêmè mbenga ncyôci aci. Ne Dìyì dya Nzambi didi dicibenga.

28 Ne ndi ngeela meeji ne kakwena kasumbu nansha kamwe kàdiku mu ditunga emu leelu ewu, kakwena kasumbu nansha kamwe kàkaadiku mu ditunga emu, kâtù kakayiku kadyànjila kwamba kudi Dìyì dya Nzambi ne, nekalwe to. Ndi ngitabuuja ne Dìyì dya Nzambi ndidi ditupetela byônsò bitudi naabi dijinga, anu mu Dìyì emu mene. Kuumukila ku. . . wetu ntwadijilu too ne kundekeelu, bidi bisanganyibwa anu mu Dìyì dya Nzambi. Nenku pashiishe ndi—ndi ngitabuuja ne byôbî biikale mu Dìyì dya Nzambi, dîbà adi's bivwa bikengela bwa twêtù. . . Dyôdi didi didyànjila kwamba. Ne Dìyì dya Nzambi ndidimwija.

29 Mpindyewu, kwèna ubala Dìyì dya Nzambi byenze anu bu udi ubala cibejibeji to. Udi ubala Dìyì dya Nzambi ku Nyuma Mwîmpè, wamonu's, bwalu Nyuma Mwîmpè Yèyè mwine ngudi wakwila kudi Kilisto. Kilisto mwikale usakidila Nzambi bwalu Yèyè wakasokoka bintu ebi ku mèsù kwa beena lungenyi ne beena meeji, ne neabisokolwele bânà bu aba badi baswe kuyiila. Pa nanku, nudi numona's, kakwenaku mushindu wa ne wikale mulonge tulaasa to, kakwenaku mushindu wa ne wikale mwenze dingumba to. Kudi mushindu anu umwepele wa kwikala mululame, ngwa ne, kwikala mulombodiibwe kudi Nyuma wa Nzambi. Ne diine dilabula dyûdi mupete adi didi ne cya kukumbanangana ne Dìyì edi. Nwamonu anyi? Dîbà adi kaayi udi mupete cintu. Nwamonu anyi?

30 Cileejilu patwâfikà pa mwaba ewu mu tusunsa tukese emu mpindyewu, tudi ne bantu badi—badi. . . Bamwe baa kudibo mba-Calvinistes buumishi baa maalû, bakwabo baa kudibo mba-Arminiens buumishi baa maalû, ne—ne baa mishindu mishiileshiihangane. Mpindyewu, kutu anu misangu yônsò, nansha wèwè mupandulule kantu mukâshiye kakesee kaa bishi, kadi anu ne nseke yibidi. Aci's ncyà bushuwa menemene. Ne ku nseka yônsò yibidi aku badi ne tuumaalu twa dikokelangana. Kadi, bwalu budi ne, Bulelela pa bwalu abu budi busanganyibwa kwèpi? Kutuyaaya kwobeka nkwôku

aku, kutudi twela meeji, ku ngâsà wa Nzambi, bwa kunuleeja Bulelela pa bwalu abu. Mpindyewu twangataayi anu. . . nenku anu mwômò emu ki mûndî mufunde amwe a ku malongesha a ekeleeziya aa.

³¹ Tubuululaayi mu Bibles yenu ayi, bwa ndambu wa tusunsa cyanaana, nwênù bônso mpindyewu. Nenku tuyaayi mu Bwakabuulwibwa, mu nshapita 1; anyi mu Bwakabuulwibwa, nshapita wa 17, bwa kubanga nende. Nenku tubangaayi anu kubala bwa tujandule mpindyewu kudi ekeleeziya eyi mibangile, ne cya—cyakayibanga ciine. Mpindyewu, Bible utu udyanjila kudimwija pa cintu cyônsò. Udi udyanjila kudimwija pa matuku atudi—atudi twêtù ne mwoyi aa. Nenku mpindyewu, Bwakabuulwibwa, nshapita wa 17, panwikala baswe. Mwva mwambe wa 13, kî ngûmvwà muswe kwamba to, aci mpa. . . Netwangate kabidi awu paanyima paa katanci, aci mmu ciprofeta cidî citangila États-Unis. Kadi teelejaayi ne ntema menemene mpindyewu.

Ne kwakalwa kûndî umwe wa ku banjelo mwandamutekete bavwa ne mpanza mwandamutekete, ne yêyè wakaakula naanyi, wamba. . . Lwâ apa; nenku nênkuleejè. . . dikosa dya cilumbu cya ndumba munene udi musômbe pa mâyi âbûngi awu:

³² Mpindyewu vulukaayi ne, eci cidî cimweka bu cidî kaciya cyumwika to. Mpindyewu mukaji wa luumu lubi ewu, mpindyewu, piikalabi ne netulongeshe cyôci eci, bidi bikengela bwa nwênù kwanji kujandula dyambedi ne bimfwanyi ebi bidi byumwija cinyi. Mpindyewu, *mukaji*, mu Bible, udi uleeja “ekeleeziya.” Mbanganyi badi bamanye nanku, ne twêtù tudi Mukaji-musela? Ekeleeziya m’Mukaji-musela.

³³ “Lwâku apa nenku nênkuleejè dikosa dya cilumbu.” Mpindyewu, nekwikale dikosa dya cilumbu cya ndumba munene awu, mukaji wa bukooya udi musômbe pa mâyi âbûngi awu. Mpindyewu, *mukaji* mwikale cimfwanyi cya “ekeleeziya,” ne *mâyi* ncimfwanyi cya “bantu.” Mpindyewu, panwikala baswe kucimona, kabidi, tangilaayi, mvensa wa 15 panucidi mwine mwaba awu apu, mvensa wa 15, mu nshapita umwèumwè awu.

Ki kungambilaye ne: Mâyi audi umona awu, padi ndumba awu musômbe apu, mbisamba, . . . misûmbà, . . . matunga, ne myakulu. (Nwamonu anyi?)

³⁴ Mpindyewu, ekeleeziya munene ewu, mukaji munene ewu, mpindyewu vulukaayi ne mmukaji wa luumu lubi. Nenku piikalà mukaji uleeja ekeleeziya, (ne Ekeleeziya wa Kilisto pende m’Mukaji-musela, Mukaji-musela wa cijila), nenku mukaji udi kayi wa cijila ki yêyè ewu. Nenku civwa ne cya kwikala mukaji-musela, udi kayi wa cijila to, wa udyamba yêyè mwine. Nwamonu anyi? Mpindyewu, nenku cidiye wenza ncinyi? “Mmusômbe pa,” anyi kwikala *pamutu pa*, mbwena kwamba

ne, “kwikala ne bukookeshi pamutu paa mâyi àbûngì.” Mu ngaakwilu mukwabo, ùdi ne bukookeshi mu matunga ònsò ne myakulu yònsò ne bantu bònsò. Yêyè mmuntu munene, mukaji mwine ewu.

Mpindyewu, *udi bamfumu baa pa buloba bende nende masandi, . . .*

³⁵ “Bwalu bamfumu baa pa buloba mbende masandi,” babanji, bantu banene. Mmunyi mùdi mufwanyine kwenda, mmunyi mudi mfumu wa ditunga mufwanyine kwenda, kwenda masandi ne ekeleeziya? Mmasandi a mu nyuma. A mu nyuma! Masandi ncinyi? Mmumwe ne, ee, mbyenze bu mudi mukaji ne nsòmbelu kayi wa lulamatu kudi bayende to. Ùdi wenda ne mulume mukwabo kadi pende mwikale ne bayende. Nenu ekeleeziya ewu, nenu, udi—udi udyamba mudiye Mukaji-musela wa Kilisto, piine apu mwikale wenda masandi ne bamfumu baa pa buloba, ne nsòmbelu wende wa bukooya awu, dijikula dyende dya bukooya adi. Kaa, Aci’s ncyà ndondo ne Cidi cibanjike. Ndi munangapu Dìyi’s we. Mpindyewu monaayaaku.

. . .udi bamfumu baa pa buloba bende nende masandi, ne badi basòmbèle pa buloba mbabafikishe ku dikwacika mvinyo wa masandi ende.

³⁶ “Mvinyo” wende ki uwaye wabanyinangana, disaluka dyende dya ne: “Twêtù ki Ekeleeziya! Twêtù ki badi bacipete.” Nwamonu anyi? Mpindyewu, zolaayi anu ciine aci mu mitu yenu amu mpindyewu. Eyo. “Nenu yêyè kungambul- . . .”

³⁷ Mpindyewu, mwanjelo kwambilaye Yone ne: “Nenu nênkuleejè dikosa dya cilumbu edi didi divwila ekeleeziya munene ewu.” Mpindyewu tangilaayi.

Nenu yêyè kungambula mu nyuma kuya naanyi mu cipeela; ki mêmè kumona mukajimusòmbè pa nyama wa diikala dikunze kunzuu, . . .

³⁸ *Mukunze kunzuu*, mu Bible, uleeja “wa bumfumu.” Diikala *dikunze kunzuu* didi dyumvwija ne “dikunze.” Ne *nyama udi uleeja* “bukole.”

Nukaavwa bamone’s, nyama awu uvwa mupatukile mu mbû, aci mmu Bwakabuulwibwa, nshapita wa 13. Nenu panudi numona nyama upatukila mu mbû, cidi ciswa kwamba ne bukole ebu buvwa bujuukila munkaci mwa bantu.

Kadi mu Bwakabuulwibwa 13, pààkajuukà mwânà wa mukooko ewu, wàkajuuka yêyè upatukila mu buloba, kamuyi mu bantu to, États-Unis. Kadi pashiishe, paanyima, ùvwa ne tusengu tukese tubidi, bukole bwa cyena mbulamatadi ne bukole bwa ntendeleelu. Ki pashiishe kupetaye bukookeshi, ne kwakulaye mwàkaakulà dragon kumpala kwende. Pa nanku bikengela nufunde nulame ne, tukaadi tubwela ku dikengesha dya mu ntendeleelu ne bintu bimwebimwe byakenzabo mu

Loomo wa cimpangaanu kukaadi bidimu byâbûngì adi, bwalu cidi EMU MMUDI MUKALENGE WAMBA.

Mpindyewu tangilaayi bwalu abu. “Musòmbè pa nyama, bukole kampanda.”

³⁹ Nuvwa bamone Rebekah anyi? Paakamupeta Eliyeza, kuvwa nku dîbà dya diloolo, nenku yêyè kunwisha kaameelu mâyi. Bwalu, Eliyeza ukaavwa mwambe ne: “Nsongaakaji wâlwa kunwisha kaameelu aka mâyi awu, yêyè awu ki wîkala. . . ne wâmpa paanyi mâyi a kunwa awu, yêyè awu ki uwikala Wêwè musungule, Mukalenge, bwa kwikalaye mukaji-musela wa musadidi Webe, Izaka.” Kadi pacicivwaye anu munkaci mwa kusambila apu, Rebekah kulwaye e kusuna mâyi ne kumupaye bwa kunwaye, kunwishaye kabidi kaameelu. Monaayi, kaameelu kavva nnyama. Ne yêyè nyama umwèumwè uvwaye unwisha mâyi awu, ki wâkamwambula e kumufikisha kudi mukaji musela-wende, Izaka.

⁴⁰ Nenu, leelu ewu, bukole bwa Nyuma Mwîmpè, budi Ekeleeziya munkaci mwa kunwisha mâyi ne kukuukwila abu, ki Cintu cyâMwambulà ne kuumumusha pa buloba ebu, bwa kusambakeena ne Mukaji-musela. Ncya bushuwa ne, Izaka uvwa mupatuke mwikale usanganyibwa mu budimi, ku diloolo. Twêtù katwena tusambakeena ne Mukalenge mwamwa mu Butumbi nansha. Efeso, nshapita mwî5, udi wamba ne netusambakeene Nende mu mpeepele. Kaa, aci’s cidi cifikisha ba-Méthodistes ku diikala badilongolole bwa kwela mbila. Anji elayayiku meeji ku bwalu abu! Nwamonu anyi? Mukalenge. . .

Izaka ukaavwa mupatuke mu nzubu wa taatwëndè, mwikale usanganyibwa pambelu mu budimi paakamonaye Rebekah ulwa mubànde pa kaameelu. Mukaji kumunangaye, anu ku cimumwenenyi, kutupikaye pa kaamelu e kwasaye lubilu bwa kuyaye kasambakeena nende. Ncya bushuwa. Mwômù amu ki mutudi tukasambakeena ne Mukalenge. Ne kaameelu kiine kaakanwishaye mâyi aku, kaakamwambula kumufikisha kudi bayende.

Nenu Bukole bwine budi Ekeleeziya ukuukwila abu, budi baa pa buloba babiikila ne ndikolesha dya maalu abu, budi Ekeleeziya ukuukwila abu, nebwikale Bukole bumwebumwe abu ki bwikalà mwa kwambula Ekeleeziya mu mpeepele, “Bwa kuya kasambakeena ne Mukalenge mu mpeepele.” Nyuma Mwîmpè! Nwamonu anyi? Kùdi. . .

Nenu, tangilaayi, Rebekah uvwa mvirgo.

⁴¹ Kadi ewu mukaji yêyè ndumba, utudi twamba apa ewu. Mpindyewu, nuumvu mpindyewu ne bukole ebu ncinyi anyi? Bu—bukole, cidibu buumvwija, ne, nyama. Yêyè uvwa pa wa mukunze kunzoo. Mpindyewu, ncifwanyine kwikala nyama wa mushindu kaayi? *Mukunze kunzoo*, abu’s mbufwanyine kwikala bukole “bubanja.” Ewu yêyè neikale ekeleeziya wa

mushindu kaayi mpindyewu? Yêyè udi ekeleeziya mubanji, ne ùdi ekeleeziya munene, ne ùdi ekeleeziya wa bukole, ne yêyè udi ne bwenzeji butangalake pa misùmbà ne pa bantu. Ne bamfumu baa pa buloba mbende nende masandi a mu nyuma, mbwena kwamba ne bantu banene baa pa buloba. Mpindyewu netujandule ne yêyè udi nganyi, mu kasunsa kamwe cyanaana, ne netujandule bidi bitangila mangumba aa.

Ne mukaji awu mmuwale bivwalu bikunzubile (bya bumfumu), . . . muvwale bivwalu bya meekala a dikunzubile ne dya dikunze kunzuu, . . . mulengeja ne ngòlò . . . mabwe a mushinga mukole, masàngà, mwikale ne dikopo dya ngòlò mu cyanza cyende dyùle tente ne cinyangu ne bukooya bya masandi ende:

42 Ûvwa ne cinyi mu cyanza cyende? Dilongesha dyende, diine didiye wolwela bantu ne: “Twêtù ki ekeleeziya, tudi *cikampanda*” adi. Nenku mmufikishe bamfumu baa pa buloba ku dikwacika nende, mushindu awu. “Tudi *cikampanda*. Twêtù ki badi bukole bunene! Tudi batangalake mu ditunga ne ditunga dyònsò. Twêtù ki ekeleeziya udi mutambe bunene udikù. Lwâyi, nunwe wetu . . . Angataayi, pongololaayi nubikuleku ndambu. *Wêwè* angata. *Wêwè* angata.” Ncyôci aci, nwamonu’s. Nenku ùvwa ne dikopo mu cyanza cyende. Tangilaayi.

Ne mukaji awu uvwa muvwale bivwalu bya meekala a dikunzubile ne dya dikunze kunzuu, . . . mulengeja ne ngòlò ne mabwe a mushinga mukole ne masàngà, mwikale ne dikopo dya ngòlò mu cyanza cyende dyùle tente ne cinyangu ne bukooya bwa masandi ende:

43 Mpindyewu, balunda baanyi, citudi tubala eci kî ncibejibeji cya ku dituku ne ku dituku to. Tudi tubala Dîyi dya Nzambi dya Cyendelele ne dibenesha. Maulu ônsò ne buloba nebijimine, kadi Dîyi adi nedishaale. Ncya bushuwa.

Ne pa mutu wende pavwa pafunda dînà, pavwa dînà edi difunda’s we: BWALU BÛSOKOKA, BAABULONA MUNENE, MAMWÈNDÈ WA BANDUMBA, CINYANGU CYA PA BULOBA.

44 Mpindyewu, mwaba ewu kukaadi cikondo kampanda, ngeela meeji ne kî mmu ekeleeziya emu to, kadi nkaadi muiyishe pa cyena-bwala cya ne: *Mufundù Ku Cimanu*, ne mufile cibadi cya maalu malonda a Baabulona. Mpindyewu, kasumbu kònsò kàkaadiku kajuuke, ntendelelelu yònsò ne kasumbu kònsò kàdiku pa buloba leelu ewu, mbibangile mu Genese. Mpindyewu, nwènù bangate mukanda wa Hislop wa *Baabùlònà Yìbidi*, nwènù baswe kucilondesha mu maalu malonda, anyi mu umwe wa ku mikanda ya mîmpè ayi, nudi mwa kupeta nansha kasumbu kònsò kanudi baswe kupeta aku. Nènggìikalè mwa kunwalujaku mu tusunsa tukese emu, pa bidi bitangila bayiishi bakaji, nwamonu’s, nenku nnuleeje anu kwakabangilabi

dyambedi, nwamonu's, mwamwa mu Genese. Ne bwa bintu bishiileshiihangane ebi, anu mushindu mene wakapatukilabi mu Genese. *Genesis* udi umvwija ne “mbangilu.” Mbanganyi badi bamanye ne aci ncyá bushuwa? Genese mmbangilu. Pa nanku, bintu byônsò bidiku ebi, bivwa ne cya kwikala ne mbangilu.

⁴⁵ Pândi ntangila mucu. . . Mvwa mwitu munda mwa ngondo yibidi, yisatu, bu yibidi nanku. Ndi mmona mucu, mushindu udiwu mulenga. Ndi ngumona, ùdi uya mu buloba; mukwabo udi ujuuka pa kaaba kaawu apu, mwoyi wa ku musangu ne ku musangu. Nenku ndi ngeelangana meeji pa cyôci aci. Kadi mucu awu uvwaku ne mbangilu kaaba kampanda. Úvwa ne cya kwikala ne mbangilu. Ne mushindu umwepele udiwu mufwanyine kwambiibwa ne mmuci, anyi mwa kwikalawu nsanga, anyi hêtre, anyi cilombalomba, anyi dibwè, anyi nî ncinyi cyônsò, bivwa bikengela kwikaleku Meeji kampanda a kumutu paanyima paawu. Anyi bu kwôkò kwikale anu umwepele, mwine awu mwikale nsanga umwepele, bintu byônsò nunku bidi anu nsanga pa buloba bujima. Kadi bivwa bikengela Cintu kampanda, cya cinene, Meeji a kumutu, bwa kuwuteeka mu bulongame.

Dîna Dyende dya Cijila dibeneshiibwe! N'Yèyè Udi uteeka ngondo ne mitooto mu ndongolwelu wa díbà ne mabulunga. Yèyè ngudi muteeke bintu byônsò mu bulongame bwabi. Ne Yèyè ki wateeka Ekeleeziya Wende mu bulongame. Neakudimuke atangile anu kudi Yèyè muswe bwa kutangilaYe; ku esete, ku wesete, ku nord, anyi ku sud, anyi cyônsò cidiYe aci. Díbà ditwikala mwa kuumusha ngenyi ya cyena mangumba eyi mu mitu yetu ne kudyela twètù biine mu kaabujima mu Kalvariyo. Yèyè neabiteeke mu bulongame, bu twètù mwa kwikala bakookele mudi mici ne bufuki Bwende bukwabo abi. Kacyakacya kanutuku numona ngondo wamba ne: “Mêmè ncyakukenkesha bufuku ebu to. Yimwe ya ku nwênù mitooto yikenkesheku pa kaaba kaanyi” to. Kadi twètù, kaa, tudi bashiilangane, nwamonu's.

⁴⁶ Mpindyewu, Baabulona, tangilaayi mwakamweneka Baabulona. Udi umweneka ku mbangilu kwa Bible. Udi umweneka munkaci mwa Bible. Ne ùdi umweneka kundekeelu kwa Bible. Mpindyewu, kudi cintu kampanda. Mpindyewu, wákabanga ne Nimrod. Nimrod ngwâkaasa Baabulona mu Cibandabanda cya Shinear, anu pabwipi menemene ne munkaci mwa Musulu wa Tigre ne wa Euphrate. Ne Euphrate udi ukosolwelamu. Ne—ne mushindu uvwa njila yônsò, yikosolwela mu ditunga dijima adi, yikafikisha too ne ku Baabulona's. Ne cyônsò cya ku biibi abi civwa bunene bwa mêtres makumi asambombo ne umwe, biibi bivwà byenza ne cyamu cya kabanda abi. Nenku pauvwa ubwela munda mwa cimenga cya Baabulona, mùsèèsù ne mùsèèsù wônsò uvwa ukafikisha anu too ne ku nkwaswa wa butumbi.

47 Mpindyewu, udi mwa kuya ku Loomo, leelu ewu, ne njila yônsò neakafikishe anu ku Loomo. Ne kudi ka-virgo Mariya kakese kiimane mu disangu dyônsò, ne mu cibenda cya njila, kambule Kilisto mwânà mu cyanza cyaku, mwikale ufunkuna njila uyààya too ne ku Loomo awu. Nwamonu anyi? Cidi cimweneka ku mbangilu, kwa Bible; cidi cimweneka munkaci mwa Bible; s'ki cyòcì eci kabidi ku ndekeelu kwa Bible.

Mpindyewu ndi anu muswe kutungunuka ne kubala, anu bwa tusunsa tukese cyanaana, bwa nwamona mwa kupeta paa kushindamijila cyòcì eci. Nwamonu anyi? Eyo. “Nenku mêmè kumona mukaji awu,” mpindyewu tangilaayi, “ekeleeziya.” Panudi numona *mukaji*, tumaayi meeji anu ku “ekeleeziya.” Nwamonu anyi?

... *mêmè kumona mukaji awu mukwacike ne mashi a bansantu, . . .*

48 Mpindyewu, mwaku *munsantu* udi ufuma ku cinyi? Mwaku *munsantu* udi ufuma ku “musantwisha,” anyi “mujidiibwe,” musantwisha. Eyo.

... *mêmè kumumona mukwacike ne mashi a bansantu, . . .*

49 Mpindyewu, pìikalàbi ne mukaji ewu ng'ekeleeziya, wakakengsha bansantu. Ne yêyè ki udi ekeleeziya wa mutambe bunene. Ûdi ne bukookeshi pa buloba bujima. Ûdi pamutu paa mâyi àbúngì. Ne ùdi . . . Bamfumu baa pa buloba badi benda nende masandi. Ee, yêyè udi nganyi? Bwalu busokoka bwa mushindu kampanda. Mpindyewu Nyuma neikale mwa . . . Nudi bamanye, kudi ne cya kwikala mapà citeema a Nyuma mu ekeleeziya; dya lungenyi, ne dikwabo bwa kuumvwa, ne dikwabo dya dyondopa, ne dikwabo bwa *bikwabo*.

... *ne mashi a badi bafwile diitabuujja dya Yesu: . . .*

50 Mbimweneke ne kabavwa batamba kucyuka bivwa Yesu mwambe to. Anu bivwa ekeleeziya mwambe. Ncya bushuwa. Ne ki cidi mu cyòcì, kabidi.

... *ne pângààkamumònà, mêmè kukema ne dyanyina dikole.*

51 “Mêmè kukema ne dyanyina. Mêmè . . . Civwa nci—nci—ncintu cya dikacila pa bidi bimumtangila, mushindu wùmvwà mukeme muvwaye. . . .” Mpindyewu, ngânjibi kwangata kaaba kaa Yone ne kuteeta kucitookesha ndambu, nwamonu's. Yone wakamba ne: “Ki yêyè udi musòmbe wawa. Ûdi udyangata bu ne ng'ekeleeziya wa cyena Kilisto. Ûdi yêyè ne mushindu wônsò wa kwela cyanza ku mfranga yônsò ya pa buloba. Ûdi ne bamfumu baa pa buloba ku makàsà ende. Yêyè udi cintu cibanji ne cya meekala kabùkabù, kadi mmunyi mudiye mwa kwikala mukwacike ne mashi a badi bafwile diitabuujja baa Yesu? Mmunyi mudiye mwa kukengesha bansantu? Mmunyi

mudiye mwa kushipa badi bafwile diitabuuja baa Kilisto abu? Kadi pende's udi udyamba mudiye mwena Kilisto, yèyè mwine, ekeleeziya wa cyena Kilisto." Mpindyewu tangilaayi.

Ki mwanjelo kungambilaye ne: Wakemi bwa cinyi? Nénkwambilè bwalu busokoka bwa mukaji awu, ne bwa nyama udi mumwambule awu, ne yèyè uvwa ne . . . mitu mwandamutekete ne nsengu dikumi awu.

⁵² Mpindyewu, edi didi anu dibala dyetu dya patupu edi mwaba ewu mpindyewu. Kwataayi bwalu ebu. Eci neciikale cipeepele cya dikema.

Nyama uwāmònu awu uvwaku, ne kênàku; ne neapweke upatuka mu . . . neabande upatuka mu ciinà cidi kaciyi ne nshiikidilu, ne neabwele mu kabutu: ne aba badi basòmbèle pa buloba nebakeme, beena mènà avwa kaayi mafunda mu mukanda wa mwoyi kacya baafuka dyulu ne buloba, paamonabo . . . paa—paakatangilabo nyama wa bwena uvwaku, udi kaciyiku, kadi pende mwikaleku awu.

⁵³ Mpindyewu, mpindyewu eci cidi ne cya kununyingaku cizadi, nenku ncyòcì eci. Mmwambe, monaayi, ne: "Pìikalà bònsò," kî ng'anu ndambu mukese to, kadi, "bònsò badi basòmbèle pa buloba nebakeme." Bònsò bwabo nebakeme. Buloba bujima nebukeme bwa mukaji ewu. Kudi anu kasumbu kamwepele kiiikalà kakayi mwa kukema bwa bwalu abu to, ki aba bavwa ne mènà mu Mukanda wa Mwoyi wa Mwànà wa mukooko.

⁵⁴ Mpindyewu, mbipiciibwe ne mèmè mucifunyike anu mwine mwaba ewu, bwalu netubwelemu mu tusunsa tukese emu. Nwamonu anyi? Ndibà kaayi dyakafundiibwa mènà abo mu Mukanda wa Mwoyi wa Mwànà wa mukooko? Nkubangila (Dibà kaayi?) paakabwelabo mu ditabuluja dya ndekeelu anyi? Mmu diloolo dyakayabo ku cyoshelu adi anyi? Mmu diloolo dyakashaalabo beena ekeleeziya adi anyi? Ncyèna nkeba bwa kunutapa ku mwoyi to. Kadi, nyawu nkwambila, Bible mmwambe ne: "Mènà abo akafundiibwa mu Mukanda wa Mwoyi wa Mwànà wa mukooko anu ku cifukidi cya dyulu ne buloba." Menemene! Dibà divwa Nzambi, ku cibangidilu, mumone ne Úvwa mwa kutuma Mwan'Ende, ne Úvwa mwa kwangata kaaba kaa ngènzàmpèkààtù, paakeediibwa Mashi a Mwànà wa Nzambi panshi. Bible mmwambe ne Mashi Ende akeediibwa panshi kumpala kwa difuka dya dyulu ne buloba. Mbanganyi badi bamanye ne Bible udi wamba nanku, ne: "Mashi a Kilisto akeediibwa panshi kumpala kwa difuka dya dyulu ne buloba"? Paakeediibwa Mashi awu panshi, cidimba cyònsò cya Mubidi, beena mènà àkafundiibwà ne Mashi awu abu, mu Mukanda wa Mwoyi wa Mwànà wa mukooko, ku difuka dya dyulu ne buloba.

Bwôwà bùdì naabu mushindu awu mbwa cinyi? Kaa, mwaneetu! Aci's cidi cikangula biibi, kî mmwômò anyi?

⁵⁵ Ee, mpindyewu tubalaayi eci mwaba ewu mene, bwa twêtù kumona ní cidi aci cyamba ncyá bushuwa. Nwamonu anyi? “Ki mwanjelo kungambilaye ne: ‘Bwa cinyi wa- . . .’” Ngeela meeji ne mmvensa wa 8: “Ne nyama uwămònu awu . . .” Eyo. Nyêyè.

Nyama uwămònu awu uduku, ne kênàku; ne neabande upatuka mu ciinà cidi kaciyi ne nshiikidilu, . . .

Mpindyewu, netwalukile ku cyôci aci, kadi ndi njinga kwangata cikwabo eci, bwalu netùkufikè.

. . . ne neaye mu kabutu: ne aba badi basòmbèle pa buloba nebakeme, beena mènà adi kaayi mafunda mu mukanda wa mwoyi kacya ku difuka dya dyulu ne buloba, . . .

⁵⁶ “Nekwikale musùmbà mujima wa bantu pa buloba,” mu ngaakwilu mukwabo, “biikalà mwa kuseeswishibwa,” bwalu yêyè wakabaseeswisha. Ne kuvwa anu kasumbu kamwe kavwa kakayi kaseeswishibwe to, ne kiine aku nkaa aba beena mènà avwa mafunda mu Mukanda wa Mwoyi kacya ku difuka dya dyulu ne buloba. Netubwele mu cyôci aci paanyima ndambu.

⁵⁷ Mpindyewu monaayi mukaji awu, ekeleeziya awu, ùvwa “*Bwalu Busokoka, Baabulona.*” Tudi tumumona umweneka ne Nimrod. Kiipacila kaa Nimrod kavwa nkaa cinyi? Nimrod wakaasa cimenga kadi kwenzeja bimenga bikwabo byònsò bwa kwikalabi bifuta citadi kudi cyôci cimenga eci. Tudiku bafwanyine kumona cintu bu nanku leelu ewu anyi? Kudiku mwaba bu nanku leelu ewu anyi? Kudiku ekeleeziya kampanda mwikale ne bukookeshi pa ditunga dyònsò pa buloba anyi? Cya bushuwa's. Kudiku mwaba leelu ewu mwikale ufucisha ditunga ne ditunga citadi kudiwu anyi? Kudiku mwaba bu nanku anyi?

Tuyaayi kumpala tubale bidi bishaale ebi, ndambu mukese cyanaana, bwa nupete cimfwanyi cyawu mu kaabujima. Eyo.

. . . mumone nyama wa bwena uwwaku, . . . kayiku, kadi pende mwikaleku.

Kadi apa ki padi meeji adi ne lungenyi.

⁵⁸ Mpindyewu, mbanganyi badi bamanye ne lungenyi ndimwe dya ku mapà a Nyuma? Mpindyewu, nkasumbu kaa mushindu kaayi kadiYe wambila aka, piine apu? Ûdi ne cya kwikala wambila kasumbu kaa bantu badi ne—ne mapà a Nyuma miikale akwata mudimu mu Ekeleeziya ewu.

. . . apa ki padi meeji adi ne lungenyi.

⁵⁹ Mpindyewu, imanaayi, jandulaayi bwalu abu mu bikondo byònsò bya ekeleeziya ebi mwaba ewu. Mu kubipatula, Nyuma Mwimpè wamba patooke, mushindu udi mapà awu ne cya kwikala akwata mudimu mu dituku dya ndekeelu. Mpindyewu,

tudi ne mapà a dyondopa miikale akwata mudimu. Kaa, s'bidì—bidì byenda bìmpè. Ee, mwaneetu, s'kudi makwabo mapà. Dyôdi adi's didi anu dimwepele dya ku ôwò awu. Adi's didi anu kaacintu kakesee kaa kashaadile. Ee, s'ki dipà ditambe bunene menemene edi mwaba ewu mene. Didi difwanyine kwikala ditambe bwîmpè ndyèpì, ndipà dya Nyuma Mwîmpè dya lungenyi, bwa kutwangaja Dìyì dya Nzambi ne kuleeja Ekeleeziya mwaba utudi biimane, anyi dya kufikisha anu muntu kampana ku dyondopiibwa cyanaana? Twètù bônso's tudi dijinga ne kwikala ne mubidi tumatuma. Kadi abi's mbipiciibwe ne mêmè ne musuuka wanyi mwikale tumatuma, pamutu paa mubidi mwikale tumatuma, dîbà kana dyônso. Kaa, ekelekele!

Teelejaayi mudi Nyuma Mwîmpè wakwila kudi Yone, mu Paatemo, wamba ne: “Apa ki padi lungenyi. Ateeleje Eci.” Mpindyewu mwaba ewu ki utudi tupetela dizola dya cimfwanyi aci. “Apa ki padi. . .”

Kadi apa ki padi meeji adi ne lungenyi. Mitu mwandamutekete ayi mmikuna mwandamutekete, padi mukaji awu musòmbe.

⁶⁰ Kudi cimenga anu cimwepele, cîndì mêmè mumanye, pa buloba. . . Kudi bimenga bibidì, bìndì mumanye, bidì ne mikuna mwandamutekete anyi mipite apu. Cincinnati ncimwe cya ku byòbì abi, bàtu balonde bwalu bufwikakaja bwa Cincinnati. Mmaamù mbwa wa diitu, nudi bamanye's, uvwa. . . ne bikwabo. Kadi's cidì ne bya nanku bipite apu bûngì. Kadi kakwena ekeleeziya nansha umwe udi ukookesha Cincinnati to.

Kudi mwaba anu umwepele pa buloba bujima, mwikale ne ekeleeziya musòmbe pa tukuna mwandamutekete, mwikale ukookesha buloba bujima. Mpindyewu, mêmè ewu ncidì mfuminaku. Bintu byônso abi.

Nenku ndi mumone muntwamu mwaba udibo bambe ne: “Nenku apa ki padi lungenyi.” Bwakabuulwibwa 13. “Ewu udi ne lungenyi ènzè makumi a nomba wa nyama wa Iwonji awu, bwalu nnomba wa muntu kampana.” Kì mmusùmbà wa bantu, kasumbu kaa bantu to, kadi muntu “kampana.” “Ne nomba wende udi nkama yisambombo ne makumi asambombo ne yisambombo.”

⁶¹ Mvwa anu ngumvumvwa bamba, ne, kumutu kwa nkwaswa wa butumbi wa paapà wa Loomo, mbafundeku ne: “VICARIVS FILII DEI.” Mvwa anu ndikonka misangu yàbûngì ní civwa mbulelela. Elaayi kashoonyi, nubifunde mu bishiferi, mu bishiferi bya cyena Loomo, numonebi ní ki mudibi. Mbulelela anu bwa menemene. Mêmè mvwa mwimane pabwîpì mushindu ewu ne cifulu cya butumbi cya ntongo yisatu cya paapà aci, mu lumwenu: “Bukookeshi pa iferno, dyulu, ne mpurgatoriyo.” Nwamonu anyi? Pa nanku, bintu abi, mêmè ncidì mfuminaku,

ncidi mfuminaku ku Loomo ne ndi mumanye ne mbulelela. Mpindyewu tudi bamanye ne bidi mu bimfwanyi.

Nenku apa bamfumu mwandamutekete: bataanu bakaadi bapone (abi bivwa mmu cikondo aci), ne umwepele udiku (awu ngudi ne cya kulwa mpindyewu, ùvwa n'César), ne mukwabo uci ne cya kulwa (ùvwa ng'Helooode, uvwa wa cikisu awu); . . .

62 Mpindyewu tangilaayi. Tangilaayi mudibi bipwangane.

. . . ne paalwaye, ùdi ne cya kutungunuka bwa cipoolo cìpì.

63 Kudiku muntu mumanye bûngì bwa matuku avwa Helooode mukookeshe anyi? Ngondo yisambombo. Wakaya wenda ukokela mamwëndè mu mùsèsèsù, muswikila ku mucu wa cikokedi cya kabalu. Ki kwoshaye cimenga; kadi kwela beena Kilisto bwalu abu pambidi. Mwikale wimba cindaala ku luseke lwa kakuna pavwabo. . . pavwaye wenda wosha cimenga apu. Ngondo yisambombo—yisambombo. Kadi monaayaaku: “Ne nyama. . .” Mpindyewu anji anu tangilaayi, tangilaayi numone muvwaye mupange kaneemu bwa bakwabo. Nwamonu anyi? Mpindyewu tangilaayi.

Ne nyama uvwaku, ne udi kayiku awu, nansha. . . udi wa mwandamukulu, ne udi wa ku baa mwandamuteke (ngiikadilu wa wa mwandamutekete awu), ne udi uya mu kabutu.

64 Muntu kana yònsò mmumanye cidi kabutu kumvwija, kadi “iferno.” Nenku tangilaayi mwaba udiye mupatuke mu kubàndà kwende aku, mu “iferno.” Ncinyi ciine aci? Ciinà cidi kaciya ne nshikidilu. Kakwenaku cishimikidi to bwa dilongesha dya Katolike. Kakwenaku Bible to bwa dilongesha dya Katolike. Kakwenaku cintu paaci ne m'Bible bwa dilongesha kampanda dya Katolike to, nansha kakese. Kabatu bambaku ne udiku to. Nsaserdose kajuukaye mwaba awu, nsaserdose wa citende awu mwaba ewu wa ekeleeziya wa Mwoyi Munsantu ewu kulwaye kuntwaku. Kwambaye ne: “Kaa, yèyè. . .” Mwua mmulondela mùmvwà mubatiize Mary Elizabeth Frazier. Yèyè ne: “Kaa, s'udi mumubatiize mushindu uvwa ekeleeziya wa Katolike wa mbangilu ubatiiza's.”

Mêmè ne: “Ncikondo kaayi aci civwaye wenza nanku?”

Yèyè ne: “Mu Bible, mu Bible webe awu.”

65 Mêmè ne: “Ekeleeziya wa Katolike uvwa ubatiiza nanku awu anyi? Aci ndilongesha dya ekeleeziya wa Katolike anyi?”

“Eyo.”

66 Mêmè ne: “Mu dibenga kupangila dya ekeleeziya wa Katolike adi, mmulwe kushintuluka bikole nunku bwa cinyi?” Nwamonu anyi?

⁶⁷ Yêyè kwamba ne: “Ee, udi umona’s, nwênù bônso nutu nwitabuujja Bible. Twêtù tutu twitabuujja ekeleeziya.” Nwamonu anyi? “Twêtù katwena tucyuka bidi Bible wamba to. Anu bidi ekeleeziya wamba.” Aci’s ncyà bushuwa menemene. Wáfikabì peebe ku diteetangana dya makanda, pa bwalu abu, wâteetakù peebe musangu kampanda, wamonu’s. Bôbò kabatu bacyuka bidi Bible wamba to; abi kabyenaku byôbì ne bwalu to. Badi bôbò bacyuka bidi ekeleeziya wamba. Nwamonu anyi?

⁶⁸ Kadi twêtù katwena tucyuka bidi ekeleeziya wamba to. Tudi twitabuujja bidi Nzambi wamba. Amen. Bwalu Bible, mbafunde ne: “Diyì dya muntu yônso òikalè mashimi, kadi Dyanyi òikalè Bulelela.” Ki cidi cyenza ne twêtù katwikadi dingumba to.

⁶⁹ Mpindyewu tangilaayaaku. Teelejaayi eci, mu kasunsa kamwe cyanaana. “Bamfumu bataanu bàvwàku abu, bapone, bamfumu bataanu.” Panudi nujinga kupetela aci mu maalu malonda, nênnùleejèci. “Ne umwe udiku, ne mukwabo ne cya kulwa.”

Mpindyewu monaayi, “nyama wa lwonji.” Mpindyewu, nyama wa lwonji kavwa mfumu to. Úvwa “umwe udiku, udi kayiku; pende mwikaleku, kadi kayiku; pende mwikaleku, kadi kayiku.” Ncinyi aci? Dishiihangana dya nkwasà dya baapaapà, bukookeshi kampanda, nyama wa lwonji mwikale ukookesha. Mpavwa Loomo wa cimpangaanu mukudimuke bwa kushaala Loomo wa ciipaapà. Loomo wa cimpangaanu wakakudimuka, ki pashiishe kushaалаye buupaapà, mmumwe ne, bavwa ne paapà pamutu paa mfumu, nenku paapà awu ki mfumu wa mu nyuma. Ki bwa cinyi utu mfumu wa mu nyuma, bamwase cifulu cya butumbi, ùdyamba mudiye mupinganyi wa Yesu Kilisto. Ki bwalu mbwòbù abu’s. Monaayi mpindyewu.

⁷⁰ Nenku netupatule muntwamu dilongesha dya Katolike adi bwa kunuleeja mushindu uvwadi didifinde kadi kubwela mu ekeleeziya ya Mishònyì, nwamonu’s, mushindu ucididi anu dyadije nkwasà disòmbe mu ekeleeziya wa Mishònyì, mu byàbùngì. Bibengangane, menemene, ne Bible, bibengangane kakuyi mpatà to. Mpindyewu: “Nyama uvwaku, udi kayiku.” Mpindyewu vulukaayaaku: “Bwónsò bwabo nebaseeswishiiibwe, pa buloba, beena mènà avwa kaàyi mafunda kacya mu difuka dya dyulu ne buloba.” Tumonaayibi.

Ne nyama uvwaku, ne udi kayiku awu, (mvensa wa 11) ne nansha nanku yêyè udi wa mwandamukulu, ne . . . wa ku baa mwandamutekete, ne udi uya mu kabutu. (Neatungunuke too ne paafikaye pa ciinà cidi kaciyi nshiiکیدilu ku ndekeelu wa njila.)

Ne nsengu dikumi yiwàmònu ayi mbamfumu dikumi, . . .

Mpindyewu tangilaayi mwaba ewu. Panwikala baswe kumona cintu kampanda cya cikoka ntema, tangilaayi eci.

...mbamfumu dikumi, badi kabayi banji kupeta bumfumu to; kadi badi bapeta bukookeshi bu bamfumu munda mwa dîbà dimwepele pamwe ne nyama wa lwonji.

⁷¹ Kî mbamfumu badi baashiibwe cifulu cya butumbi to; mbamfumu baa cimbâmbilâ. Nwamonu's, bôbò kacya kabatu baashiibwe cifulu cya butumbi bu ne mbamfumu to, kadi badi bapeta bukookeshi bu bamfumu, munda mwa dîbà dimwepele, mu bukookeshi bwa nyama wa lwonji. Mudi anu mu cikondo cikese eci cya mu cindidimbi mpindyewu mene emu ki mudi bamfumu baa cimbâmbilâ bajuuka. Nwamonu anyi? "Bapeta bukookeshi bu bamfumu, munda mwa dîbà dimwepele pamwe ne nyama wa lwonji." Mpindyewu, eyo.

Bôbò aba badi ne meeji amwe, ne nebafile bukookeshi bwabo ne dikanda dyabo kudi nyama wa lwonji.

Bôbò aba nebalwishe Mwânà wa mukooko mvita, kadi Mwânà wa mukooko neabatambe bukole: (Butumbi's we!) bwalu yêyê udi Mukalenge wa bakalenge, ne Mfumu wa bamfumu: ne aba bàdì nende mbabiikila, ne basungula, ne beena lulamatu.

⁷² Mvwa mwa kujinga bwa mêmè kuyiisha diyiisha anu mpindyewu mene pa cyôci aci ne: "Basungula, kumpala kwa difuka dya dyulu ne buloba, ne biikâlè bashaala ne lulamatu ku dibiikidiibwa dyabo." Aleluuyah! Ncyôci. "Bôbò mbabiikila, ne basungula, ne beena lulamatu." Ne mmutwangaji, nwamonu's: "Basungula, ne beena lulamatu." Nebamatambe bukole. Nansha bôbò balwe kushaala banene munyi.

⁷³ Ne communisme munene ewu, nkwaka wa communisme utudi bapete leelu ewu ewu, kanuditacishi bwa aci to. Awu yêyê udi ukwata mudimu menemene anu mu byanza bya Nzambi. Ndi mwa kucijaadika ne Bible ewu. Yêyê ki wâmukèngesha bwa lufu lwa muntu ne muntu yônsò wâkashipâyè bwa diitabuuja awu. Eyowa's, mukalenge. Nutangilaayi ne bamfumu aba nebiikale mwa kupunga dîyi bônso, ne nebamukine. Ne ditunga dijima, buloba bujima, communisme mutangalakanganemu. Mona's, cidi ne cya kwikala nkwaka wa Nzambi, bwa kununyooka. Wêwè udi wamba ne: "Anji indila kakese, Mwaneetu Branham. Communisme, nkwaka wa Nzambi?" Kakuyi mpatà to, cya bushuwa, s'nnkwaka wa Nzambi. Bible ngudi mwambe nanku. Kadi udi ulwa bwa kufika ku dikosa dya cilumbu cya cisamba cidi cipeetula Nzambi ne cya bantu balela mu masandi ne babule ngàsà aba. Cidi cishaale pa buloba ebu ncinyi? Citudi naaci ncinyi? Mwaba ewu dituku adi . . .

⁷⁴ Nênganjì kwimanyika cyena-bwalu cyanyi kakese, bu byôbì mwa kwenzeka. Mvwa mbala mu katupa kaa Mufundu mwaba uvwabi ne mwânà mulela mu masandi kaakubwela mu disangisha dya Mukalenge munda mwa nkongo dikumi

ne yinaayi. Mbanganyi badi bamanye nanku? S'ncyá bushuwa, Dutelonoma 23; mwànà mulela mu masandi. Bôbò babucikile mukaji mu budimi, mmumwe ne, kule ne dikubiibwa dya bantu, nenku mulume kampanda kupitaye mukaji awu bukole, mulume awu uvwa ne cya kumusela. Nenku nansha byôbi ne mukaji awu walu kushaala ndumba, mulume awu uvwa anu ne cya kusômba nende too ne paafwaye. Nenku mukaji ewu yêyè musediibwe kudiye, udyamba ne udi virgo, pende kayi virgo to, pa dîbà adi badi mwa kumushipa bwa bwalu abu. Nenku mulume ne mukaji biikàle baselangane, kadi kulelabo mwànà wa mu masandi, wa nanku awu, mu disangisha dya Mukalenge yêyè kaakumubwelaku to, too ne ku nkongo dikumi ne yinaayi. Ne bidimu makumi anaayi ki bidi byenza lukongo lumwe. Nebiikale bidimu nkama yinaayi kumpala kwa mpekaatu awu kuumukaye mu Izaleela.

⁷⁵ Nzambi utu mukine mpekaatu! Mmunyi mùdì mwa kuswa kudyatakaja ku makàsà Mashi a Cijila a Mukalenge Yesu, anu bwalu udi wa mu dingumba kampanda, mutekemene ne neubwele? Nebikengele wêwè kukumbaja mikiiya ya Nzambi anyi kwadyakubwelaku to. Cya bushuwa's. Mulami, muyiishi, cyônsò citudi mwa kwikala aci, kacyna ne cidici cyenza mu ebu bwalu to. Udi ulwa bilondeshile mishingà ya Nzambi.

⁷⁶ Nkongo dikumi ne yinaayi. Muntu mmusômbe mwaba ewu patudi twakulangana apa uvwa uyiikilangana naanyi pa ciine aci. Wamba ne: "Kadi mwaba awu mmunyi mutwamanya ne kampanda ngwasungidiibwa?"

⁷⁷ Mêmè ne: "Mwaba awu ki udi ukengela wêwè kwikala Calviniste mwîmpè." Dînà dyebe dyakafundiibwa mu Mukanda kumpala kwa difuka dya dyulu ne buloba. Nzambi ngudi wangata ndelanganyi wa mu mashi awu. Aci nciMutangile Yêyè. Nwamonu anyi?

"Kadi aci cidi ne . . ."

⁷⁸ Teelejaayi. Nwênù bansonga, leelu ewu, ncyêna mumanye ní nutu nulwa mu ekeleeziya ewu, anyi ní nutu nulwa penyi, nwênù bansongaalume ne bansongaakaji. Ukààdikù mufike ku dyumvwa ne, bintu byûdì wenza abi, kwôkò kwikàle lukongo lukwabo, bânà beebe balela nebiikalè mwa kulumbulwishiibwa bwa byûdì wêwè wenza abi anyi? Kwênàku ne kaneemu kaa nsômbelu wa kaneemu anyi? Nwênù nsongaakaji yidi yipatuka pambelu apa mivwale tuputulu tukese twa kale etu ne bintu bu nanku nwendakana naabi, nudi bamanye's, bidi bikadimwenesha pa mwaneebe wa bakaji. Utu mumanye ne kakwêbè mukaji uvwa mukaji wa—wa mvwadilu mubi, ne mamwêbè wêwè uvwa mujì wa maja wa mu bisumbu bya bimbi, ne ki cidi cyenze ne wêwè awu wikale mujì wa maja wa ùvùùla ne bilàmbà leelu ewu anyi? Cya bushuwa. Beebe bânà nebiikale cinyi? Eyowa's, mukalenge. Nzambi mmwambe ne Yêyè

neanyooke bubi bwa baledi pa bânà ne pa baabo bânà balela, too ne ku nkongo yisatu anyi yinaayi.

⁷⁹ Ne wêwè ukaadiku mufike ku dyumvwa anyi, mwaneetu wa balume, ne misangu yônsò yûdi wenza cidi cimpè, necilwe kubadiibwa pa bânà beebe?

⁸⁰ Tangilaayi kuneeku, twangataayi Ebelu, nshapita wa 7. Bible mmwambe ne, paa—paakatuutakeena Melekisedeke ne Abraham pavwaye ufuma ku dishipa dya mfumu, ne kumubeneshaye, ne Mmwambe ne, mpindyewu: “Lewi...” Ûdi wakula bwa difuta dya byadiikumi. Mmwambe ne: “Lewi wakapeta dîyi dituma dya kudi Mukalenge bwa kwikalaye upeta byadiikumi bya kudi bânà baabo. Ne Lewi mwine uvwa upeta byadiikumi awu, ukaavwa mufute byadiikumi, bwalu ucivwa mu twonyi twa Abraham paakatuutakeenaye ne Melekisedeke apu.” Ne Abraham uvwa nkakwëndè wa tatwëndè. Abraham wakalela Izaka, Izaka wakalela Yakobo, Yakobo wakalela Lewi; Lewi, taatù, kaaku, kakwëndè wa taatù. “Nenku pacivwa Lewi mu twonyi twa Abraham,” mùdi Bible mwambe, “yêyè wakafuta byadiikumi kudi Melekisedeke.” Aleluuyah!

⁸¹ Muntu kanwãmbidiku ne mushindu wônsò wa nkwaka pa buloba apa udi mwa kupangishaku lukata lunene lwa Nzambi bwa kunyungulukalu to. Ludi anu lutungunuke ne kunyunguluka! Bikaavwa bimana kulongolola anu ku cibangidilu kwaka. Kakwenaku démon anyi badémoms bûngì bukumbane bwa kupangisha ndongamu Wende nansha.

⁸² Mpindyewu, Bible katu mwambe ne yêyè wakabifuta “mu mushindu mushaadile” to. Bible mmwambe ne: “Wakafuta byadiikumi,” pavwaye mu twonyi twa kakwëndè wa tatwëndè. Butumbi’s we! Ki wanyi Mukalenge nyawu. Kaa, Yêyè’s ukaavwa mumane kucimanya, kwônsò aku, kumpala kwa dyulu ne buloba kwenjiibwabi. Ûvwa mumanye kantu ne kantu kônsò. Ne mu Abraham, ki mwakafucilaye byadiikumi.

⁸³ Nenku wêwè mwaneetu wa bakaji, wêwè mwaneetu wa balume, mmunyi mùdi mwa kwikala wenda masandi mwaba ewu, ne bantu bàsômba ne benda masandi ne bakaji baa bende, bakaji biikàle banyanga mbanza, biikàle ne nsômbelu wa bwena unudi nende awu, nudi nutekemena ne lukongo ludi lùlondà nelwikale cinyi? S’ki cìdilu eci. S’lukaadi lukafike mpindyewu kaciciyiku cingà cintu to anu musùmbà wa bânà baa mu masandi, balela mu bukooya, mushiki wa dinyanguka. Nenku nkushaadile cintu anu cimwepele bwa lwôlò alu, ndituku dya bombe bwa mushinda ditudi ne mwoyi edi. Aci ki cya bushuwa menemene. Tukaadi ku cikondo cya nshiikidilu.

⁸⁴ Mu dinda emu, mwamwa mu tukuna twa Kentucky, muvwa musômba mwânà wa balume mukese mukwabo, kuyiku mwa kuseemena pabwîpì nende mu ntanta wa mêtres asatu to, mwikale wenza byapanshi bya nsukaadi bya mamvwa

a tumbùyi. Pàmwápa kayi nansha mumanye kusunguluja ne diboko dya balume ndyépi ne dya bakaji ndyépi to. Paakumvwaye. . . Mvwa mukasambuke mu bitupa bya buloba bikandika bwa kupicilamu. Mémè ncivwa mumanye ne mvwa nsanganyibwa mwaba kaayi to. Mvwa anu mu bimwe bya bibandabanda. Nenku mvwa nya kuntwaku bwa kuya katwa buluwà bwa nshindi. Kadi pângààvu kusòmbela panshi mwaba awu, mémè kubanga kuyiikilangana nende. Ki nsongaalume awu kwambaye ne uvwa ujinga kuya ku busalaayi. Nenku mémè kulwa kujandula, patwakabanga kwakula bwa Mukalenge, ki yêyè ne: “Muyiishi, wêwè kwêna witabuujaku peebe ne tukaadi ku cikondo cya kunshiikidilu anyi?” Lwà mu mikuna ya kwaka yàya.

⁸⁵ Mémè ne: “Ncya bushuwa, ki kutukaadi. Cya bushuwa, mwanaanyi, tukaadi ku cikondo cya kunshiikidilu.”

⁸⁶ S’ki twètù bakaadiku aba. Ki dîbà ditudi ne mwoyi adi ndyòdi edi, wêwè mwaneetu. Pa kaaba aku ki patukaadi apa. Kwêna mwa kumonaku muvwa baamaamù baa kale wawa anyi, ne baataatù, nsòmbelu uvwabo nende, ne kaaku mulume ne kaaku mukaji? Kwêna mwa kumonaku nsòmbelu uvwa nende papa ne maman anyi? Kabyena bikemeshaku to patudi tusanganyibwa mu dinyanguka leelu ewu. Kabyena bikemesha to, udi mufwanyine kuyiisha mutu wamba kutuuka; bôbò nebatungunuke ne kuvwala tuputulu anu mwabo ne kale, bakutwila ne mate mu mpala. Nebakoke mfwanka kadi kukupwidijilayi mwîshi, bamba ne: “Endèlà yebe.” Bwa cinyi? Bwalu aci’s ki cisamba cidibo bapatukile. Nêmfikè ku cyòci aci, buludi, *Diminu Dya Nyòka*. Netujandule ne yêyè awu udi udifinda bwa kubwelaye penyi, tumone ne mbwa cinyi badi benza maalu mushindu awu. Bôbò mbànà ba dyabulu kacya anu ku difuka dya dyulu ne buloba. Aci ncya bushuwa. Nenku katwenamu ne cintu nansha cimwe, cidi cishaale pa bwalu abu to, nenku anu cilumbulwidi ki cintu cimwepele cidi cishaale. Katwena mwa kwikala ne cîngà cintu to anu cilumbulwidi. Nzambi neatuute anu cintakanyi cyònsò aci kadi kucyela pambelu. Nenku bantu mbôbò biine badi badyénzèlecì. Nzambi kavwa ne dijinga dya kwilakabi mushindu awu to, kadi Yêyè uvwa mumanye ne nebiikale mushindu awu. Ki bwa cinyi Yêyè wakamba ne: “Neaseeswishe bônso bavwa basòmbèle pa buloba bujima, pa kuumusha beena ménà adi mafunda mu Mukanda wa Mwoyi wa Mwânà wa mukooko kumpala kwa difuka dya dyulu ne buloba.”

⁸⁷ Tutangilaayi bwalu abu. Tubalaayi baseemene kumpala ndambu mpindyewu. Mpindyewu, mpindyewu ndi ngeela meeji ne tudi ku wa 12.

Nenku nsengu dikumi iwàmònu ayi mbamfumu dikumi, badi kabayi banji kupeta bumfumu to; kadi

badi bapeta bukookeshi bu bamfumu munda mwa dîbà dimwepele pamwe ne nyama wa lwonji.

Bôbò aba nebiikale ne meeji amwe, ne nebafile bukookeshi bwabo ne dikanda dyabo kudi nyama wa lwonji.

Ne bôbò aba nebalwishe Mwânà wa mukooko mvita, kadi Mwânà wa mukooko neabatambe bukole: bwalu yêyê udi Mukalenge wa bakalenge, ne Mfumu wa bamfumu: ne aba badi nende badi—badi babiikidiibwa ne, basungula abu, ne beena lulamatu.

Ki yêyê kungambila ne: Mâyî awămònu awu, padi ndumba musômbe apu, mbisamba, . . . misumbà, . . . matunga, ne myakulu.

. . . nsengu dikumi yiwămònu pa mutu wa nyama wa lwonji ayi, yôyi eyi neyikine ndumba awu, . . .

⁸⁸ Tangilaayi aci mpindyewu, “nsengu dikumi” eyi, makalenge dikumi aa. Nudi numona’s, mwômò amu ki mudi byôsò bikuupukila, cidi bamfumu baa cimbâmbilâ aba biikâle. Tangilaayi numone kudi bamfumu baa cimbâmbilâ biinamina. Cidi ciinamina penyi? Anji—anji ngambilaayi mfumu wa cimbâmbilâ utu kayi winamina ku communisme. Nwamonu anyi? Nenku bôbò (nebênzè cinyi?) nebakine “ndumba awu,” mukaji awu, ekeleeziya awu. Kadi cinyi? Tangilaayi numone ne ncinyi cyâcyênzà.

. . . yôyi eyi neyikine ndumba awu, ne neyimushiye mu dibungama ne butaka, ne neyidyè munyiinyi wende, ne neyimwoshe mu kapyà.

⁸⁹ Nebakupule cintakanyi aci pa karta, bushuwa menemene anu mùdîbi bushuwa ne ndi mwimane mwaba ewu emu. Bu nanshà ne tuvwaku ne dîbà dya kwangata cyena-bwalu aci cya ekeleeziya awu, ne kucilondesha mu Mifundu kuumukila eku kukatwa eku, mwaba udiWu mwambe, tubala ne: “Bamfumu bônso baa pa buloba ebu, ne bendeshi bônso baa mazuwa a mâyi, ne bônso, badi batwa mikemu mikole, bwalu Baabulona munene mmupete kabutu kende mu dîbà dimwepele.” Dîbà dimwepele, cikondo cyende kulwaci! Nenku, kaa, mushindu mwine udiWu mwambe ne: “Sankaayi, nwênù bansantu, ne nwênù bônso baprofeta baa cijila, bwalu Nzambi wasombwedi mashi a bansantu ne a bânà beenu pambidi pende.” Nwamonu’s, aci ncyà bushuwa. Bushuwa, communisme mwikale ukwata mudimu anu pa wôwò mu byanza bya Nzambi. Anu muvwa Mfumu Nebukandeneesa mukwate mudimu pa wôwò mu byanza bya Nzambi, mu dilwa kukwata beena Yuda abu, paakapatukabo mu njila! . . .? . . .

⁹⁰ Nenku mpekaatu udi mwa kutungunuka ne kufila dinyanguka, dimiinu dyakane didi anu mwa kushaalamu ne

dimiinu didi mwa kutungunuka ne kunyanguka, dinyanguka anu kunyanguka too ne paajiminadi paanyima paa cikondo. Didi dikafika pa kaaba kampanda, bwalu baamamwàbò ne baatatwàbò bavwa ne nsòmbelu wa mushindu awu kumpala kwetu twètù, nenku mu mushindu awu, too ne padiku kakuciya kutushaadila kantu nansha kamwe bwetu twètù to. Kadi nudi bamanye cyakamba Yesu anyi? Bu Yèyè kayi mwipidije mudimu to, kakuvwa mwa kwikala muntu wa musunya nansha umwe uvwa mwa kusungidiibwa to.

⁹¹ Nudiku mwa kumona anyi? Nudiku mwa kumona ne mbwa cinyi tudi bapete (Kí nkadyuwu ngenza nansha.) ba-Arthur Godfrey ne bònsò aba, nudi bamanye's, nwamonu's, ne ba-Elvis Presley, ne—ne bimònù pambelu, ne binsalabeeta, ne nsuki mipweke too ne mu dikoshi, ne mishindu yònsò yidi bansonga benza maalu eyi anyi? Cidi cìbyènza cinyi? Ncinyi ciine aci? Mbwalu bidi bifumina ku musumbà wa bàakabàdyànjidilà, bantu balela mu masandi. Kakucyena cidi cishaale nansha cimwe to! Kaa, badi biimana kuulu bimba ne: “Pèpì, Nzambi wanyi, pèpì Neebe,” benze bu Ernie mwaki wa nkunde ya myongodi ewu ne bakwabo bònsò abu mushindu awu, beela kasala kaa mushindu kampanda, ne bikwabo bya mushindu awu. Mwaneetu, udi mwaneye mudi bwalu anyi? Aci, kakuyi mpatà to cidi anu lubombo pa lwòlò. Eyowa's, mukalenge.

⁹² Muntu kèna ne bwalu bwa dyenza mu cyambilu emu to piikalaye upatuka pambelu pàapa ukaja maja a bidùndadùnda ne boogie-woogie ne bintakanyi byònsò bya mushindu wawa byabya. Kèna ne kantu nansha kaa kànà kaa dyenza paanyima paa cyambilu apa to. Ewu mwaba ngwa baikwidi, aba badi Nzambi mubiikile. Bambi babiikila kudi Nzambi ki badi bakumbanyine kwikala paanyima apa. Nenku kí mbintakanyi bya mushindu awu bidi bikumbanyine kwikala mwaba ewu to. Ki lutatu ludiku mu bwalu abu leelu ewu ndwòlò alu, mbavwije ekeleeziya kayi cintu cishiilangane ne diswa to. Diswa's didi anu dîmpè, panudi baswe kwenza aci, aci's ncinutangile. Kadi anyishayiku ntwàmbilè ne, kudi dishiilangana dinene pa kuteeta...pankaci paa diswa ne ekeleeziya. Eyowa's, mukalenge. Panudi baswe kwenza bintu abi mu diswa kampanda, ne kwenza ma-fêtes a mishindu yònsò awu ne bikwabo, aci ncinutangile. Kadi, mwaneetu, s'biwva bikengela ekeleeziya akombiibwe kubangila anu ku cyambilu too ne mu nzubu wa mwinshi mwa buloba. Ncya bushuwa. Ncyèna nswa kwamba dikombiibwa dya ne madidiishi mapyamapya ne bikampanda bikwabo to. Ndi nswa kwamba ne ne ditabuluja dya cyena kale, dituma kudi Nzambi diikalà mwa kutangalaja cintu aci kuumukila anu ku elu luseke kuya kwobeka ne ku lukwabo. Eyowa's, mukalenge. Bu mudi kuteemesha kwa bukènkè, bukènkè bwa nzembu pa musumbà wa mpenzu mikungwile pa mujilujilu wa munda mwa cimuma

cya pomme. Eyowa's, mukalenge, yôyi's neitangalake padi anu bukênkè abu buteema.

⁹³ Mpindyewu tangilaayi: “Badi ne meeji amwe, bafila bukookeshi bwabo.” Nkaadi kwinsshi kwa aci mpindyewu. “Nsengu dikumi ayi.” Eyowa's, mpindyewu.

Bwalu Nzambi mmuteeke mu myoyi yabo bwa kukumbajabo diswa dyende, (ki bwalu mbwôbù abu's), ne bwa kupetanganabo ku mêyi, ne bwa kufilabo makalenge abo kudi nyama wa lwonji, too ne pùikalà mêyi a Nzambi ne cya kukumbana.

Mpindyewu, *ne mukaji uwàmònu awu udi ncimenga cinene, cidi cikòokeshà pa bamfumu bõnsò baa pa buloba.*

⁹⁴ Mpindyewu, kabyena bikengela kutwa mu nsampu kutwa mu kaleji to, tudi bamanye ne mbalombodi baa myânzù baa Katolike. Kabyena bikengela bwa muntu. . . Mêmè ndi—ndi ngiitabuuja aci ne mwanyi mwõnsò anu mûndi ngiitabuuja ne ntu nkaadi mupete Nyuma Mwîmpè amu. Ndi nciitabuuja bîmpè menemene anu mûndi ngiitabuuja ne ndi mwena Kilisto mwimane kuulu mwaba ewu lelu ewu, bwa ne balombodi baa myânzù baa Katolike abu badi—badi. . . Cimenga cya Vatican ki cimenga ciine cidi cisòmbe pa tukuna mwandamutekete aci. Balombodi baa myânzù baa ekeleeziya abu ki bôbò abu badi nyama uvwaku, udi kayiku awu. Ki Baabulona mwine. Ncintu cileejibwe cyõnsò anu bîmpè menemene mu cimfwanyi, anu menemene kuumukila eku ne eku kwa Mifundu. Ng'ekeleeziya wa Katolike.

⁹⁵ Mpindyewu, mpindyewu ki kôkò aku kaaba keenu kadi kapapulungana. Wêwè udi wamba ne: “Ee, kî mmêmè ûdi ulenga to, Mwaneetu Branham.” Kadi imana nkukonkeku cintu kampanda. Twalukilebi ku mvensa mwi5 tûng.

Ne pa mutu wende pavwa. . . pafunda ne: BWALU BUSOKOKA, BAABULONA MUNENE, MAMWËNDË WA BINYANGU. . . MAMWËNDË WA BANDUMBA NE BINYANGU BYA PA BULOBA.

⁹⁶ Yêyè uvwa cinyi? M-u-k-a-j-i w-a m-a-s-a-n-d-i. Kabidi ùvwa m-a-a-m-ù. Cinyi? M-a-a-m-ù. Ûvwa mulele cintu kampanda. Maamù wa bânà baa balume anyi? Wa bandumba! Ndumba nganyi? Cintu anu cimwecimwe ne—ne mukaji wa masandi, mukaji wa nsòmbelu wa masandi. Cidi cimuywije mwena nsòmbelu wa masandi ncinyi? Dilongesha dyende. Ûvwa udyamba muvwaye ekeleeziya wa cyena Kilisto, kadi mwikale wabanyinangana mêyi maswika makwatakaja kudi bantu. Nenku s'nyêyè ewu apa wamba muvwaye ne. . . Pùikalàbi ne yêyè nguvwa bulongolodi bwa kumpala, nanku's bidi bimweka ne kudi makwabo malongolodi mapatukile munda mwende. Yêyè uvwa mamwëndè wa bandumba. Ncya bushuwa anyi?

Mamwëndè wa bandumba. Kavwa mufwanyine kwikala, pa nanku, mamwëndè wa bânà baa balume to. Kavwa mufwanyine kwikala maamù. . . Bivwa bikengela kwikalaci mamwëndè wa bânà baa bakaji. Nenku, piikalàbi ne bavwa mbakaji, bavwa mmaekeleeziya. Mpindyewu tujandulaayaaku. Ncinyi cyàkapàtukà munda mwa. . .

⁹⁷ Bulongolodi bwa kumpala buvwa ncinyi? Ekeleeziya wa Katolike. Bulongolodi bwibìdi buvwa ncinyi? Luther. Bulongolodi bwisàtù buvwa ncinyi? Zwingli. Bwakaya kafika too ne ku cinyi? Calvin. Nenku kuya kabwelabi mu ba-Anglicans, nenku ku ba-Anglicans kuya kabwela mu ba-Méthodistes. Ba-Méthodistes, cyàkapàtulà ba-Méthodistes ncinyi? Mwômò amu mmwàkapàtukilà Alexandre Campbell. Mu Alexandre Campbell mmwàkapàtukilà John Smith. Mu. . . Alexandre Campbell ng'ekeleeziya wa beena Kilisto; pashiishe, baakapeta ekeleeziya yinaayi anyi yitaanu, église de Christ ne tusumbusumbu tukwabo twônsò tukese tukese atu e kupatukilamu. Pashiishe ki ekeleeziya wa ba-Baptistes ulwalwa ewu, ki kwabulukaye mu tusumbusumbu tukese bûngi bu ntunda ne ngenene. Ki mu ekeleeziya wa ba-Méthodistes amu kupatukamu. . . mu yêyè ekeleeziya wa ba-Méthodistes amu, kupatukamu, kumpala kwakalwa ekeleeziya wa ba-Méthodistes baa ba-Weslèyens, ki pashiishe kupandulukanganabo misangu yinaayi anyi yitaanu. Pashiishe kufikaku ku ba-Méthodistes baa mushindu mukwabo, ne pashiishe kupandulukabo cyakabidi, pashiishe kukafikabo ku ba-Méthodistes Badishikamine. Ki—ki pashiishe kuumukabo ku aci kufikabo ku ba-Nazaréens. Nenku kuumukabo ku ba-Nazaréens kufikabo ku ba-Pèlerins de la Sainteté, ne kuumukabo ku ba-Pèlerins de la Sainteté kadi kuya biyiidi. Anu tusumbusumbu tukese twenda tupatuka mushindu awu, tutungunuke anu nanku twènda tùya, kônsò kaa ku tuumatàmbà tukese—tukese atu kuntwaku kulwaku kenda kapatuka. Kadi cyàkenzà umwe ne umwe wabo ncinyi? Ki ndekeelu wa byônsò byôbì kuya kuupukabi ku Mpenta.

⁹⁸ Kadi cyavu Mpenta kwenza ncinyi? Cintu anu cimwecimwe cyàkenzà mamwäbò aci, kwalukilabo e kudiyenzabo bulongolodi. Kadi wakalwa cinyi? Di—dingumba's. Wèwè bwela anu mu dimwe dya kudiwu aku, cintu cya kumpala: “Dilongesha dyebe didi cinyi?” Balumyana wa yààya, s'badi bakuumisha mate a mukana, nwamonu's, bwa kujandulabo ne wèwè udi cinyi, cyûdi witabuuja ncinyi. Kadi wèwè kuyi upetangana naabo mu kantu ne kantu to, mwaneetu, s'badi bakwipata anu mwaba awu. S'ncyà bushuwa.

⁹⁹ Kadi kwikadi wadyambidila ne bwalu udi wamba ne udi mwena Mpenta nanku udi mu dikubiibwa to. Mwaneetu, nekwikale beena Mpenta bûngi cyanaana bapambuke mu njila anu mwikalaku badi mu njila, ki mûndi mêmè mutwishiiibwe. Nwamonu anyi?

¹⁰⁰ Mpindyewu, malongolodi ônsò awu, bìikalapù nansha balekele dibenesha dya Mpenta ditungunuka, kabayi badivwiya bulongolodi to, kudilama anu mu bwânà bwetu ne kulekela Nyuma Mwîmpè wenza ditapulula's. Nyuma Mwîmpè ngutu utapulula. Ananiya ne Safira baakabwela musangu kampanda, kwambabo *bikampanda ne bikansanga*; kadi Nyuma Mwîmpè kwamba ne: "Nwadingi bwa cinyi?"

¹⁰¹ Kadi twêtù tudi twamba ne: "Mpindyewu, awu's m'Mwaneetu Jones, kanumwambiku kantu kabi nansha kamwe to mpindyewu, ki muntu udi ufilaku dintamfu dya mfranga dipite dya bônsò mu ekeleeziya. Ndi mumanye ne yêyè udi ne Nyuma Mwîmpè; nkaadi mumuumvwe wakula mu myakulu, ne nkaadi mumumone wela mbila mu Nyuma." Aci kî ncipte dipongolola dya nkunde pa ciseba cya ngombe cyûme to. Nwamonu anyi? Kabyena nansha ne dipetangana to. Nzambi ngudi ne díyì dya kwamba. Yêyè ngudi ne díyì dya kwamba ne yêyè awu udi nanku anyi kêna nanku. Kakuyi mpatà to. Kadi's tukaadi bacyângàte mu dingumba dyetu. "Ée, tudi bamwipate mu—mu Assemblées, ba-Unitaires paabo bumba bamwangata. Ba-Unitaires benda nende ndambu, pashiishe kumwipatabo. Bwalu, badi bamwakidila mwine amu, pashiishe beena Yesu Nkaayende bamwangata. Beena Yesu Nkaayende benda nende ndambu, kadi pashiishe cintu cidì cilondà cidì cimwangatà ki église de Dieu, umwangata pende. Église de Dieu de la Prophétie umwangata pende, ki nkwaka wa Tomlinson umwangata pende." Kaa, ekelekele! Mwaneetu, amba tûng ní katwena peetu bashiikile! Ciine aci mmu Mpenta's, ditabuluja dya ndekeelu diine. Nenu mpindyewu bakaadi ne Ludimi lwa mudilu lwa Bleu, bakaadi kabidi ne bakuukwidi baa maanyi, ne—ne baa mashi mu mpala. Kadi, kaa, luse we, ncyèna mumanye ne kukaadibo baye patudi twakulangana apa nkwepi to.

¹⁰² Cintu anu cimwepele cyanaana, ncyà ne cintu mu kaabujima cikaadi cinyanguke. Nutukù bamanye ne Bible utu mwambe ne necifike ku dinyanguka anyi? Nutukù bamanye ne—ne Bible udi wakula bwa dituku edi, ne nediikaleku, diikalàbi ne nansha meesa a Mukalenge miine neikale mûle tente ne bilushi anyi? Mmwambe ne: "Nganyi ûndì mwa kulongesha dilongesha? Nganyi ûndì mwa kufikisha ku dingumvwa Mémè? Bwalu bidi ne cya kwikala kanungu pa kanungu, pa kanungu, mulongo pa mulongo." Nganyi udiYe mwa kulongesha dilongesha? Ng'aba badibo balekeeshe dibeele, dya maman. Nwamonu anyi?

¹⁰³ Mpindyewu, kakwena—kakwena mukaji, mukaji nansha umwe wa ngiikadilù mibì mu cimenga emu udi kayi mufwanyine kulela mwânà wa bakaji virgo to. Udi virgo padiye ulediibwa, mpindyewu, kabidi ùdi mwa kuya wenda ukola anu bîmpè. Kadi kuyi mutangile bîmpè to, byôbi ne mamwëndè uvwa ne ngiikadilu awu, mwânà wa bakaji awu, misangu citeema pa dikumi, neenzè maalu menemene anu mudi mamwëndè wenza

amu. Mpindyewu, nudi bamanye ne aci ncyá bushuwa. Mukaji mukulumpe mwikale ulombola nzubu wa bakaji baa luumu lubi, mmufwanyine kulela mwânà mukese wa bakaji. Mmufwanyine kwikala ne bidimu dikumi ne bisambombo, mukezuke mwikale ne nsòmbelu mwîmpè anu mudi wa mbata amu, kadi, amba anu yêyè mushaale mushindu awu's. Kadi, bwalu budi ne, ùdi walukila cyanyima kadi kubanga kwenza maalu anu bu mamwëndè.

¹⁰⁴ Mpindyewu, ekeleeziya wa Katolike ki ndumba wa kale utu mupatuke ne malongesha adiyè mudikwatakajile anu yêyè mwine, miitabuuja a majimbu, miine awu, Bible mmwambe ne: "Mmupatuke mu ciinà cidi kaciyi ne nshiikidilu ne nealukile ku kabutu." Bible ngudi mwambe nanku. Mpindyewu, bôbò balongesha aci, ncyá mafi. Ncyá mafi, bilondeshile Dìyì dya Nzambi. Ne pashiishe ki ekeleeziya wa ba-Méthodistes ulwàlwa ewu, utu mulediibwe munda mwende yêyè, nsongaakaji mulenga kwîsù, kadi cidiye mwenze ncinyi? Mmukudimuke e kutangila paanyima ne kwenza bintu anu bimwebimwe bidi maman wende wenza abi. Ùlekela beena disangisha dyende bavwala tuputulu. Ùbàlekela banwa mfwanka. Ùbàlekela benza maalu a lukutukutu ne benza anu muvwabi bikengela kwenzabo amu. Kakuyiku cidibo bamba pa bwalu abu nansha cimwe to. Kampaasata kaa kale kenze bu nshima mibîshi aku kiimàne paanyima pààpa, paanyima paa cyambilu pààpa, kiikàle ne bwôwà bwa ne nekajimije difutu dyaku dîngà dituku, anyi dilongo dyaku dya mampà.

¹⁰⁵ Leka's nkwambile, mwaneetu, s'mbipiciibwe ne mêmè muyiishe Evanjeeliyo, ndya bisukwita bya mukèlè mwikale nwa mâyì a ku musulu, kadi ngamba Bulelela pa bwalu abu. Muntu ne muntu wa mu disangisha dyanyi bu yêyè mwa kujuuka kupatuke e kuya, mêmè nêmbâmbilè Bulelela pa bwalu abu. Eyowa's, cya bushuwa.

¹⁰⁶ Mbwalu kaayi ebu? Kaa, s'nkwende kudiye udiila. "Ee, udi mumanye's, mêmè's ndi mpaasata wa ekeleeziya udi mutambe bunene mu cimenga." Nwênù ba-Baptistes ne ba-Méthodistes nudi nuteeleja muprofeta wa mashimi. Mpindyewu, aci mmakoyi, kadi cyònsò cidi cilongesha bibengangane ne Bible mmuprofeta wa mashimi. Nansha ciikàle cya kapelu mushindu kaayi, nciprofeta cya mashimi. Ncyá bushuwa.

¹⁰⁷ "Kaa, byònsò's bidi anu bîmpè padibi ne udi ne dînà dyebe mu mukanda." Udi mufwanyine kwikala ne dînà dyebe mu mikanda dikumi ne yibidi. Dyôdì kadiyi mu Mukanda wa Mwoyi to, udi mujimine! Udi mwa kwikala mwîmpè menemene, udi mwa kwikala ne lulamatu lwa menemene ne mukezuke ne nsòmbelu mwîmpè ne mwebe mwònsò, aci kacyenaku cipetangana nansha naaci.

¹⁰⁸ Esawu uvwa mupite Yakobo misangu yibidi, bwa bivwa bitangila kwikala muntu mulume, kucyuka kwa tatwëndè mpofo ukaavwa mukulakaje awu ne bikwabo byônsò. Kadi Yakobo kavwa kenji kaa maalu makonyangale kacya anu kaalembelera kwinshi kwa mapuupila a mamwàkù, kànà kaa balume kiikàle kaacilùmaacikàjì. Kadi Nzambi wakamba ne: “Ndi munange Yakobo mubenge Esawu,” kumpala kwa bânà baa balume abu bônso babidi kulediibwabo. Ki cidi Loomo 8 wamba. Ncya bushuwa menemene.

¹⁰⁹ Nzambi mmumanye cidi mu muntu. Ne Yèyè mmumanye kabidi cidi mu ekeleeziya. Tudi ne mwoyi ku Dyâmpà dya Mwoyi, Dyâmpà dya Dìyì dya Nzambi. Mpindyewu, ki cidi cyenza ne twêtù katwikadi dingumba to.

¹¹⁰ Mpindyewu ndi njinga kunupeeshaku kakwabo kantu kakese. . . Ndi njinga kunupeeshaku kaacifwanyikijilu kakese kâmvwà mufunde mwaba ewu. “Munene. . .” Mpindyewu mu Bwakabuulwibwa, mu 19.2. Ndi ne cintu kampanda cifunda mwaba ewu. Ndi muswe ntape dîsù bwa mmone ne ncinganyi.

Bwalu dilumbulwisha dyebe ndilelela ne dyakane: bwalu yèyè walumbulwishi mukaji munene wa masandi, uvwa unyanga buloba ne masandi ende awu, ne yèyè wamanyi kusombwela mashi a basadidi bende ku cyanza cyende. (Ki ndekeelu nyèyè awu wa ekeleeziya wa Katolike.)

¹¹¹ Mpindyewu, tudi tukeba kabidi bwa nwênù kumona, apa kabidi, ne dingumba—ne dingumba ndijandudiibwe kabidi mu Mifundu mwaba ewu, ne. . . Ne Bible mwine kèna wakulaku bwa dingumba to. Dingumba ndyumukile ku ekeleeziya wa Katolike. Yèyè ki mamwëndè wa kumpala wa dingumba, ki dingumba ne dingumba dyônsò kulediibwadi. Mpindyewu eci neciikale mwa kununyingaku kaacizadi ndambu. Neciikale cyènzà kununyinga kaacizadi kakole dîbà dyônsò, nwamonu’s. Kadi ndi—ndi muswe bwa nwênù kumona ne dingumba kadyakalediibwa anyi kadyakateekiibwa kudi Nzambi nansha. Dyakateekiibwa kudi dyabulu.

¹¹² Ekeleeziya wa Nzambi udi. . . Twêtù katwena bakosoloke to, tudi bônso mubidi umwe; ditekemena dimwe ne dilongesha dimwe, umwe mu dinanga. Ki Ekeleeziya wa Nzambi udi ne mwoyi nyèyè awu. Nansha byôbi ne, bintu abi bidiku, tudi umwe pamwe! Ncya bushuwa. Nansha yèyè mwikale Méthodiste anyi Baptiste, mwaneetu, yèyè mulediibwe cyakabidi ne mûle tente ne Nyuma Mwîmpè, mmwaneetu. Tudi twenda batwangane makaaya. Cya bushuwa. Eyowa’s, mukalenge. Kabyenaku ne cidibi bishintulula to.

¹¹³ Mòsà. Misangu mikwabo ntu nkenzakana ngamba ne: “Udi mumanye musumbà wa beena Mpenta bakolessi baa maalu abu, Mwaneetu Branham, mbwa cinyi udi mufwanyine kwikala

kupatuka ne musumbà wa mushindu awu?” Nudi bamanye mudi bwalu anyi? Mòsà uvwa utuma mèsù ende pa bânà baa Izaleela. Ûvwa utangidila ku dididiishi anu dimwedimwe divwa Pâlò utangidila pende adi. Pâlò uvwa ubatangila bu musumbà wa basopi baa bitoci, kadi Mòsà uvwa yèyè ubatangila bu basungula baa Nzambi. Ûvwa mumanye ne bavwa ne mulayi. Bwa cinyi? Ûvwa mucimanyine ku Dîyi. Ne ku diitabuuja . . . Mwikale ne dikàsà pa nkwasà wa butumbi, bwa kushaalaye Pâlò, ne buloba bujima busanganyiibwa ku makàsà ende, ùsomba mwaba awu upongolola mvinyo mukana mwende, ne bakaji balenga kwisù biikàle bamwela lupeepele, yèyè bu mukalenge wa bumfumu bwalabale, anyi mfumu wa cimbàmbilà, anyi mfumu wa buloba bujima, Mòsà mwànà awu, ne bidimu makumi anaayi, mwikàle ne biine abi mu cyanza cyende. Ûtùma mèsù pambelu utangila musumbà wa basopi baa bitoci abu, kadi kujingululaye ne ùvwa umwe wabo. Aleluuyah! Ki cyôci aci. Wàkajingulula ne àvwa umwe wabo. Nenku anu ku diitabuuja, nkaayaadi, kusungulaye!

¹¹⁴ Bikengela muntu ne muntu ěnzè disungula. Bikengela bwa wèwè wènzè disungula. Newikale mwa kwenza disungula mpindyewu. Newikale mwa kwenza disungula mu dinda. Newikale mwa kwenza disungula maalaba diloolo, pawikala ne mwoyi. Nebikengele bwa wèwè kwenza disungula kumpala eku. Mwaneetu, kukaadi ntanta mule kũnkaadi mêmè musungule. Bible ewu ki uvwa wanyi nkonga-myaku. Bible ewu ki uvwa wanyi Mukanda wa Mwoyi. Bible ewu ki uvwa Dîyi dya Nzambi. Ku Bible ki kũndi mêmè mwikadile ne mwoyi. Bible ewu ki kwanyi kũndi mêmè mwimanyine.

¹¹⁵ Ki bwa cinyi, Mòsà uvwa ne mèsù ende matangija pambelu pa bânà baa Izaleela. Nenku yèyè kavwa anu wamba ne: “Kaa, badi cisamba cilenga be. Ncyèna naabo cilumbu to. Kaa, to, ncyèna muswe kwikala ne dîyi dibi nansha dimwe dya mbàmba” to. Mushindu awu ki udi bantu bààbũngi benza leelu wa Ndaaya ewu. “Kaa, beena Mpenta ne bantu badi bapete Nyuma Mwîmpè bàba, ne bantu badi biitabuuja dyondopa dya kudi Nzambi bàba, kaa, mêmè—mêmè—mêmè ncyèna naabi cilumbwee.” Kadi Mòsà kavwa nanku to. Yèyè wakalekela Ejipitu ne wakashaala umwe wabo. Wàkapatuka kuyaye munkaci mwa bânà baabo. Ûvwa umwe wabo.

¹¹⁶ Mwaneetu, ki kũndi mêmè ndonda wanyi njila nkwôkò aku. Mêmè nêndondè njila pamwe ne banyàabanyà badyombola baa Mukalenge, nansha biikàle dyanza dimwe, nansha cinyi. Badi ne mulayi, ne ndi mmona mènà abo mu Mukanda wa Mwoyi wa Mwànà wa mukooko. Bôbò abu mbânà beetu. Ncyà bushuwa. Enza peebe disungula wimane ku luseke lwabo. Nansha bôbò mu bulelela anyi mu ntupakanyi, nansha nanku wèwè imana anu ku luseke lwabo. Piikalabo mu ntupakanyi, ubakwacishe wèwè ubafikishe ku bulelela. Cya bushuwa. Kwakubavwija baakane

mu dibatwa dya misebe ubasaka eku ne eku to. Udi umona, uditacishe bwa kubakoka bwa kubapatulam.

¹¹⁷ Charlie, anu muvwabo bamba bwa Mwaneetu Allen amu, bwa mudilu uvwabo . . . mashi mu byanza. Mémè kwamba ne: “Kacya, kacya ncutuku mudyombole A. A. Allen to.” Mémè kwamba ne: “Bu mémè mwa kuyiisha bu A. A. Allen, ncyènakú mufwanyine kwenza disangisha dya dyondopa to.” Mpindyewu, pakaadibi ne mbwa dibenga kupetangana pa bidi bitangila mashi bu ne ki cileeeji cya Nyuma Mwimpè, mu byanza byebe, mémè nêmbenganganè ne aci. Kadi pakaadibi ne mbwa bwàna bwetu, yèyè mmwaneetu. Ndi ngiimana nende batwangane makaaya mu mvita. Ncya bushuwa. Yèyè mu ntupakanyi, nênditácishè bwa kumukwacisha. Byôbì ne kî nyèyè udi mu ntupakanyi to, nî mmémè udi mu ntupakanyi, ndi muswe bwa yèyè ankwacishe. Nenku mushindu awu ki utudi twenda—twenda mu dipetangana. Mpindyewu tangilaayi apa.

. . . uvwa *BWALU BUSOKOKA, BAABULONA* . . .
MAMWÈNDÈ WA BANDUMBA . . .

¹¹⁸ Mpindyewu nudi numona mudi ekeleeziya leelu ewu, nwènù balunda baanyi, nudiku mwa kumona mudi ekeleeziya eyi leelu ewu ne nsòmbelu yònsò naka udiyi miswe kwikala nende awu anyi? “Bidi anu bimpè menemene, ndaayi anu kumpala,” ngulube udyá ngulube nende, kayi ubucyukaku to. “Mona’s, kakwena bwalu bubu pa kwenza nanku to. Mona’s, wèwè ngudi anu uteeta bwa kwikala wa cyena kale.” Mpindyewu tangilaayaaku dilongesha dyabo. Mpindyewu ndi muswe . . . Tangilaayi mpindyewu. Aci ki cyabo ciibidilu. Nudi numona ne, kukaadi ndambu wa bidimu, anu ekeleeziya wa Katolike nkaayende ki uvwa ne dyanyisha dya kuya kamona sèndemà anyi? Ekeleeziya wa ba-Méthodistes kabawwaku bôbô bafwanyine kutuma meeji ku cintu bu nanku to. Mangumba ônsò awu bavwa ne: “To! Abi mbyenzedi bya dyabulu.” Mémè’s nkaadi ndikonka cidi cyenzeke’s. Eyowa’s, mukalenge.

¹¹⁹ Kadi nudi bamanye’s, udi mufwanyine kwangata nsongaakaji miine ya beena Katolike ayi, yipatuka mivwale tuntu etu . . . (Mpindyewu, bamwe baa kunudi nwènù bakulumpe baa bukole bwanyi ebu aba.) . . . bapatuka bamona kantu kakese aka muvwabo ne tûpàntà twa tushiikile mu binù atu. Mulumyana awu, ngeela meeji, ukaadi mu iferno, diloolo edi. Ncyèna mumanye to. Ncyèna mulumbulwishi wende to. Kadi paakenzaye kaamusambu kaa manyaanu kaa kumpala kààkapàtukà ku cisanji aku, kabayiku bakakenkete to, kabayiku bakakenkete to, ne: “Binyùngùlùlaayi’s, nwènù tukajaana, binyùngùlùlaayi; binyùngùlùlaayi nupwekelele too ne panshi nuleeje binù byenu bilenga abi.” Mbanganyi badi bavuluke aci dîbà dyakapatukaci musangu wa kumpala, kukaadi bidimu? S’ki civwa cilema cya kalèngù cya kumpala ncyôci aci anu piine apu. Ncya bushuwa. Kadi paakapetabo mwine mulumyana wa ku

Texas ewu, ne paakapatulabo bakaji abu bavwale tulàmbà twa mwinshi atu bwa kwangatabo mmwenekelu wa cintu kampanda civwabo kabayiku to, ne bintu bya mushindu awu abi, kadi kubalekela bacyenza kabayi banyookiibwa to. Kadi mpindyewu cyakenza cinyi? Cyakadifinda's. Cintu s'nniyuma's.

¹²⁰ Muntu kampanda uvwa wakula, dituku dikwabo. Yêye kwamba ne: "Ncyêna mumanyeku mêmè ewu ne cingènza ncinyi to. Ndi ne mwanaanyi wa balume mwîmpè, wa meeji matooke, kadi mwânà awu udi wangata cyônsò cidiye pende mwa kufika ku ditwa byanza aci."

Mêmè kwamba ne: "Mbwa cinyi?"

"Udi ukadisanga ne mwîvi's."

¹²¹ Paudi wêwè ulamakana ne muntu mwikale mwîvi, wêwè mwine peebe awu newikale mwîvi. Maman wanyi wa beena Kentucky uvwa anu ne ciibidilu cya kwamba ne: "Paudi ulaala pamwe ne mbwa mwikale ne nkùpà, neujuuke mwikale ne nkùpà, wêwè peebe." Angata—angata mukaji udi kayi mwîmpè to, kadi ulekele mwânà wa bakaji. . . kadi umuteeke pamwe ne mwânà wa balume mwikale mwî—mwîmpè ne wa kaneemu, katanci aka mwânà wa balume awu neikale wa mukooyike anu mudi kânà kaa mbwa amu. Mwânà wa balume mubi neanyange pèndè mwânà wa bakaaji mwîmpè. Badi bakumanyina nku balunda baudi wenda naabo. Tapuluka! "Patukaayi munkaci mwabo," mudi Bible mwambe, "tapulukaayi!" Ncyà bushuwa.

¹²² Pùikalà mangumba abo awu alukila ku dinyanguka dya mushindu awu bu mudi dya kulekela bantu baabo. . . Ee, mwaba ewu dituku dikwabo, mu ekeleeziya munene mulenga wa ba-Baptistes, byakakengela bwa bôbò kulekela bantu kuyabo. Kuyiisha anu tusunsa makumi abidi, muntu awu, bwalu bivwa bikengela bwa mpaasata kwanjiye kunwa mfwanka. Disangisha dijima kupatuka pambelu. Bônsò kushaala biimane pambelu apu banwa mfwanka beele milongo, ne pashiishe kwalukilabo, mpaasata ne bôbò bônsò. Mvwa muye ku ekeleeziya kampanda wa beena Endèlà yeebe, mwaba awu uvwa muntu mwimane, muvwale muzabi munene mule, mwimane mwaba awu, wamba, mweyemene ku cyambilu mushindu *ewu*, ulonda bwalu bwa kaacilongo kaa mushindu kampanda kavwaye mukasangane pa kakuna. Ki cyônsò paaci civwaku ncyôci aci, ki kupatukaye. Minu yende ya bwalu mishaale ya kalaabi ne mwîshì wa mfwanka. Eyowa's. Ki ulonda muvwa bakaji, muvwa balume baya kanaya. . . Dinaya diine dya ba-Allemands ditubo banaya ne cyôci aci adi ndinaya kaayi apa's, ditùbo bànàya bikole mu mushindu wa—wa nwabanyinangana twarta adi, nudi bamanye? Úvwa. . . Kaa, mvwa mwele meeji ne mvwa mwa kudi vuluka's. Karta kaa ciibùlòjì, bavwa baya kanaya dinaya dya karta kaa ciibùlòjì. Ngeela meeji ne mmwômò's. Eyowa, mmu dinaya adi munutu nutwabanyinangana. Ndinaya dya twarta dyetu

dya ciibidilu edi. Dinaya dya karta kaa ciibùlòjì, mu nzubu wa mwinsi mwa buloba! Kaa, Nzambi wanyi! Ki mwaba udi wabo nshindameenu bôbò usanganyiibwa ngwôwò awu's. Kabyena bikemesha to! Ncinyi? Badi benza ciine aci, kadi kwasa dyela ekeleeziya wa Katolike bibingu pambelu apa mu myaba ya Rotary mudibo banaya PMU. Mona's, nwênù beena Mishònyì's nukaadi peenu bakooyike anu mudibo bôbò amu, mwaba awu cinudi mwa kwamba pa bwalu abu ki cinyi? Lwesu lwa mishila kalwena mwa kwamba mbidika wa diipikila café mudiye "mufiike" to. Nansha kakese. Nudi nwenza biine abi, ki pashhishe ne: "Ee, ndi Presbytérien. Ndi Méthodiste." Kwèna cintu to paudi kuyi mwanji kulediibwa cyakabidi. Ncya bushuwa. Ne paudi wenza aci, ki paudi umanya. Kudi cintu kampanda munda mwebe amu ciikàle cikwambila ne bintu abi mbibi, ne neupatukemu anu mudibi menemene ne wêwè udi kàpàntà kaa kashiikile mu binù bwa dibata. Udi umanya ne m'Bulelela. Cya bushuwa. Eyowa's, mukalenge. Cintakanyi aci cidi cyenda pamwe ne cyôcì aci. Bwa cinyi?

... MAMWÈNDÈ WA BANDUMBA ...

¹²³ Dimwe dya ku matuku adi panshi aa, maamù wa kale ewu neàmbe ne: "Nudi bamanye mudi bwalu? Byôbi biine, s'tudi bônso anu mwomumwe." Nenu nudi bamanye ne ncinyi pa dîbà adi? Nsangilu wa Maekleeziya neikale mwa kubasanga bônso pamwe mudibo mpindyewu emu. Kadi nudi bamanye cyalwa kwenzekela kasumbu kakese bu mudi aka anyi? Nenuyoobe bwa bwalu abu, balumyana. Aci ncyà bushuwa menemene.

¹²⁴ Kadi kanutacishi mwoyi nansha, Mwânà wa mukooko neamutambe bukole. Bwalu Yêyè m'Mukalenge wa bakalenge, ne Mfumu wa bamfumu, ne Nzambi ngwâlombola Ekeleeziya Wende, pamutu paa dingumba. Neapongolwele Ekeleeziya awu Maanyi a ngòlò a Nyuma Mwîmpè awu pa mutu. Mwanetu, Kapyà nekapone mu Dyulu, ne bimanyinu ne maalu a kukema nebyenzeke, mu mushindu unutu kanuyiku banji kumona kwônso eku to. Eyowa's, mukalenge. "Kanuciinyi to, nwênù kasumbu kakese kaa mikooko, ndiswa dya Taatù wenu dya kunupa Bukalenge." Eyowa's, mukalenge. "Ewu wananukila too ne kundekeelu awu!" Ki bwalu mbwòbù abu's. Tungunukaayi anu ne kupweka ne njila. Lamaayi mpala mitangija ku Kalvariyo. Bible ewu ngwa cya bushuwa. Kanutacishi mwoyi to.

¹²⁵ Tangilaayi mpindyewu. Abi mbimwe bya ku biibidilu bidibo naabi. Amwe a ku maalu a mu nsòmbelu adibo naawu. Tuvwa anu bafwanyine kutungunuka. Katanci aka byôbi abi, kuzololokela mu ekeleeziya ya Mishònyì. Pashiishe bakaji baa cyena Katolike babanga ku...Mona's, kabivwa anu byenzelanganana bibi bwa kuvwala tuputulu to, bu muvwabi ne bavwa baya mu ekeleeziya ne baswika kaacitambala kakese ku mutu. Kaacilele kaa mushindu kampanda's kaa ne: "Kanudi munyiinyi mu difànù to." Nenu, kaa, nkwèpi kunukaadi bapete

ciine cya ne bikengela nuswike citambala ku mutu bwa kubwela mu ekeleeziya aci? Ndi muswe bwa nundeeje Mufundu awu. Nciprofeta cya mashimi. Mbambe penyi mu ekeleeziya ne udi ne cya kuvwala cifulu mu ekeleeziya? Paudi uvwala cifulu ku mutu, udi ufwishwa Kilisto bundu, cya bushuwa; nwênù balume, ki bândi ngambila abu. Nwênù bakaji, nudi bulelela ne cibwikilu, kadi nêngëlè nî nganyi nî nganyi yônsò kadyombo bwa kundeejaye mwaba udibi ne ncifulu anyi nцитambala. Nnsuki yebe ayi! Kadi nyawu ukaadi muyikose yônsò. Mpindyewu udi wamba bishi bwa aci? Kaa, badi bamba ne: “Abi mbya cyena kale.” Piikalabi nanku, s’ m’ Bible! Ne Dîyî dya Nzambi’s ndidi dya cya bushuwa.

¹²⁶ Mwawa mwakule mwaba ewu, kî nkwanji kunenga ntanta to, bwa mukaji wâkasukula makàsà a Yesu awu, mwangate nsuki yende, nudi bamanye’s, ne—ne muàkùpùle naayi. Mêmè kwamba ne: “Mushindu umwepele udi mukaji mwa kwenza ciine aci, nkwi manyina pa mutu bwa kupetaye nsuki bûngî bukumbane bwa kuMusukula ku makàsà, kukupula naayi.” Ncya bushuwa. Kaa, bidi, mbya bundu be bwa kumona mushindu udi. . . Kadi mona, ne kuulu kwa mashika makole eku, wenda utambakana muvwale kankoooci kakese kaa kapeepele mushindu awu, ne mubidi wende mumweneke butaka.

¹²⁷ Mpindyewu udi wamba ne: “Mbwa cinyi bûdi wêwè anu kusuminyinangana ne bakaji?” Bwa nwênù bidi bikengela anu kusuminyinangana neenu.

¹²⁸ Ne nwênù peenu balume badi balekela bakaji beenu benza ciine aci, mwaneetu wa balume, ndi—ndi mupange too ne meeji miine ândi mwa kukwelela’s. Mpindyewu, aci’s ncyà bushuwa.

¹²⁹ Ne nwênù bampaasata, ncyêna ngeela meeji ne nudi mwaba ewu to. Kadi paudi umona muntu awu, s’udi umwambila bwa kulwaye, kumwambila, bwa alwe kumonangana naanyi. Nwamonu anyi? Piikalaye kayi ne kaneemu bwa Kilisto kutamba bya kulekela beena mu disangisha dyende ne ciine aci kabayi banyookiibwa to. . . Mpindyewu yêyè mwine awu. . . Mbafwanyine kwikala bacyenzela mu nyima mwende pambelu pààpa, kadi yêyè kayi ubambilaci to, kî mmwakanyine kwikala musadidi wa Yesu Kilisto to. Ncya bushuwa menemene. Kî mmwakanyine kwikala musadidi wa Kilisto to. Musadidi wa Kilisto bikengela ikale kayi ne bwôwà bwa cintu to piikalabi ne mvita ayi udi uyilwangeena Bible. Cya bushuwa. Kadi ki bôbô abu’s, badi bapatuka bakabyenza anu mwine.

¹³⁰ Nenku pashiishe, katanci aka, byakakengela bwa beena Mishòonyi bacyângatè. Wêwè Méthodiste wa mwimpè, ne wêwè Baptiste, ne wêwè Presbytérien, anyi Nazaréen, Pèlerin de la Sainteté, ne nwênù bônsò, cintu cimwecimwe aci, ncyenze anu cipatuka, kwenzabi maanyi mu nkunde, nkunde mu maanyi. Kadi’s ki bwalu abu: “Mamwëndè wa bandumba.” Dyenu

dingumba ne: “Bu mudibi ne mbabangile bwalu abu ku ciimamwëndè wa bukalenge, mbyenze dishilangana kaayi?” Nwamonu anyi? Bidi byenza dishilangana dinene dya dikema. Kacitu cibangile aku to, ku Ciimamwëndè wa bukalenge *aci*. Ncifwanyine kubangila ku ciimamwëndè wa bukalenge cyenu nwênù pa buloba apa, kadi kî nku Cya kuulu Kwaka to. Mbilondeshile ku mwaba wûdi wêwè mufumine. *Aci ncilelela.*

¹³¹ Mpindyewu, ncyêna ngeela meeji ne tudi ne dîbà dya kwangata bwalu bukwabo ebu to, pàmwăpa bikengela mbushiye bwa mu dinda. Eyo, twangataayi anu ebu budi bwîpi ebu. Tudi, mwaba ewu, ne “dibatiiza dya mu mâyi.” Tudi kabidi ne “didyanjila-kulongolola,” ne, kaa, bintu byâbûngi. Pa nanku twangataayi anu eci, kantu kakese, kîpî kaa “bayiishi bakaji” aka, nenku twangataayi kôkò aka.

¹³² Mpindyewu, mpindyewu, wêwè inăbânzà muyiishi, ncyêna njinga kukutapa ku mwoyi to, kadi ndi njinga kukwambilaku cintu kampanda. Kwênaku ne katupa nansha kakese kaa Mufundu to, nansha kamwe mu Bible. Eyowa’s, ndi mumanye kûdi uya aku, ne nkaadi mumane kupeta meeji ebe ônsò awu, eyo: “Ne bânà beenu baa balume balela ne baa bakaji nebâmbè bîprofeta.” Mpindyewu, piikala mpaasata webe kayi mumanye cidi dînà edi “kwamba bîprofeta” dyumvwija, kî—kî mmumanye cintu to. Kêna ne mudimu wa bushuwa wa kwenza paanyima paa cyambilu apa to, padiye uteeta kukwambila bwa wêwè kwikala muyiishi apu. Wamonu anyi? Bwalu, kakuyi mpatà to, aci ncipiishiibwe kuumukila anu ku Genese too ne ku Bwakabuulwibwa. Lekela mpindyewu nkuleeje eci, wamonu’s.

¹³³ Mpindyewu ndi muswe wêwè umbuulwile mu Timote wa Kumpala 2.11. Buulula wêwè anu kaaba aka nenku netusangane cyôci eci mpindyewu, ne netwangate, apa kabidi, Byenzenedi 2 byebe abi. Eyo. Nenku teejeja anu—anu cyanaana kaaba aka cidi Mufundu ne cya kwamba pa ciine cyena-bwalu eci.

¹³⁴ Mpindyewu, muntu kampanda mmutungunuke anu ne kwamba ne: “Ee, Mwaneetu Branham, cyûdi wêwè utu anu mukinyi wa bânà bakaji wa kwônsò eku.” Mêmè ncitu mukinyi wa bânà bakaji to. Ntu... Cîndi mêmè ncitu muswe bakaji biikale bateeta kwangata kaaba kadi kakayi kaabo to.

Nudi bavuluke ku dilobo dya Howard Shipyard eku, dimwe dya ku malobo adi mende luumu pa Musulu wa Ohio? Bavwa bateekeku mukaji bu kapita. Tangilaayi numone cidi cyenzeke.

Mbape mukaji bukenji bwa disungulangana. Tangilaayi numone cidi cyenzeke.

¹³⁵ Lekelaayi nzwămbilè anu mpindyewu mene. Kî ng’anu bakaji bândi ngeela mfimbu to. Ndi muswe bwa nwênù balume nûmvwè ne nudi peenu mu bwalu ebu. Kadi lekela nkwambileku cintu kampanda, wêwè mwaneetu wa balume. Ditunga edi nditunga dya mwânà mukaji. Nêncijaadikilè kûdi wêwè, ku

Mifundu, ku cyônsò cyûdi muswe bwa nkujaadikileku bwalu abu aci. Neyeci. . . Cidi cimwènekà pa mfranga yetu ncinyi? Muntu mukaji. Yèyè udi usanganyiibwa penyi? Mu Bwakabuulwibwa, mwaba ewu, udi umumona's. Yèyè udi nomba dikumi ne isatu, kabidi, cyônsò cyakabangaye aci; mitooto dikumi ne yisatu, tushoonyi dikumi ne tusatu, matunga dikumi ne asatu àdi ku bukookeshi bwende. Dikumi ne isatu, byônsò's bivwa anu dikumi ne bisatu, twamb'eku twamb'eku. Yèyè udi umwenekela mu nshapita wa 13 wa Bwakabuulwibwa. Muntu mukaji, dikumi ne isatu!

¹³⁶ Ne mu cidimu cya 1933, pavwa Mukalenge. . . Patuvwa twenza masangisha mwaba ewu ùdi ùsanganyiibwa église de Christ mpindyewu awu, nzubu wa kale wa Masonic awu, cikeena-kumona cya kudi Mukalenge cyakalwa kûndi mwaba ewu ne cyakadyanjila kwamba ne "Allemagne neajuuke ne neénzè lumbu lwa Maginot Line kuntu kwaka." Bààbûngi baa kunudi badi bacivuluka. Ne mushindu uvwabo mwa kwikala basanganyiibwa munda mwa lumbu lukole muntwamu, ne muvwa beena Amerike mwa kutuucika bikole kuntwaku mene ku lwine lumbu alu. Ne cyàkamba kabidi bivwa mwa kulwa kwenzeka, ne bivwà bitàngilà Roosevelt ne bintu abi, muvwaye mwa kufila mpala bwa kumusungulabo bwa musangu mwinâyì awu. Bipwangane, anu menemene mushindu wakenzekabi. Ne cyàkamba kabidi ne tushinyi twa tudyendelandela tuvwa tutungunuka ne kwenda kushaala tutambe kufwanangana ne diyi, mu mushindu wa ne mu matuku a ndekeelu tùvwa mwa kwikala anu menemene mu mbungakeenu wa diyi. Nenku ngàkamba ne: "Nebilwe kwenzeka ne tushinyi twine atu kabaakwikala batuludika kudi yendà to. Cintu cya cyanaana ki cìikalà mwa kutuludika." Ntwôtwò tushinyi atu tudibo bapatula mpindyewu mene, biikàle batukontonwena pa bule, bwa dikubiibwa. Anu mu byôbi. Kwakupeta mushindu wa kubwela mu cimenga kampanda. . . Pa nanku, mu mwaba wa kilomeeta makumi asatu ne ibidi, udi mwa kunyeemesha anu kilomeeta makumi asatu ne ibidi. Kwèna mwa kuya kadikuma ku kashinyi kakwabo to, bwalu ntukontonwena pa bule. Nwamonu's, tùdi tùya nanku awu, ne mpindyewu mene. Ki mémè kwamba ne: "Nwavulukaayi ne, mu dituku adi, kumpala kwa cikondo cya nshiikidilu kulwaci, kumpala kwa cikondo cya nshiikidilu kulwaci, muntu mukaji kampanda. . . Mpindyewu, nwênù bônsò fundaayi nulame bwalu ebu. Nekujuuke mukaji munene, wa bukole, wìkala anyi Mfumu wa ditunga, anyi mwena cimbâmbilâ, anyi mukaji wa bukole kampanda mu États-Unis emu. Ne ditunga neditukinë, ku bwenzeji bwa bakaji. Mpindyewu, nuvulukaayi ne, cidi EMU MMUDI MUKALENGE WAMBA." Nwamonu anyi?

¹³⁷ Ne dyôdi didi mu ntupakanyi. Ne mbilongolole njila bwa kufikisha ku cinyi? Lekelaayi nnwâmbilè. Ikalaayi baa nyuma.

Lekelaayi. . . Ikalaayi bakanguke byumvwidi. Tangilaayi. Didi dyenza nanku bwa cinyi? Bwa kupengela ekeleeziya wa Katolike kaaba kaa kubwelelaye. Nwamonu anyi? Nutu nukuukwila bakajaana badi bende luumu baa mu sèndèmâ aba ne bintu bikwabo byònsò bya pambelu apa ebi. Nudi bavuluke diyishi dingàakayiishà anyi? Margie, udi mudivuluke, kukaadi bidimu, pa—pa dibucikila dya États-Unis, bwa kutonkola bukalenge bwa Amerike. Ne mûngàakambà ne yèyè wakajuukila mu Paris paanyima paa twêtù bamane kubasungila kuntwaku ku bwenzeji bwa bakaji, mvinyo ne bisankasanka. Nenu ki yèyè kulwa kwikila anu mu Hollywood mene. Mpindyewu, pamutu paa twêtù kwikala kulombesha myodele ku Paris, bôbò ki bàkaadi bâlombesha muneemu bwa kupeta myodele. Mbyenze cinyi? Bikaadi. . . Twêtù aba katuvwaku baswe bwa kulekela bânà beetu balela bwa kuyabo mu sèndèmâ to, kadi nyawu wabwedi mu television, mutungunuke e kupatuka kadi kutampakajila cintu cyònsò nkòong, kumwela pambelu. Kadi's ki twêtù aba lelu ewu, twânà twa bakaji ne twa balume twònsò, twáfwanyanganyi tònsò anu ne banàyi baa ku television aba. Ncinyi ciine aci? S'nnjila benda bapenga's. Balumyana wa yààyà, mukaji wa masandi umwepele cyanaana's udi mwa kutuma bantu mu iferno bûngì bupite bwa binwinu bya maala a kopya byònsò binudi bafwanyine kuteeka mu cimenga abi. S'ncya bushuwa. Mutangilaayi numone padiye wenda upweka ne mùsèèsù muvuule bilambà byònsò, muntu nansha yèyè bamwamba ne nganyi, yèyè muntu wetu wa mujima ne mubidi tumatuma ewu, padiye anu utangila mukaji awu bu nanku's udi anu ne cya kuumvwa cintu kampanda bu mavwayila amwenza. Mpindyewu kuikala anu ne meeji matooke. Nansha byôbi ne . . .

138 Mêmè ntu mupete Nyuma Mwîmpè kukaadi bidimu. Kwèna mwa kutangila mukaji muvwale mwenze bu udi kayi muvwale. . . Mêmè—mêmè ntu ngenda ne kankuruse kakese mu kashinyi kaanyi, bààbûngì baa kunudi bakaadi bakamonemone. Muntu mukwabo kungambaye ne: “Wèwè utu mwena Katolike anyi?” Beena Katolike kacyakacya bakaadiku benzele disungula dya nkuruse kwèpi? Nkuruse mbwena kwamba ne “Mwena Kilisto.”

139 Tu-Cicilia munsantu twa kale twatwa ne bikwabo abi's mbidi cimanyinu cya bwena Katolike. Twêtù katwena twitabuuja bintakanyi bya mushindu awu abi to. Twêtù tudi twitabuuja Kilisto. Bôbò batu ne bafwe baa mishindu yònsò batubo bakuukwila. S'ki mushindu wa mutambe kutumbuka wa ditendelela dya bakishi. Ki cyònsò cidiku ncyôci aci, dikuukwila dya bafwe. Cintu bu nanku kacituku to, to.

140 Ngâkeela nsaserdose awu lukonko. Mêmè ne: “Kadi mbwa cinyi, piikalabi ne . . . Peetelo ki uwva paapà wa kumpala anyi?”

Yèyè kwamba ne : “Ncya bushuwa nanku.”

141 Mêmè kwamba ne: “Kadi bwa cinyi Peetelo mmwambe ne: ‘Kakwena mutwangaji mukwabo pankaci paa Nzambi ne bantu pa kuumusha Muntu awu Kilisto Yesu?’ Kadi nwênù nudi ne bakaji bafwe binunu bitaanu, ne bikwabo byônsò, nubavwija batwangaji. Mpindyewu cidì cyenzeke ncinyi?” S’ki bwalu mbwôbù abu. Kabatu ne dyandamuna nansha dimwe pa bwalu abu to. Neya bushuwa.

142 Mpindyewu amwe a ku malongesha abo, malongesha abo a mashimi, musumbà mujima wa baprofeta baa beena Mishòònyì mbalwe kadi kubanga kulongesha biine abi, ne nwênù beena Mishòònyì aba’s nudi nubiitabuuja bu ne mbya bushuwa. S’mmwômò menemene. Mangumba ne mishindu ya mabatiiza, ne mêtù matuma mashiileshiilangane ne bikwabo binudi nwenza, bya bwalu kabiyiku bya mu Mifundu to kakuyi mpatà. Yidi yibibenga, mu Mifundu amu, kadi nudi anu nushikula mitu nubiitaba. S’mbulelela’s.

143 Mpindyewu teejeaayaaku eci pa bidi bitangila bayiishi bakaji. Eyo. Timote wa Kumpala, ndi njinga kubala Timote wa Kumpala 2.11. Mpindyewu teejeaayi cidì Mukanda ewu wamba.

Bakaji beenu biikale bayiila bapuwe mu dikookela dyônsò.

Kadi ncyêna ngaanyisha bwa mukaji kulongeshaye, anyi kwangataye bukookeshi kumutu kwa mulume to, kadi bwa kwikalaye mupuwe.

144 Ncyêna mwambule bujitu bwa dicyela muntwamu to. Ndi mêmè mwambule bujitu bwa dinwambila ne cidì muntwamu. Nwamonu anyi? Nwamonu anyi?

Bakaji beenu biikale bayiila bapuwe ne biikale mu dikookela dyônsò. (Bu nwênù mwa kuyaku mu ekeleeziya wa beena Orthodoxe ne kubatangila, nwamonu’s. Nwamonu anyi?)

Kadi ncyêna ngaanyisha bwa mukaji kulongeshaye, anyi bwa kwangataye bukookeshi (kwikala mpaasata, mulami, anyi nì ncinyi cya bu nanku) kumutu kwa mulume to, nwamonu’s, kwangataye bukookeshi kumutu kwa mulume to, kadi bwa kwikalaye mupuwe.

Bwalu Adama ngwâkenjiibwa dyambedi, ne pashiishe Eva.

145 Nuvwa bamanye anyi? Mpindyewu teejeaayi, nwênù bakaji. Nwênù bakaji bîmpè ne beena Kilisto aba, nudi cintu cya citambe bwîmpè civwa Nzambi mwa kupa mulume, bwa patupu nunku Yêyè mmumupe cintu cya mushindu mukwabo. Eyowa’s, mukalenge. Nwamonu anyi? Mukaji kavwa nanshà mu bufuki bwa ku cibangidilu to. Mukaji kî ncintu cifùka kudi Nzambi to. Ncintu cyangata ku mulume. Nzambi uvwa mwenze muntu, mwikale eku mulume eku mukaji. Ki Yêyè kubatapulula. Nenku

paanyima paa muntu mumane kusòmba pa buloba ne mumane kwinyika nyama mênà, ne mumane kusòmba panwapa ntanta mule, ki Yèyè kwangata lubadi mu luseke lwa Adama, bu cintu cyangata ku cikwabo, ne kwenza naaci mukaji. “Adama ki wâkenjiibwa dyambedi, ne pashiishe Eva.” Mpindyewu tangilaayi.

Ne Adama kî ngwâkashimiibwa to, kadi mukaji paakashimiibwaye wakadisangana mu dishipa dya mukenji.

¹⁴⁶ Nzambi kwangata mulume. Dyabulu kwangata mukaji. Tangilaayi bwalu abu, nubutangile buludi mumpala, ne ncinyi cidi cyenza bwalu abu lelu ewu. Tangilaayi Ekeleeziya mulelela wa Nzambi, neâmbè ne: “Yesu!” Mufwilakanyi ne Kilisto neâmbè ne: “Mariya!” Tangilaayi nyuma ayi. Nwamonu anyi? Ki yôyi ayi. “Mwoyi Mariya, maamù wa Mvidi Mukulu, udi mubenesha munkaci mwa bakaji bônso, nenku utulombele twêtù beena mpekaatu, kataataka ne dituku dyetu dya lufu. Amen. Mariya, sambila’s!” Kaa, ekelekele, Nzambi wanyi! Nwamonu’s, ki bwalu mbwòbù abu’s, “mukaji,” muntu wa dyabulu kukwataye nende mudimu. Kilisto, cintu cya dikuukwila, ne anu Yèyè umwepele awu! Ki bwalu mbwòbù abu. Ki bwalu mbwòbù abu.

¹⁴⁷ “Adama ki wâkenjiibwa dyambedi, ne pashiishe Eva.” Adama kî ngwâkashimiibwa to. Kadi mmunyi munudi mwa kwikala ne mpaasata mukaji, mulami mukaji? Adama kî ngwâkashimiibwa to, kadi mukaji ngwâkashimiibwa. Yèyè’s ngwâkashimiibwa, cya bushuwa. . . Kavwa wela meeki ne udi mu ntupakanyi to, kadi uvwamu. “Mukaji paakashimiibwaye wakadisangana mu dishipa dya mukenji.” Bwalu, yèyè, musangu wònsò udibo anu ba—bapweka ne citalu mu müsèesù, mmukaji udi mukabukebe. Musangu wònsò uvwa anu mwànà wa mu diboko wasa mwadi, mmukaji udi mukabukebe. Musangu wònsò uvwa anu muntu ufwa, mmukaji udi mukabukebe. Luvya lwònsò, mmukaji udi mukalukebe. Bintu byònsò, ne lufu, mmukaji udi mukabikebe. Bintu byònsò bidi bibi, mmukaji udi mukabikebe. Kadi pashiishe kumuteeka yèyè bu ne ki mutu wa ekeleeziya, mpaasata, kakaa, misangu mikwabo mwepiskopo. Bundu bwende.

¹⁴⁸ Mpindyewu lekelaayi nubuulwile mu eci, mu mwaba mukwabo ewu, bwa kasunsa kamwe cyanaana. Nwamonu anyi? Mpindyewu tubuululaayi mu Kolinto wa Kumpala 14.32 amu, bwa tumone cidi Pòlò wamba mwaba ewu, nenku pashiishe netuye buludi ku mikwabo myaba, anu mu kasunsa kamwe cyanaana. Nenku katwena baswe kunulama mukùngùlù mutambetambe bule to, mu mushindu wa bafwanyine kucyoka bwa kanuciyi kabidi mwa kwalukila maalaba mu dinda. Eyo. Ndi muswe kubala. Mbanganyi badi biitabuuya ne Pòlò uvwa mulongeshi musonsola? Mpindyewu, vulukaayi ne, Pòlò

nyèyè wâkafùndila kabidi Timote bwalu ebu. Nwamonu anyi? Aci, mpindyewu, Kolinto wa Kumpala 14.32. Mpindyewu tubangilaayi anu mwab'ewu mene, tubangile kubala apa, 14.34, ngeela meeji.

Bakaji beenu biikale bapuwe mu ekeleeziya: . . .

149 Nuumvu cidiye mwambe aci anyi?

Bakaji beenu biikale bapuwe mu ekeleeziya: bwalu kabyena byanyishiibwe bwa bôbò kwakula nansha; kadi mbabatumine dîyî bwa kwikalabo mu dikookela, . . .

150 Nudi ne mêyî a kumpenga kwa dibèji pa cyôcî aci anyi? Panwikala naawu, apingajaayi paanyima numone ní kaena ateala Genese 3.16. Paakambila Nzambi Eva ne, bwalu yèyè wakateeleja nyoka pamutu paa kuteelejaye bayende, mulume uvwa ne cya kwikala ne bukookeshi pa yèyè matuku ende ônsò a mwoyi. Mmunyi mudi muntu mukaji mwa kulwa kadi kwikala ne bukookeshi pa muntu mulume, mwikale mpaasata anyi mulami, padi Bible mwambe ne ikale mu “dikookela,” anu menemene muvwabi ku cibangidilu amu? PavwaYe . . . Nzambi—Nzambi kênàku mwa kushintuluka to. Kanwena mwa kwenza ne Dîyi dyâmbè cintu kampanda *apa* ne cingà cintu *apa* nansha. Kadyena dyamba nanku to. Cidi anu cintu cimwecimwe aci dîbà dyônso.

151 Nenku, ku cibangidilu, nkwôkò aku, kumpala kwa eci kujikaci, bu mêmè mwa kupeta mushindu, ndi muswe kunwolwela bwalu bwa *Dibàkà Nè Difwà Dyà Dibàkà* abu. Ncitu mwanji kucyenza mu ekeleeziya ewu to. Kadi tangilaayi bipungidi bibidi ebi. Ewu wamba ne mukaji udi mwa kusediibwa; mukwabo ne kabeena mwa kuselangana; ne ewu wamba *cikampanda*, *cikansanga*, anyi *cikankenga*. Indilaayi anu ndambu numone cidi Bible wamba, patwafika kwine aku. Nwamonu anyi? Eyo. Mpindyewu tangilaayi mwaba ewu.

Bakaji beenu bashaale bapuwe mu maekleeziya: . . . kabyena byanyishiibwe bwa bôbò kwakula nansha; kadi mbabatumine dîyî bwa kwikalabo mu dikookela, bu mudi kabidi mikenji yamba.

152 Nenku, mu Dipungila Dikulukulu, kabavwa babaanyishila bwa kwakulabo nansha, bwalu Pôlò mmwambe mwaba ewu ne kabavwa babaanyishila to. Ncya bushuwa anyi? “Bakaji beenu bashaale bapuwe. Ndikookela.” Mpindyewu wèwè muswe kutangila mêyî ebe a kumpenga kwa dibèji awu mwaba awu, necikupingaje ku Genese 3.16. Nwamonu anyi? Eyo. “Mwinshi, bu mwinshi mwa mikenji.”

Nenku padibo . . . kuyiila cintu kampanda, baabo ba- . . . bakakonke—bakakonke baabayaabo . . . kwabo kumbelu: bwalu bidi bundu bwa mukaji kwakulaye mu ekeleeziya.

Cinyi? . . .

¹⁵³ Mpindyewu tangilaayi cikonkelu aci mu yònsò wa ku Bibles yenu ayi, pa cyòci aci ne: “Cinyi?” Ncinyi cyakafikisha Pòlò ku dyamba nanku ne ku dyenza mushindu awu? Mpindyewu, bu nwènù anu mwa kwangata mikanda mifundila Pòlò kudi beena Kolinto. Mpindyewu, nudi mwa kuyipeta mu nzubu yònsò naka mwîmpè wa disombeshilangana mikanda ewu, nwamonu’s, yivwà beena Kolinto bafundile Pòlò. Baakafunda bamwambila, paanyima paa bakaji aba bàkaavwà bakudimune mucima aba. . . Bavwa ne—ne nzambi mukaji kuntwaku, bamubiikila ne “Diana.” Nanku ùvwa kabidi nzambi wa Efeso, yèyè awu. Ne beena Kolinto paabo bavwa bakuukwila anu yèyè umwèumwè awu, bwalu civwa ndikuukwila dya bampangaanu. Nanku baakasangana lubwebwe kampanda mu budimi dituku dikwabo, lwikalè ne mmwenekelu wa muntu mukaji. Bòbò kwamba ne: “Nzambi mmuntu mukaji, bwalu nyèyè ewu mutumacishile cimfwanyi cyende.” Ne ntempelo wabo uvwa mulenga wa dikema kutamba ne ntempelo wa Solomo kule ne kule, mudibo bambe, kudi bafundi baa maalu malonda. Kaa, ùvwa anu mabwe a matooke mafinunuke pa òwò, mulaaba ngòlò pambidi; pavwabi ne, ntempelo wa Solomo yèyè uvwa mwenza ne mici ya cèdre, mulaaba ngòlò. Nwamonu anyi? Kadi ùvwa mumutambe kule ne kule. Nanku ciine aci, mwaba awu, piikalabi ne Nzambi uvwa muntu mu—mukaji, mona’s, cya bushuwa, s’ùvwa mwa kwikalà ne baakwidi biikalè bantu bakaji. Neya bushuwa, piikalabi ne Nzambi mmuntu mukaji, nanku’s muiyishi mukaji mmubinge. Kadi, Nzambi m’Mulume. Bible mmwanbe ne Yèyè m’Mulume, ne Yèyè mwine m’Mulume. Nwamonu anyi? Nanku piikalabi ne Nzambi m’Mulume, nanku’s bikengela ciikalè bantu balume.

Mpindyewu tangilaayi mwaba ewu ne: “Cinyi?”

¹⁵⁴ Mpindyewu, bamwe baa ku baakwidi bakaji abu, paakakudimunabo mucima kuumuka ku bumpangaanu kuya ku bwena Kilisto, baakeela meeji ne bavwa mwa kushaala anu balame mudimu wabo wa buyiishi awu, cibi biikalè anu buumuke eku baye eku. Piikalabi ne bavwa bayiisha Diana kwaka, padibo balwa kuneeku badi bayiisha Kilisto.

¹⁵⁵ Ki yèyè ne: “Cinyi? Dîyi dya Nzambi dyakapatukila . . .” Anji teejejaayi anu Eci. Mwaneetu, mmunyi mudi bambi mwa kwenza ciine aci’s? Mvensa wa 36.

Cinyi? Dîyi dya Nzambi dyakapatukila kunudi nwènù anyi? anyi dyakalwa anu kunudi nwènù nkaayeenu?

Muntu nî nganyi nî nganyi yèyè wela meeji yèyè mwine ne mmuprofeta, anyi ne ngwa nyuma (kabyena nansha bikengela kwikalaye muprofeta to; anu muntu udi ne ngeelelu wa meeji wetu wa nyuma ewu), itabe

ne bintu bîndi mêmè nnufundila ebi mmèyì matuma a Mukalenge. (Nudi nwitabuuja nanku anyi?)

Kadi piikalabi ne yèyè awu, piikalabi ne muntu mmmupangi, ikale yèyè anu mupangi.

¹⁵⁶ Mpindyewu, awu's mmushindu mupeepele anu peepelee wûndîku mêmè mumanye wa kucyumvwija. Nwamonu anyi? Mmwambe ne: "Muntu yèyè mwikale muntu wa nyuma, anyi muprofeta, neitabe ne bîndi mêmè mfunda mwaba ewu ebi m'Mèyì matuma a Mukalenge." Kadi yèyè kwanba ne: "Piikalabi ne yèyè—piikalabi ne yèyè awu neikale mupangi, ikale mene anu mupangi nanku." Nwamonu anyi? Ki cintu cimwepele cinudi mwa kwenza. Padibo baswe kutungunuka too ne ku cyôci aci, bikengela anu kubalekela baye, bwalu yèyè wàkacimòna cìbanga kuntwaku.

¹⁵⁷ Nenku mukaji mukwabo wakangambila, wamba ne: "Kaa, Pòlò uvwa anu mukinyi wa bânà bakaji wa kwine kwònsò aku."

¹⁵⁸ Kawwaku mukinyi wa bânà bakaji to. Nudi bamanye's, Pòlò uvwa mupostolo, wa Ekeleeziya wa baa Bisamba bya bende. Tangilaayi kuneeku. Nuvwaku bamanye ne yèyè Pòlò awu. . . Mbanganyi badi biitabuuja ne ki civwa Pòlò muyiishe? Ki—ki cyakambaye apa nenku anyi? Ki Pòlò kwambaye ne. . .

¹⁵⁹ Wèwè udi wamba ne: "Ee, anji indila kakese mpindyewu, Mwaneetu Branham. Indila kakese! Mpindyewu, mwepiskopo wetu twètù's udi wamba ne bidi anu bîmpè. Mutangidi mukulu, wa Assemblées, s'udi wamba ne bidi anu bîmpè. Mwepiskopo wa ba-Unitaires s'udi wamba ne bidi anu bîmpè."

¹⁶⁰ Cidi bôbò abu bamba nansha ciikàle cinyi. Ncya mafi! Ne mêmè's nkaavwa mumane kunwambila ne netupoopele cintu eci bikole. Nenku baprofeta ba mashimi mbavwa bafwanyine kwamba nanku. Bwalu Bible mmwambe ne: "Muntu nî nganyi nî nganyi yèyè udelelela meeji ne ngwa nyuma, anyi ne mmuprofeta, itabe ne bîndi mêmè ngamba ebi m'Mèyì matuma a Mukalenge." Ne piikalà nyuma wende kayi ufidila Dìyì adi bujaadiki to, mmuprofeta wa mashimi, twamb'eku twamb'eku. Mbipiciibwe ne mêmè mwikale mukinyi wa bakaji pamutu paa kwikala munangi wa bakaji, bwa kwanyisha cintu bu nanku, kwitaba cintu cya bu nanku mu Ekeleeziya wa Nzambi, cibengangane ne mikenji ya Nzambi. Nenku Pòlò wakamba ne. . . Angataayi Galatiya 1.8. Pòlò mmwambe ne: "Mwanjelo ufumina mu Dyulu yèyè muyiishe evanjeeliyo mukwabo nansha wa bishi mushiilangane ne ûndi mêmè munuyiishe ewu, ediibwe mulawu." Mpindyewu ciwenza bwa Aci ncinyi?

¹⁶¹ Mpindyewu wèwè udi wamba ne: "Kadi mwaba udiCi cyambe ne: 'Bânà beenu balela balume ne bakaji nebâmbè biprofeta' awu, mu Yowela, ne—ne mwaba wakateela Peetelo Dituku dya Mpenta awu?" Aci's ncya bushuwa menemene.

162 Nutu bamanyeku ne, mu Dipungila Dikulukulu, mushindu umwepele, ne mushindu umwepele mpindyewu, ùdi muntu yònsò ewu mwa kubwela mu cipungidi, kupicilaku, kudi . . . Abraham, yèyè uwwabo bape mulayi awu, ne ci—citampi cya mulayi civwa nditengudiibwa. Mbanganyi badi bamanye nanku? Aci civwa n’Nzambi mwikale ushindika.

163 Byenze bu mwaneetu kampanda wa ba-Baptistes, uvwa wamba ne: “Mwaneetu Branham, mona’s, twètù ba-Baptistes aba’s tutu bapete Nyuma Mwîmpè.”

Mêmè kwamba ne: “NwâkaMupeta dibà kaayi?”

Yèyè kwamba ne: “Dibà ditwakiitabuuja adi.”

164 Mêmè ne: “Pòlò wakamba ne: ‘Nukaadi bapete Nyuma Mwîmpè kacya nwîtabuuja anyi?’” Nwamonu anyi? Mêmè ne: “Mpindyewu, nwènù ba-Baptistes lwâyi nwangate ndambu wa Cyôci aci, nenku netuyiikile neenu pa dikubiibwa kampanda dya Cyendelele.” Mêmè ne: “Kadi, ee, nutu nuMupetela mushindu awu penyì?” Nwamonu anyi?

165 Yèyè wakamba ne: “Nukaadi baMupete *kacya* nwîtabuuja anyi?” Bavwa beena kwitabuuja, biikàle ne mbila ne disanka ne bikwabo byònsò. Kabavwa banji kupeta Nyuma Mwîmpè to. Pòlò ngudi mwambe ne kabavwa banji kuMupeta. Nwamonu anyi? “Nukaadi bapete Nyuma Mwîmpè kacya nwîtabuuja anyi?”

Bòbò kwamba ne: “Katwena bamanye ne Nyuma Mwîmpè udiku to.”

Yèyè ne: “Nenku nwâkabàtijiibwa mushindu kaayi?”

166 Bòbò kwamba ne: “S’tukaadi babatijiibwe.” Kadi, bibi’s, nwamonu’s. Pa nanku byakakengela kubatijiibwaye, cyakabidi. Eyo.

167 Mpindyewu monaayi eci mpindyewu ne, bayiishi bakaji aba, paakabwelabo, bavwa badyambidila ne nebangate anu bukookeshi bwabo abu. Kadi kakuyi mpatà to kabyena byanyishiibwe kudi Nzambi bwa kwenza nanku to. Nenku . . . anu bu mutucidi pa ciine cyena bwalu eci, bakaji aba, nwamonu’s. Nenku aci, mpindyewu, yèyè kwamba ne: “Piikalaku muntu kampanda munkaci mwenu, mwikàle wa nyuma, anyi muprofeta, itabe ne bìndì mêmè mfunda ebi m’Mèyì matuma a Mukalenge. Kadi piikalaye mupangi, ikale mene anu mupangi.” Nenku ki bwa cinyi . . . tabernacle ewu kèna utwala anyi ujidila bayiishi bakaji, balami bakaji, anyi nì ncinyi nì ncinyi cya mukaji kwenzaye bu mudimu wa mu ekeleeziya emu to, mbwalu Mufundu ewu mmwadija apa ne mmutookesha tòò.

168 Mpindyewu, Bible mmwambe cya bushuwa ne: “Bànà beenu balela balume ne bakaji nebâmbè biprofeta.” Mpindyewu, mwaku ewu *kwamba biprofeta* udi uswa kwamba cinyi? Ukebaayi. Mmumwe ne “kwamba bwalu kampanda, ku

disonsodiibwa,” anyi “kudyanjila kwamba bwalu kampanda.” Mmwaku mwikale ne bitupa bibidi.

¹⁶⁹ Anu bu mudi *kujidila* umvwija ne kwikala “musukula, ne muteeka ku luseke bwa mudimu.” Nwamonu anyi? Anyi, mmwaku mwikale ne bitupa bibidi, umvwija bintu bipite pa cimwe, anu mutudi naayi bûngî cyanaana mu Anglais mwaba ewu.

¹⁷⁰ Bu mudi, tudi bafwanyine kwamba bwa mwaku ewu wa mu Anglais “board.” Ee, *board* mmufwanyine kuumvwija cinyi? Nutu nwamba ne: “Ee, yêyê’s udi uswa kwamba ne mmufute *mfranga ya byakudya* byende.” “To, kî ng’aci to. Ûvwa uswa kwamba ne *mmutubule* disoso.” “To, kî ng’aci to. Ûvwa uswa kwamba ne *mmumusuuye*.” Anyi, nudi numona’s, mmwaku paa-wu nanku, bikengela umanye cyûdi wamba aci ne ncinyi. Nwamonu anyi?

¹⁷¹ Nenku ki mudibi bwa mwaku ewu udi ne bitupa bibidi, wa ne: “Bânà beenu balela balume ne bakaji nebâmbè biprofeta.” Mpindyewu, mushindu umwepele udi Nzambi . . .

¹⁷² Baptiste ewu kwambaye ne: “Ee, twêtù’s tudi bapete Nyuma Mwîmpè.” Mêmè ne . . . “Patwakiitabuuja.” Mêmè kwamba ne . . . Mpindyewu, monaayi, yêyê ne: “Nzambi wakapa Abraham . . .” Yêyê ne: “Abraham wakiitabuuja Nzambi.” Ki mushindu wâkacyâmbâye. Yêyê ne: “Abraham wakiitabuuja Nzambi ne baakamubadilaci bu bwakane.” Mbanganyi badi bamanye ne aci ncyâ bushuwa? Mpindyewu tangilaayi numone mudi—mudi Sataana mwa kucyela mwaneetu pambidi mu màyelè anu bipeepele ebi. Nwamonu’s, anu bipeepele nunku ewu. Mpindyewu, aci’s m’Mufundu.

¹⁷³ Mwaneetu, nyawu nkwambila, bwa ku cyambilu eku, bikengela wikale mulaabiibwe bwa kubwela mwaba ewu. Bivwa bikengela wêwè kubwela mu mwaba musokome ne usambile. Bantu batu bamba ne: “Bwa cinyi wêwè kûtukù upatuka ukamona bantu?” Mwaneetu, pawikala uya bwa kwakala ne bantu anyi kubalongesha, bikengela ushaale paa nkaayeebe, wêwè ne Nzambi, bwa ndambu wa dîbâ, kumpala kwa kubânda mu cyambilu amu. Ncyâ bushuwa, wamonu’s, bwalu Sataana mmudimuke, mudimuke wa dikema.

¹⁷⁴ Kwambaye mpindyewu, monaayi, yêyê ne: “Abraham wakiitabuuja Nzambi, ne baakamubadilaci bu bwakane.” Aci’s ncyâ bushuwa. Yêyê ne: “Mpindyewu, ncinyi cikwabo civwa Abraham mwa kwenza pa kuumusha kwitabuuja?”

Mêmè ne: “S’ki cyônsò civwaye mwa kwenza.”

¹⁷⁵ Yêyê ne: “Ncinyi cikwabo cyûdi wêwè ewu mwa kwenza anyi cidî muntu mukwabo kana yônsò ewu mwa kwenza pa kuumusha kwitabuuja?”

176 Mémè ne: “Ki cyònsò citudi mwa kwenza. Kadi tangila, mwaneetu, pashiishe’s Nzambi wakatwangaja, anyi wakiitaba diitabuuja dya Abraham. Wakamupa citampi, cimanyinu cya ditengula, bu citampi cya cipungidi. Wamonu anyi? Wàkamupà. Wàkamba ne: ‘Mpindyewu, Abraham, Mémè nêngiitabè diitabuuja dyebe adi, pa nanku Nènkupè cimanyinu cya ne ngaakwitabi mpindyewu.’”

177 Ki Yèyè kutengula Abraham, nenku ki cyòci aci civwà citampi cya cipungidi. Kadi mpindyewu mu dituku edi... Mpindyewu, muntu mukaji kavwa mwa kwikala mu aci cipungidi to; amba anu mukaji musediibwe. Jandulaayi, kabavwa mwa kutengula muntu mukaji to; pa nanku, bivwa bikengela bôbò kubwelamu, nenku yèyè ne bayende badi muntu umwe. Kabacyena kabidi babidi to; bakaadi muntu umwe. Mbanganyi badi bamanye aci? Mufundu ngudi wamba nanku. Nenku, bu mudiye musediibwe, nenku udi—udi ushaala umwe. Nenku tungunukaayi kwinshi eku nutangile mu Timote emu, mbambe cintu cimwecimwe aci, ne: “Nansha nanku yèyè neasungidiibwe mu kulela kwa bânà, piikalaye munanukile mu diitabuuja ne mu cijila ne dicincika dya maalu.”

178 Mpindyewu, kadi, pashiishe, ditengula dya mu Dipungila Dikulukulu divwa dya mu mubidi, kadi mu Dipungila Dipyadipya, Yowela mmwambe ne: “Nèmpongolòlè Nyuma Wanyi pa musunya wònsò, ne bânà beenu balela balume ne bakaji nebâmbè biprofeta.” Mpindyewu, mwaku ewu *kwamba biprofeta* kawena umvwija ne nkulongesha to. *Kwamba biprofeta* kudi kuumvwija anyi “kulondelangana dilabula, ku disonsodiibwa,” anyi “kudyanjila kwamba bwalu budi pabwipi ne kwenzeka.” Ne twètù’s tudi bamanye ne kuvwa baprofeta bakaji mu Dipungila Dikulukulu. Kabavwaku mwa kwakwila mu citanda amu, kwakwila mu ekeleeziya, mu disangisha, bu mulongeshi to. Kadi yèyè, Anna, ne bàâbûngi baa kudibo mu ntempelu amu, s’bavwa baprofeta bakaji, ne bavwa... Miliyama uvwa muprofeta mukaji, anyi cintu bu nanku. Ûvwa ne Nyuma pambidi pende, aci ncilelela, kadi ùvwa ne mikalu mu kende kaaba. Bantu bakaji badi mwa kwikala baprofeta bakaji leelu ewu, kakuyi mpatà to; kadi kabayi balongeshi, ne bikwabo, mu cyambilu emu to. Panudi nucyenza, nudi—nudi nufikisha Bible ku dyamba Yèyè mwine maalu abengangana. Bible kèna mwa kwamba cintu cimwe *apa*, ne cintu cya cyanaana *apa* to. Ûdi ne cya kwamba cintu cimwecimwe aci dîbà dyònsò bwa cyanaana Yèyè kî n’Diyi dya Nzambi to. Nwamonu anyi? Pa nanku: “Bânà beenu balela balume ne bakaji nebâmbè biprofeta,” mbwena kwamba ne anyi “nebâmbè maalu àcìvwavwà” anyi “nebafile majaaniki.” Mpindyewu, kebululaayi cintu aci, nwangate nkonga-myaku wa Bible bwa kumona aci ní kî ncyà bushuwa. “Bânà beenu balela balume ne bakaji nebâmbè biprofeta.”

179 Mpindyewu, Bible udi kabidi wakula bwa mukaji uvwa udyamba, mushindu awu, anyi ulaka mukana muvwaye... Eci ncifwanyine kutangila ne ekeleeziya wa Katolike, ne kabidi cifwanyine kutangila... ne cyena-bwalu citwikala mwa kwamba mpindyewu eci. Tubuululaayi mu Mukanda wa—wa Bwakabuulwibwa, nenku twangataayi nsha—nshapita mwi2 ku mvensa wa 20, anu patucidi kiine kaaba aka pabwipi naaci apa, bwa nwâpeta mwa kumona anu mushindu udi cintu aci mwa kwikala cya dyabulu, cya dyamba mu matuku a ndekeelu aa bîikalà mwa kwenzeka, mushindu udi bôbò aba... civwa mukaji ewu mwa kwikala. Vulukaayi ne, ekeleeziya wa Katolike mmukaji. Twafumu ku dicibala, kî mmwômò anyi? Teelejaayi eci mpindyewu, mudiCi cyamba. Bwakabuulwibwa 2.20: “Nansha nanku mpindyewu...” Ûdi wambila ekeleeziya wa Twatila ewu, nwamonu’s: “Nansha nanku mpindyewu...” Yêyê nguvwa ekeleeziya wa munkacinkaci mwamwa, mupicile mu Bikondo bya Mîdimà.

Nansha nanku mpindyewu ndi ne ndambu wa maalu ândi mbengangana neebe, bwalu udi witabila mukaji awu Izabela, udi udibiikila yêyê muwine ne mmuprofeza mukaji awu, bwa kulongeshaye ne... kukookesha ku bukole basadidi baanyi ne bwa kwendabo masandi, ne bwa kudiyabo bintu bilambula mpingu. (Nwamonu anyi?)

180 Mpindyewu, bu ne nwênù aba nudiku mwa kumona, tangilaayi bikondo bya ekeleeziya ebi, pashiishe netwimanyike. Pashiishe mu dinda netwangate bikwabo bintu ebi. Tangilaayi. Mu... Mwinshi mwa biteekedi bya myëndù bya—bya ngôlò bya mu tabernacle wa beena Yuda awu, lwà munda amu, mùvwà mampà a baakwidi ne bikwabo amu, muvwa biteekedi bya myëndù bya ngôlò mwandamutekete. Nwênù bônso nudi bamanye aci. Nwamonu anyi? Kudi bikondo mwandamutekete bya ekeleeziya. Aci cididi cyakula bwa bikondo mwandamutekete bya ekeleeziya, bukênkè kampanda. Mpindyewu bu nwênù mwa kumona mu Bwakabuulwibwa 1, tudi tusangana Yesu mwimane mu bikondo mwandamutekete bya ekeleeziya, biteekedi bya myëndù bya ngôlò mwandamutekete, paakakudimukaye e kumonaye Kampanda mufwanangane ne Mwânà wa muntu, mwimane, muvwale mushindu uvwabi awu. Ûvwa m’Mukajimusela mwimane munkaci mwa biteekedi bya myëndù, muzòla.

181 Mpindyewu, Dipungila Dikulukulu, bôbò bavwa mwa kwangata... kandeyi kamwe aka, kukateemesha, kwangata kandeyi kakwabo kukateemeshila ku kôkò aku, kutemeeshila ku kôkò aku, aka ku kakwabo, mushindu awu, too ne pavwabo bateemesha tundeyi twônso mwandamutekete.

182 Bu nwênù mwa kumona, ku cibangidilu, paakabanga Nzambi kukwata mudimu ne beena Yuda, baakapicila mu cikondo cya ngôlò. Ne pashiishe cikondo cya mîdimà mikole cya dikwata mudimu ne beena Yuda, cyâkapetâ Nzambi ne mwena

Yuda, cyakadi mmu bukookeshi bwa Aakaba. Nenku bu nwènù mwa kumona, mu kubala kwa bikondo bya ekeleeziya abi, Yèyè udi ukupinganyina anu cyakabidi. Mpindyewu, kwambaYe ne: “Kacya kwikala ndambu wa bintu,” wamba ne. . . Mpindyewu, anu mu Cikondo cya Mìdimà aci, cya bidimu cinunu ne nkama yitaanu aci, anyi mu cikondo cya Aakaba, dyambedi, ne beena Yuda. Cikondo cya mìdimà mitambe bukole cyakapetabo, pààkalwà Aakaba kusela Izabela ne kubweja dikuukwila dya mpingu mu Izaleela, ne kufikishaye bantu bônso ku dikuukwila dya benda balonda Aakaba. . . balonda nzambi wa Izabela. Nudi bavuluke ne, baakangata, baakakuna tusumbu twa mici ya diikishila, ne baakuupula byoshelu bya Nzambi. Ki Elisha kwela lubila lukole ne, yèyè ki uvwa “umwepele,” kadi Nzambi uvwa naabo nkama mwandamutekete bavwa kacya kabayiku banji kutwila nzambi ya ba-Baals cinù to. Nudi bavuluke aci anyi? Ki cimfwanyi cya Ekeleeziya musungula udi upatuka awu. Nudi numona mwaba awu anyi? Nudi numona mudi maalu anyi?

¹⁸³ Mpindyewu, mu ekeleeziya ewu, bu nwènù mwa kumona ekeleeziya wa kumpala, ekeleeziya wa kumpala, ekeleeziya wa Efeso, uvwa ekeleeziya munene. Yèyè wakamba ne: “Ucidiku ne bukènkè, ndambu.” Nenku bu nwènù mwa kumona, ekeleeziya ne ekeleeziya yônso, buvwa bubange kubwicedila, kubwicedila, kubwicedila, too ne paakafikabi ku Twatila. Pashiishe, bidimu cinunu ne nkama yitaanu abi. Pashiishe kupatukilabu ku luseke lukwabo ne: “Kadi udi ne kaabukènkè anu kakesee. Kolesha cyùdi naaci aci, bwa citeekedi cyebe cya mwëndù kacilu kuumushiihwa.” Nenku kutungunukabu ne kupweka too ne ku cikondo cya ekeleeziya wa Filadelefiya, ne pashiishe kubwelabu mu cikondo cya ekeleeziya wa Laodikiya.

¹⁸⁴ Mpindyewu, ki pa bulenga bwa kwisù mpôpò apa. Kaa, ekelekele! Mémè’s ndi munange eci, Mwaneetu Smith. Nwamonu’s, tangilaayi eci. Mpindyewu, mu eci cikondo cya ekeleeziya, bu mutwalondeshi. . . Mpindyewu tangilaayi eci. Cikondo cya kumpala cya ekeleeziya civwa Efeso, cikondo cya ekeleeziya wa Efeso. Mpindyewu, cyônso cya ku bikondo bya ekeleeziya abi, too ne padibi bikafika ku bidimu cinunu ne nkama yitaanu ebi, bu nwènù mwa kumona. . . Nwacibalaayi mpindyewu panwikala baalukile mu mèènù diloolo edi, panwikala ne dîbà, anyi mu dindadinda, kumpala kwa nwènù kulwa mu ekeleeziya, mu nshapita 1, mwi2, ne mwi3 ya Bwakabuulwibwa. Nenulwe kujandula ne, mu cyônso cya ku bikondo bya ekeleeziya abi, Yèyè mmwambe ne: “Udi ne kaabukole kakese, kadi kwèna muvile Dîna Dyanyi to,” too ne mwaluYe kufika ku bidimu cinunu ne nkama yitaanu bya Twatila ebi, Cikondo cya Mìdimà. Pashiishe Yèyè kupatukila luseke lukwabo, wamba ne:

. . . udi ne *dîna dya* ne udi ne mwoyi, kadi udi *mufwe*.

¹⁸⁵ Nenku ebi, nansha cimwe cya ku bikwabo bikondo bya ekeleeziya ebi, nî ncyôci aci nî ncikondo cya ekeleeziya wa Filadelefiya, kabaakangataku kabidi Dîna adi to. Kabaakapeta kabidi Dîna adi to, bwalu dyakajimina mu cikondo ciine eci. Mpindyewu, kaa, mushindu mwine's utudi bafwanyine kwomekela bwalu abu ku malongesha a mashimi awu mpindyewu, anu mwômò amu, bwa kunuleeja ne yêyê awu mmaamù, ekeleeziya wa Katolike awu, mamwëndè wa byônsò abi, mushindu udiye “maamù, bwalu busokoka, Baabulona.” Nenku mbwena kwamba ne, tangilaayi, cikondo cya ekeleeziya eci paakatukaye, uvwa ne kaabukênkè kakese, pashiishe ki kubangabu bwenda bubwucidila, bubwucidila, ki pashiishe kubwelaye mu bulongodi lwà kuneeku eku, bidimu ebi cinunu ne nkama yitaanu. Ki kupatukaye mpindyewu, kayi bu Ekeleeziya wa Mukalenge Yesu Kilisto to, kadi bu ekeleeziya wa Katolike. Luther wakapatuka bu ne ncinyi? Bu ekeleeziya wa ba-Luthériens. Ba-Baptistes baakatuka bu ne ncinyi? Bu ekeleeziya wa ba-Baptistes. Kaciyi Dîna Dyende to, kaciyi Dîna Dyende to; dîna dya cyanaana, “udi ne dîna kampanda.” “Bwalu kakwena dîngà dîna difidiibwe mwinshi mwa Dyulu munudi mwa kusungidiibwa to, anu Dîna dya Yesu Kilisto.” “Udi ne dîna dya ne udi ne mwoyi, kadi udi mufwe,” aci ncilamate ku dingumba adi.

¹⁸⁶ “Kaa, mêmè's ndi Presbytérien,” kadi udi mufwe! “Kaa, mêmè's ndi Baptiste,” kadi udi mufwe! Udi ne mwoyi anu paudi ulwa ne mwoyi mu Kilisto Yesu. Ncya bushuwa. Mabatiiza enu a mafi awu, a mâyi, dibatiiza dya mafi; dimyaminangana dya mâyi, dipongolwelangana, pamutu paa diinyijangana; biikàle nwenza mudimu ne “Taatu, Mwânà, ne Nyuma Mwîmpè,” pamutu paa Dîna dya Mukalenge Yesu Kilisto. Bintu byônsò bya mafi abi biikale benda babisambulujilangana, Bible pende wakula, byenze bu udi upongolwelamu ne bukole bwônsò. Nenku ki twêtù aba twitaba biine abi pamwe naabo ne: “Ee, wanyi ekeleeziya utu yêyê uCiitabuuja mushindu ewu.” Kadi's Bible udi wamba *Eci*. Nwamonu anyi? Kî mbintu bya mushindu awu to. Cintu cya bu nanku kacituku to.

¹⁸⁷ Kacyakacya kakwenaku mwaba nansha umwe mu Bible ukaadiku muntu mupatule ludimi mwangate Ukaristia munsantu, nsaserdose ubikula mvinyo kadi kubiikila ciine aci ne n'Nyuma Mwîmpè to. Kacyakacya mu Bible kabatuku balabulangane ku cyanza beelangane mwoyi wa ku cyanza wa buunyaana, kadi kubiikila ciine aci ne n'Nyuma Mwîmpè to. Kacya ne kacya muntu kâtukù mujuuke kuulu kwamba ne, “Mpindyewu ndi mwena kwitabuuja,” kadi kupeta Nyuma Mwîmpè to. Bu biikalakù byenzeke, Byenzedi 2 mmufwanyine kubadiibwa mushindu ewu: “Nenku paakamana Dituku dya Mpenta kukumbana patapata, nsaserdose wa beena Loomo wakalwa wenda upweka ne müsèèsù, mwikale ne muteelu

wa nshingu wa nkoolò. Kuseemenaye, kwamba ne: ‘Nwênù bônso patulaayi ndimi yenu mpindyewu nutambule Ukaristia munsantu, koomunyo wa kumpala.’” Aci kî ncifwanyineku kwikala mushindu kampanda wa kubala Byenzenedi 2 anyi?

¹⁸⁸ Ee, nwênù beena Mishòònyì’s nudi peenu anu babi. Nudi nwalukila kwaka nwamba ne: “Mpindyewu netulwe kunudi nwênù ba-Méthodistes; nubapicishe ku dyabalume, anyi, nûbèlè mwoyi wa ku cyanza wa buunyaana, nubape ngondo yisambombo ya kubashiya mu diteeta.” Nudi nubala ciine aci penyi mu Byenzenedi 2? Nwamonu anyi? Nudi nupetela ciine aci penyi? Nwamonu anyi?

¹⁸⁹ Mmbambemu ne: “Pavwabo bônso mu mwaba umwe, ne dîyi dimwe!” Kakwakalwa mwepiskopo wâkenza *cikampanda*, ne kakwakalwaku nsaserdose wâkenza *cikansanga* to. “Kadi kwakalwa mutooyi ufumina mu Dyulu mwenze bu cipeepele cikole cya civuma, ne Cyakuuja nzubu mujima muvwabo basòmbe amu tente.” Mushindu wakaMupetabo ngwôwò awu, eyowa’s, mukalenge, mwenze bu cipeepele cikole cya civuma cifumina mu Butumbi. Kî ncyà cyenda cibànda ne cibeeba anyi cya cifumina mu dingumba kampanda nansha.

. . . udi ne *dîna dya ne* udi ne mwoyi, kadi udi *mufwe*.

¹⁹⁰ Nudi numona’s, twitabaayi yenu ne mangumba awu mbidi bijikile Nzambi njila mushindu awu, biye too ne ku ne: “Twêtù tudi twitabuuja *cikampanda*, ne tudi twitabuuja ne matuku a bishima akaadi mamane kupita.” Muprofeta wa mashimi ngudi wamba nanku awu. Muprofeta wa mashimi ngudi ukwambila, ne: “Udi mwa kulabulangana ku cyanza bwa kupeta Nyuma Mwîmpè.” Muprofeta wa mashimi ngudi ukwambila ne: “Udi upeta Nyuma Mwîmpè paudi witabuuja.” Muprofeta wa mashimi ngudi ukwambila ne: “Bivwa bikengela bwa kukupongolwelabo ne kukumyaminabo mâyi mu mutu pamutu paa kukubatiiza.” Muprofeta wa mashimi ngudi ukwambila bwa wêwè “kubatiijiibwa mu dîna dya Taatù, Mwânà, ne Nyuma Mwîmpè” awu, padiku kakuyi Mufundu nansha umwe mu Bible bwa ciine aci. Ncyà bushuwa. Kakwena Mufundu nansha umwe mu Bible udi ukwambila bwa wêwè kubatiijiibwa, mùvwàku muntu mubatiijiibwe nanku to, mmubatiijiibwe anu mu Dîna dya Yesu Kilisto. Pa kuumusha anu, bwa bayiidi baa Yone’s; kadi biine abu’s byakakengela bwa kulwa, kubatiijiibwabo cyakabidi, mu Dîna dya Mukalenge Yesu Kilisto, bwa kupetabo Nyuma Mwîmpè. Aci’s ncyà bushuwa. Mpindyewu, aci kî ndilongesha dya beena Yesu Nkaayende to. Mémè ntu mumanye dilongesha dya beena Yesu Nkaayende. Kî ndyòdì adi to. Adi didi anu Dilongesha dya Bible dyetu edi. S’ncyà bushuwa.

¹⁹¹ Kadi’s ki bwalu mbwòbù abu. Nudi nwenza naabu cinyi bwine abu? S’ki mamwênù nyèyè awu. S’ki yèyè awu mamwéndè wa twitabaayi ayi.

¹⁹² Mpindyewu, pingajaayaakubi mèsù paanyima mu Bible nundeeje mwaba ukaadiku muntu bamumyamine mâyi pa mutu. Nwênù ba-Méthodistes, ba-Presbytériens, beena Katolike, ngambilaayaaku mwaba ukaadiku muntu bamumyamine mâyi pa mutu, mu Bible. Ngambilaayaaku mwaba ukaadiku muntu bamupongolwele mâyi pa mutu, mu Bible, bwa dilekelediibwa dya mpekaatu. Unteelaayaaku. Nudiku mwa kuwupeta anyi? Panwikala mwa kuwupeta, nulwe kûndi, nenku nêmpwekè mu mùsèèsù emu ne cimanyinu cindamika paanyima apa, ne: “Muprofeta wa mashimi! Ndi mutupakane.” Anyi, nupetaayi mwaba nansha umwe cyanaana mu Bible mujima ukaadiku muntu mubatiijiibwe mu dîna dya Taatù, Mwânà, ne Nyuma Mwîmpè, mushindu udi bya pa lukama makumi mwandamukulu bya baa kunudi babatiijiibwe awu. Numpetelaayi Mufundu umwepele cyanaana ukaadiku muntu mubatiijiibwe mushindu awu, nenku nêndamikè cimanyinu paanyima paanyi apa ne, “muprofeta wa mashimi,” ne nya ngenda mpweka naaci mu cibeeba mushindu *ewu*. Nenku nundeejaayi mwaba ukaadiku muntu mubatiijiibwe, mu Ekeleeziya mupyamupya, uvwa kayi mwenzejiibwe bwa kwalukila bwa kubatiijiibwaye cyakabidi, mu. . . kacyi mu dîna dya “Yesu” nkaayaadi to, kadi mu Dîna dya Mukalenge wetu Yesu Kilisto. S’ ncyà bushuwa. Tangilaayi numone ní kî ncyà bushuwa.

¹⁹³ Nenku, mwaba ewu, cidi ncinyi? Yèyè uvwa mamwèndè wa bandumba. Cyàkamuvwijà ndumba ncinyi? Cyàkamuvwijà mukaji wa masandi ncinyi? S’ndilongesha dyende diine adi’s! Cyàkabàvwijà bandumba ncinyi? S’ndilongesha dyende yèyè adi!

¹⁹⁴ Nenku ki bwa cinyi twètù katwena tutwala mangumba abo ne twitabaayi yabo ayi to. Tudi twètù tushaala bakezuke ne Bible ewu. Ncyèna mumanye ne mmushindu kaayi mwîmpè ùdi nsòmbelu ùdi nende ùMutèèka mu cyenzedi to, kadi Yèyè ngunudi balongeshiibwe, nansha nanku. Cya bushuwa. Aci ncikutangile anu wèwè. Kî mmémè udi mwa kukwenzeja bwa kwikala ne nsòmbelu wa ku Yèyè to. Cîndi mèmè mwa kukwambila cidi anu ne Bulelela ncinyi. Ki bwa cinyi twètù katwena dingumba to. Ncyênàku mufwanyine—mufwanyine kwanyisha bwa twètù kudikooyisha mu kubwela kwa mu cintakanyi cya mushindu awu to, bwa kwikala ne cya kushikula mutu ku mushindu kampanda wa dîyi diswika. Abi’s mbipiciibwe ne mèmè musungule bwa kwenda ne banyààbanyà badyombola baa Mukalenge. S’mbipiciibwe ne mèmè mushaale mutooke ne mukezuke kumpala kwa Dîyi ne kwa Nzambi, ne kwimana pààpa ngamba ne: “Kakwena mashi a muntu nansha umwe pa cyanyi ciwalu to.” Ki bwa cinyi tudi twètù tushaala ku Branham Tabernacle. Ki bwa cinyi katwena beena Assemblées to. Ki bwa cinyi katwena ba-Unitaires to. Ki bwa cinyi katwena beena Yesu Nkaayende to. Ki bwa cinyi katwena

ba-Méthodistes to. Ki bwa cinyi katwena ba-Baptistes to. Anu kaatabernacle ka—kakese mwab'ewu. Katwenaku twêtù ne dingumba to nansha dya kânà. Tudi badishikamine, mu Kilisto. Ki bwa cinyi tudi bashaale mushindu utudi bashaale ewu. Ne Nzambi mutubeneshe, Nzambi mwikale utukwacisha.

¹⁹⁵ Mpindyewu, tudi mwa kunwambila bwa cinyi tutu tudya Meesa a Mukalenge, tudi tunwambila bwa cinyi tutu twenza dyoweshangana dya mâyi ku makàsà, bwa cinyi katùtu twitabila bidimba bwa kuàngata patudi bamanye ne badi mu mpekaatu. Ki bwa cinyi, mbingu yibidi anyi yisatu mishaale eyi, ndi muye kudi cidimba ne cidimba cyònsò, kwa bwena kunuwwa peenu ne tuumakokyanganyi twenu tukese tukese atu, nwênù aba. Nuya nwenda nutwa eku nutwa eku, muntu kayi muswe kwakwisha mukwende, nupitangana mu njila batume mpala mu cisuku. Bundu bwenu, nwênù badi banwe lupanza lubenesha lwa Nzambi dyamwamwa dya eci, dya cyoshelu eci, nudibiikila peenu munudi bânà beetu baa balume ne baa bakaji, ne pashiishe nwangata telefone kadi kwambangana mubavi muntu ùjaana mukwende. Kanwena bakumbanyine kubiikidiibwa ne nudi beena Kilisto to panudi mu mushindu awu. S'ncyà bushuwa. Disakaayi kule ne ma-telephones awu; pawikala kuyi mwa kwamba bwalu bwîmpè bwa muntu kampanda, kwakuluku nansha kwakula kwine to. Wavuluka ne, Nzambi neakwomekele bujitu abu. Padi anu nyuma wa mushindu awu usanganyiiibwa munda mwebe, s'udi anu mumanye ne kwèna mu mushindu mwîmpè ne Nzambi. Pawikala kuyi udyumvwa . . .

¹⁹⁶ Muntu yêyè mu ntuapakanyi, nda kudiye upungishangane nende. Panudi kanuyi mwa kupungishangana to, angata muntu kampanda akakufile. Kabyena bikemesha to padi Nzambi kayiku mwa kukazamuna Ekeleeziya Wende, mbwalu kanwena nubyenza mu mushindu mujaalame to. Pamutu paa kutwa cyanza paa telefone bwa kubanga kwakula bwa kampanda ewu, bwa bidi byenzeke, ne bwa tusumbusumbu tukese ne bikwabo, nwâtwà eku nwâtwà eku mushindu awu. Pamutu paa kwikala nwenza nanku, bwa cinyi kanwenaku nwenza cidi Bible wamba? Piikalà mwaneetu wa balume kampanda mupeteke mu cilema, nda kudiye aku umonebi ní kwèna mwa kupungishanganaku nende. “Ee, mpindyewu, yêyè's ngudi mungenzele mêmè!” Cidiye mwenze nansha ciikàle cinyi, nansha nanku ndaaku wêwè anu kudiye! Diyî kî ndyambe ne yêyè alwe kûdi wêwè to. Wêwè ngudi uya kudiye piikalabi ne yêyè ngudi mupiile. Udi wêwè wamba ne: “Ee, yêyè's nguvwa mu cilema. Yêyè's nguvwa ne cya kulwa kûndi.” Aci kî ncidi Bible mwambe to. Bible mmwambe ne wêwè ngudi ne cya kuya kudiye. Piikalabi ne yêyè ngudi mupiile, ndaaku wêwè kudiye aku.

¹⁹⁷ Nenku pashiishe yêyè kayi muswe kukuteeleja to, dîbà adi wangate muntu mukwabo akakufile, bu ntemu.

198 Nenku pashiishe yêyè kayi muswe kwangata ntemu awu ne mushinga to, dîbà adi amba ne: “Bwa mpindyewu nênkangàtè mpaasata webe.” Dîbà adi umwambile, ne: “Nyaaya kacymbila ekeleeziya, ne mu matuku makumi asatu kuumukila ku mpindyewu, nwênù bânà beetu kanuyi balongolole bwalu abu to. . . Mwaneeu wa balume ewu yêyè udi ne dijinga dya nwênù kupungishangana. Wêwè ngudi kuyi muswe kucyenza to. Nenku wêwè kuyi mulongolole bwalu abu mu matuku makumi asatu emu to, dîbà adi ciikalà mwa kwenzeka ncinganyi? Wêwè kwakwikalaku kabidi umwe wetu to.”

199 Bible mmwambe ne: “Yêyè kayi muswe kuteeleja ekeleeziya to, nanku ikale kûdî bu mumpangaanu ne mumpublikano.” Nudi numona’s, pacidi anu mwaneetu mwikale mwinshi mwa dikubiibwa dya ekeleeziya adi, Mashi a Kilisto adi anu amukuba. Ki bwa cinyi katwena tufikisha ekeleeziya ku diya kumpala mu mushindu udiye ne cya kuya to. Mpindyewu, cya bushuwa, *Eci* ki dilongesha dya ba-Bap- . . . dya ekeleeziya wa ba-Baptistes, anyi dya Branham Tabernacle ewu, panwikala mwa kucyenza. Nwamonu’s, bwa cinyi kanuyiku mwa . . .

200 Nudi nulwa mwaba ewu, nwamba, cileejiilu, bantu babidi, twânjibi kwamba ne mêmè ne Leo. Nenumfikishe mêmè. . . Nenku mêmè ngamba ne: “Ee, yêyè’s—yêyè’s ngudi mungenzele mêmè bibi.” Aci kacyna ne cidici cishintulula to. Mêmè ngudi ne cya kuya kudiye. Ee, yêyè’s ncidimba cya ekeleeziya ewu. Ûkaadi—ûkaadi mushaale mwena Kilisto. Ûtu u dya Meesa a Mukalenge mwaba ewu ku cibasa eku pamwe naanyi. Kabidi tutu babatiijiibwe mu Dinà dya Mukalenge Yesu. Tutu bende lwendu lululame, bu bânà baa muntu, ewu ne ewu, pashiishe cintu kampanda kulwa kwenzeka.

201 Kî mmuntu awu to. Misangu makumi citeema pa lukama dyabulu ngudi mubwele pankaci paa bantu abu. Kî mbantu abu to. Ndyabulu. Nenku panudi anu nulekela dyabulu wenza cyôci aci, nudi nwezela mwaneenu awu bibi. Ncya bushuwa.

202 Ee, kwôkù cintu kampanda cidici kaciya cyenda bîmpè pankaci paanyi mêmè ne Leo; enza bwa tuye tukacilongolole. Nenku wêwè mumone ne kudi cintu kampanda, mmudimu webe wêwè awu bwa kulwa kutudi, kwamba ne: “Nwênù balumyana lwâyi nusangile bônso babidi mwaba ewu. Netwikale mwa kulongolola bwalu ebu.” Mpindyewu, dîbà adi, yêyè mukafikile apu, ne ulwa kujandula, dîbà adi, ki bwalu mbwôbù abu’s. Ndi ngamba ne: “Ee, cyakumpala, patwikala twêtù—twêtù katuyi mwa kupetangana to, lwâyi ku ekeleeziya mushindu awu.”

203 Nenku panudi—panudi anu kanuyi ne cinudi nwenza pa bwalu abu to, nansha nanku, Mashi a Yesu Kilisto adi atukuba twêtù bônso babidi. Nwamonu anyi? Nenku dîbà adi kansere kaa kale aku—aku nekalele kansere kakwabo, ne aku kansere nekalele paaku kansere kakwabo, nenku

cintu cyònsò mu kaabujima neciikale cisaama, myaba yònsò, ekeleeziya mujima. Pashiishe nukafika mu mushindu wa nukaadi nubwela mu ekeleeziya nunku, biikàle anu bakwate mashika, bikengela bwa nwambile mulami wa ku ntempelu bwa kwanjiye kuzaaza mabwe a mashika awu, kumpala kwa beena mu disangisha kubwelabo. Mpindyewu, s'nudi bamanye ne aci ncyà bushuwa. Bakwate mashika! Muntu ùsòmba ku luseke aku, nudi bamanye's, kayi wambaku cintu nansha cimwe to. "Ee, kadi peetu twêtù aba pa ciibidilu's tuvva baa nyuma baa dikema." Ee, cyènzèkì ncinyi? Nuvva nunyeema bìmpè, mbwalu kaayi bwènzèkì abu? Nwamonu's, mpekaatu wenu awu ngudi unutupulula. Ne Nzambi neanwòmèkèlè bujitu abu, nwènù bàna beetu. Mpindyewu nèndongololè bwalu abu.

²⁰⁴ Kakwena cintu cibi kùndi mêmè to, kakwena cintu cibi kudi Leo to; dyabulu ngudi mubwele pankaci peetu. Ncyà bushuwa. Longololaayi bwalu abu. Ndaaku wèwè kudiye. Pashiishe yèyè kayi muswe kuteeleja to, anyi mêmè nciyi muswe kuteeleja, mushindu wònsò wikalabi awu, dîbà adi ambila ekeleeziya bwalu abu. Padiye kayi ulwa kupungishangana ne ekeleeziya awu munda mwa matuku makumi asatu to, dîbà adi yèyè udi umushiibwa mu dikubiibwa dya kudi Yesu. Tudi tumusuulula. Aci ncyà bushuwa menemene. Pashiishe tangilaayi numone cidi cyènzèkà. Dîbà adi nulekele Nzambi ènzè Yèyè dikazamuna adi. Nwâmanyi kuumushapu byenu byanza. Nwâmanyi kwenza mwenu peenu mwònsò mwa kwenza. Dîbà adi nulekele Nzambi ànji amwangate kakese; Yèyè ngwâmwelela dyabulu. Dîbà adi yèyè nealwe. Yèyè kayi mulwe to, mwoyi wende newikale anu wa citupa cîpi.

²⁰⁵ Nudi bavuluke mu Bible, mwaba uvwa mwaneetu wa balume uvwa kayi muswe kudilongolola kumpala kwa Nzambi awu anyi? Mbanganyi badi bavuluke bwalu abu? Ûvwa wenda masandi ne mamwèndè uvwa mukaji wa tatwèndè, kadi kabayi mwa kumufikishaku ku didilongolola to. Pòlò kwambaye ne: "Mwelelaayi dyabulu, bwa kabutu." Nudi nujandula ne, mu Kolinto Mwibîdi, yèyè's wakadilongolola.

²⁰⁶ Ndi ne mwaneetu, mulunda mwîmpè, ndi muswe kuteela dîna dyende mwab'ewu, mwaneetu muyiishi. Nenu mwaneetu muyiishi ewu, dîna dyende m'Mwaneetu Rasmussen. Bààbûngì baa kunudi nwènù bambi bàdi basòmbe mwaba ewu aba, diloolo edi, dîna dyende didi mu bibejibeji byenu. Mmuyiishi wa mu Chicago utu kayi usungulujangana bilondeshile mangumba to. Kadi tangilaayi. Ûvwa ne mwanende wa balume, mwambi, kadi kuyaye kasela mwànà wa bakaji wa cyena Katolike, ne kuditwaye mu njila awu mushindu awu. Nenu bavwa baya bakenza *bikampanda*, *bikansanga*, ne *bikankenga*, ne—ne bikwabo byònsò; kulwaye kupeta lutatu kampanda. Ki papa wende kuyaye kudiye, kwambaye ne: "Mpindyewu tangila, wèwè

mwanaanyi, kwênàku mwa kuswa bwa kuya kadipungisha anyi?”

Yèyè ne: “Papa . . .”

Kubiikilaye ekeleeziya wabo awu ne mmusumba wa bansantu babunguluki baa mu malaba, papa wende. Yèyè ne: “Mpindyewu, tangila, kwênàku mwa kuswa bwa kuya kalongolola cintu aci ne ekeleeziya ewu anyi?”

²⁰⁷ Yèyè ne: “Mpindyewu, papa, udi papa wanyi, kadi ncyèna muswe kubwelakana neebe to.” Eyo.

²⁰⁸ Ki kuyaye kangata umwe wa ku balami ne kupwekabo kwende aku. Yèyè ne—ne: “Wesley, ndiku ne dijinga dya kuyiikilangana neebe.” Yèyè ne: “Newikaleku mwa kuya kalongolola cintu eci ne ekeleeziya anyi?” Ki kumupaye kaadyandamuna kîpî kaa myaku yibidi mushindu awu. Yèyè ne: “Vuluka, Wesley, mêmè’s ki mpaasata wa ekeleeziya wawa. Ndi papa webe, kadi ndi muswe kwenza cidi Nzambi mwambe bwa kwenza. Nyawu nkupeesha matuku makumi asatu bwa wèwè kulongolola bwalu abu ne ekeleeziya wawa, cyanaana netukwipate mu Bwikadi bwa Nzambi. Wèwè udi mwanaanyi mulela; awu pende’s m’Musungidi wanyi.” Yèyè ne: “Ndi mukunange. Ne wèwè udi mumanye ne ntu mukunange, Wesley. Ndi mufwanyine kwitaba bwa kufwa mpindyewu mene bwa bwalu webe wèwè. Kadi bidi bikengela ulwe mukumbanangane ne Diyì dya Nzambi. Wamonu anyi?” Yèyè ne: “Mêmè ngudi mpaasata. Ndi mudiishi wa mikooko ya cisumbu aci. Wikale mwanaanyi mêmè, anyi wikale nî nganyi nî nganyi, bikengela ululame mu njila wa Diyì dya Nzambi. Wèwè kuyi mwenze nanku to, dîbà adi ncyèna mêmè mwakanyine kwikala mudiishi Wende wa mikooko to.”

²⁰⁹ Balumyana, ki mpaasata nyèyè awu. Ki muntu nyèyè awu. Kanwenaayiku peenu nwela meeji ne mmwômò anyi? Ki muntu nyèyè awu. Ki kwambilaye mwanende wa balume cyôci aci. “Cyakamutapa ku mwoyi,” mwakambaye. Kadi kwambaye ne: “Cinyi? Uwatapa ku mwoyi ki nganyi mwaba awu, ki muntu anyi, anyi kutapa Musungidi webe? Pa nanku,” mwakambaye, “dîbà adi ki twètù kutungunuka.” Ki yèyè ne: “Kaakaswa kucyenza to. Ki twètù . . . mêmè kwambila ekeleeziya.”

²¹⁰ Kwambaye ne: “Mwanaanyi mulela, Wesley, udi ubenga kunteeleja, mu bwalu ebu. Ûdi ubenga kuteeleja mulami. Ne wèwè’s udi ntemu wa bwalu ebu, Mwaneetu *Kampanda*?”

“Eyowa.”

“Mbîmpè. Pa dîbà mwandamukulu, dyalumingu didi kumpala edi, mbingu yinaayi kuumukila ku mpindyewu, yèyè kayi mulongolole bwalu abu ne ekeleeziya ewu to, Wesley, mwanaanyi awu, netumwelele dyabulu, bwa dibutuka dya

mubidi. Mashi Ende, Mashi a . . . a Yesu Kilisto, ne ekeleeziya ewu, kabyena bimukuba kabidi to.”

²¹¹ Ki diloolo adi kulwadi. Kwimanaye mu cyambilu, kwambaye ne: “Ûcidi ne tusunsa tubidi.” Dìbà kukumbanadi. Yèyè kwamba ne: “Mpindyewu, bu mudi mwanaanyi, Wesley Rasmussen . . . bìikalè byambiibwe kudi disangisha edi, kùdi Wèwè, Nzambi wa Bukole bwònsò: Twenji mwetu peetu mwònsò mwa kwenza, bilondeshile Mèyì Ebe ne mishindu ya dileeja dya njila ditu Mwan’Ebe—Webe, Musungidi wetu, mutushiile. Twètu mpindyewu, ndi ngeela mwanaanyi, ekeleeziya ewu pamwe naanyi, bwa dibutuk- . . . mmwelela dyabulu, bwa dibutuka dya mubidi wende, bwa musuuka wende wasungidiibwa.” Ki cyònsò cyàkambiibwà ncyòci aci. Bwalu nansha bumwe kabwakenzeka to, munda mwa lumingu anyi mbingu yibidi, pàmwàpa ngondo mujima anyi ngondo yibidi.

²¹² Bufuku kampanda, disaamà kadi kukwatadi mukwacikwetu Wesley. Nenku pàakabangàye kusaama, ki disaamà kwikaladi dyenda dikola’s. Kubiikidishaye ngangabuka. Ngangabuka kulwa e kumupimaye. Ûvwa ne mubidi kapywa wa degrés makumi anaayi ne citùpà. Kayiku mwa kupeta civwa cyenzejà aci to. Ki disaamà kutungunukadi anu ne kwenda kukola. Ngangabuka kwambaye ne: “Nsongaalume, ncyèna mumanye ne mbwalu kaayi budi bukuvwile ebu to.” Kupangaye cya dyenza’s. Kwambaye ne: “Netubiikidishè ngangabuka mupiluke.” Bòbò kubiikidisha ngangabuka mupiluke, ki ngangabuka mupiluke kubwelaye muntwamu. Kuyabo nende ku lupitaadi, kumwenzabo mateeta, ne bikwabo byònsò. Ki kwambaye ne: “Ncyèna anu ne mushindu wa kukwambila to. Nsongaalume ewu udi umweka anu—anu wa lufu.” Mukajende mwimane mwaba awu, udila mwadi, byònsò mushindu awu. Ne bânà biimane banyungulukile bulaalu ne byònsò mushindu awu. Yèyè ne: “Ùkaadi ufwa. Kwajiki.” Yèyè ne: “Dituuta dya mashi ne mweyelu wende, bidi anu byenda bipweka dìbà dyònsò.”

²¹³ Yèyè ne: “Biikilaayi papa.” Kaa, eyowa’s. Mushindu wa kubyenza’s ngwòwò awu. S’ki mudibi. “Biikilaayi papa.” Ki papa wende kupatukaye lubilu mwaba awu mutangile ku lupitaadi, lubilu lukole, bwa kuya kamumona. Yèyè ne: “Papa, ncyèna ne mushindu bwa mpindyewu to, kadi Nzambi ngudi umvwa mèyì aanyi. Nèndongololè byònsò. Nèmbilongololè. Eyowa, nèndongololè.” Eyowa’s, mukalenge, mwaneetu. Anu mwaba awu mweyelu wende kubangawu wenda ulongoloka.

²¹⁴ Nenku dyalumingu dyàkalondà, kwimanaye kumpala kwa ekeleeziya. Kwambaye ne: “Ndi mwenze mpekaatu kumpala kwa Nzambi, kumpala kwa ekeleeziya ewu. Mèmè kubenga kuteeleja mèyì a mpaasata. Mèmè—mèmè kubenga kuteelaja mulami ewu.” Ki yèyè ne: “Ndi ndomba ekeleeziya ewu bwa amfwileku luse bwa bubu bündi mwenze mushindu awu.” Yèyè ne: “Nzambi ngudi mulame mwoyi wanyi.” Ndi nnwambila, wàkalulama.

Eyowa's. Ki cyôci aci cidi cikèngelà nwênù kwenza, nwamonu's. Nwamonu anyi? Nwênù, bu nwênù nanshà mwa kubyenzaku mu mushindu wa Nzambi's! Nwamonu anyi?

²¹⁵ Mpindyewu, nwamonu's, mushindu utudi twètù twenza, tudi tubweja cisangilu cya kasumbu kaa balombodi, twamba ne: "Ee, mpindyewu, tûlamàayi. . ." Ncyêna ngamba tabernacle to, kadi ndi ngamba twètù beena Mishònyì. Tudi tubweja cisangilu cya kasumbu kaa balombodi, twamba ne: "Nudiku peenu nwela meeji bishi bwa Jones? Nudiku nwela meeji ne bivwa bikengela twètù kwenza nende cinyi? Mêmè ndi ncinka ne mmufwanyine kwikala cidimba cîmpè menemene mu ba-Méthodistes kutamba mwetu emu." Ki bwalu mbwòbù abu's. Abi, abi's mbibi. Ki bwa cinyi kabyena bikengela twètù kulonda bilele byabo abi to. Ne mwepiskopo kampanda, bikengela twètù kumubiikidisha, (ewu wa. . . nutu numubiikila ne nganyi apa's? munene wa distriki wa mu ekeleeziya wa Mpenta ewu? "mukulu wa distriki")—kumubiikidisha bwa kulwaye kumona ngiikadilu wa muntu awu.

²¹⁶ Twètù Bible ngudi utwambila cya dyenza. Ki bwa cinyi katwena tukutakanangana ne mangumba abo awu to. Tudi twètù tushaala badishikamine ku cintu aci. Amen. Kanwena numfiikila munda to, s'mmwômò's? Kanwenji nanku to. Eyo. Misangu mikwabo nêmpetè ndambu wa nkonko ya mîmpè menemene maalaba diloolo. Kadi, ee, ncyà bushuwa. Nwamonu anyi? Nwavulukaayi. Manyaayi ne. . .

²¹⁷ Ndi ngamba bwalu ebu mpindyewu. Nwênù badi mwaba ewu bafumine mu ekeleeziya mishiileshiilangane ya cyena mangumba aba, dingumba dyenu, ne, mwaneetu wanyi, ncyêna ngamba ne kwêna mwena Kilisto to. Ncyêna ngamba ne dingumba dyenu kadyenamumu ne binunu bya beena Kilisto baa balenga to. Cîndi mêmè nteeta kwamba mbwa cinyi twètù katwena dingumba. Mbwalu, mêmè ncyêna mufwanyineku kutwa cya nanku nyama ku mikolo to. To, mukalenge. Ncyà bushuwa ne ncyênàku mufwanyine kucitwa nyama ku mikolo to. Bôbò mbàdi bàteetà kukwambila cyûdi wêwè ne cya kwenza. Piikalabi ne Nzambi ngudi mumbiikile bwa kuyiisha Evanjeeliyo, nenku's ndi m'Muyiisha mu mushindu udi Nzambi ungambila bwa kuyiisha awu. Ki mudibi menemene, mushindu udici cifundiibwe mu Bible emu awu. Piikalabi ne cyôci aci kî ncikumbanangane ne Eci to, nanku cidi. . . Nzambi ngwândumbulwisha bwa bwalu abu. Kadi mêmè—mêmè—mêmè mumone ne mbwa wa diitu nyêyè wawa wenda ulwa, anyi ne mwena lukuna nyêyè wawa wenda ulwa, kadi mpanga kubadimwija, dîbà adi's Nzambi neasuminyinangane naanyi. Kadi mêmè munudimwije, apu's abu bwalu budi anu mbwenu. Nwamonu anyi?

²¹⁸ Vulukaayi ne: "Mu matuku a ndekeelu amu, bikondo bya njiwu mikole nebilwe, bantu nebiikale badinangi anu

baa bôbò biine, baditambishi, badibândishi, bapendi baa Nzambi.” Nwamonu’s, bapendi baa Nzambi: “Kaa, musumbà wa bitatakane wawa. Matuku a bishima akaadi mamane kupita. Cintu bu nanku kacituku to.” Awu’s mmuprofeta wa mashimi wa kale. “Mpindyewu, tudi bamanye ne bakaji beetu badi ne cyumvwilu cyàbúngì anu bu cya balume menemene.” Mémè ncyèna nkokangana pa aci to nansha kakese, kadi Bible wa Nzambi mmwambe ne numulame kule ne cyambilu. Aci’s—aci’s ncikose bwalu bwanyi mémè, nwamonu’s. Ncya bushuwa. Eyo. Nwamonu anyi?

Kadi batu bambe ne: “Ee, mpindyewu, mangumba etu, s’tudi ne bantu baa maalu mimpè bààbúngì anu munudi naabo mu tabernacle amu.” Ncyèna ngamba aci to nansha kakese, kadi Bible ngudi upiisha mangumba. S’ncya bushuwa. Nenku, pa nanku awu, ncyèna ngamba ne kanwena ne bidimba bya bimpè mu ekeleeziya wenu to. Aci ncilenga cya dikema. M bantu bimpè. Bamwe baa ku bantu badi batambe bwimpè, ntu nsambakeena naabo mu yònsò ayi, beena Katolike ne bikwabo byònsò. Mu yònsò ayi, ntu nsambakeena ne bidimba bimpè.

²¹⁹ Mpindyewu, mushindu utwatwala eci mpindyewu, balunda baanyi, bu Nzambi mwa kwanyisha, mu malonga abidi àdì àlondà aa, pàmwàpa... Nènnùleejè maalaba mu dinda ní byakengela bwa twêtù kutungunuka maalaba mu mapingaja anyi ní kabyakukengela nanku, nwamonu’s, bwa kucipatula. Citudi tuteetela kucyenza, ndi muswe kupweka naaci ne kucifikisha pa kaaba kampanda mpindyewu. Mpindyewu, pawikala muswe kulwa ne muntu kampanda, udi mwitabijiibwe bimpè menemene bwa kwenza nanku. Kadi wawuluka mpindyewu ne, kwikadi—kwikadi wàya mwikale uteeta anu bwa kupeta mwaba udi cilema to. Udi ulwa mwab’ewu... Bândi ngambila badi anu beena disangisha dyanyi—dyanyi, nudi numona’s. Ncitu ndongesha cyôci eci pambelu paa disangisha dyanyi edi to, bwalu awu mmudimu wa muntu wa cyanaana. Aci, yêyè ngudi mulami wa mikooko ya cisumbu aci. Nenku—nenku mémè ndi anu... [Katupa kaa mukaba wa mêyi munda mutupu—Muf.]

²²⁰ Alukila buludi ku Genese, neücyângàtè kakuyi lutatu to, ne neumone mwaba udici. Mpindyewu netwalukile ku Genese, bwa kujandula ne mbwa cinyi mwânà mulela mu masandi awu kavwa mwa kubwela mu disangisha dya Mukalenge munda mwa nkongo dikumi ne yinaayi. Mushindu udibi byangata... Bivwa bifwanyine kwangata bidimu nkama yinaayi bwa mpekaatu awu kuumukaye. Mushindu utwajandula mudi bu—bubi bwa baledi ne cya kunyookiibwa pa bânà ne bânà, mushindu uvwa cyôci aci cibangile mu Genese, ne bikwabo.

²²¹ Nenku nwènù...pashiishe nenumone, patwapingana too ne kwaka, muvwa Nzambi, kumpala kwa difuka dya dyulu ne buloba, kumpala mene kwa kapwishipwishì kamwe

kutaayikaku, kwaka naka kumpala mene kwa kwikalaku kapese kaa dibwe dya mudilu kaa bukênkè kufikaku ku diikalakù, Nzambi uvwa mumanye cifukiibwa ne cifukiibwa cyònsò ne bintu byònsò bivwa ne cya kwikala pa buloba abi. Kudiku muntu mwaba ewu. . . Kwèna mufwanyine kuumvwija mwaku ewu, ne kuwusunsulula, ne kwamba cidi mwaku “kayi mikalu” wumvwija to. Mbyenze anu bu kunyungulula cyamu cyebe cya fòtò uteeka mu—mu mushindu wa mèsù kacya anu àaya. Bidi anu, anu kubangila mwaba awu kuya, kwajiki. Nwamonu anyi? Kayi mikalu! Kadi twètù, ne meeji adi ne mikalu aa, katwenaku mwa kuumvwa cidi Meeji adi kâyi mikalu mwa kulongolola to. Nwamonu’s, twètù katwena mwa kwenzaku aci to. Wèwè, kwèna mwa kucyenza to. Nwamonu anyi? Kadi nwènù anu mwa kutangila, bashaale mu Nyuma, nudi mwa kucyumwila kule menemene aku. Nenku—nenku alukilaayi mwaba ewu mu Mifundu nenumone mpindyewu, nwamonu’s, kwaka kumpala kwa difuka dya dyulu ne buloba kuteekiibwabi.

²²² Mpindyewu, Bible mmwambe ne Yesu Kilisto uvwa Mwânà wa mukooko wa Nzambi. Mpindyewu teejeaayi ne ntema yònsò, bwa ne, piikalà bamwe baa kunudi kabayiku maalaba to, bwa kuumvwa mutudi tucijikija. Bible mmwambe ne Yesu Kilisto uvwa Mwânà wa mukooko wa Nzambi, mushipa kacya ku difuka dya dyulu ne buloba. Ncya bushuwa anyi? Wàkashipiibwa dîbà kaayi? Kacya ku difuka aku. Ki dyulu ne buloba abi, piikalabi byenza ne mishiki ya tupwishipwishi tusunsuluke, tutuuke ku dîbà didi muulu mwamwa naka dyadya, kumpala kwa kwikaladi cididi aci. Pa nanku, kumpala mene kwa kapwishipwishi kampana kaa kumpala kutuukaku ku dîbà, piikalabi ne eci civwa nkapese kaa dibwe dya mudilu katuuke ku dîbà, bifwanyine kwikala lukama lwa mbòmbò ne mbòmbò ne mbòmbò ya miliyaalà ya bidimu kale kumpala mene kwa kapese kaa dibwe dya mudilu kamwepele kaa bukênkè kwikalaku, Kilisto ukaavwa mushipiibwe. Padi meeji manene a Nzambi angata dipangadika pa cintu kampana, cikaadi ncintu cijikija. Paakamba Nzambi ne: “Kwikale,” s’nkumane kujika. Piikalabi ne byakakenzela bwa kupitaku miliyaalà lukama ya bidimu, bwalu mbumane kujika anu padiYe mucyambè apu. “Nenku paakashipiibwa Mwânà wa mukooko kumpala kwa difuka dya dyulu ne buloba,” Bible umwèumwè ewu, Nyuma umwèumwè awu ngwâkafûnda e kwamba ne: “Mênà etu akafundiibwa mu Mukanda wa Mwoyi wa Mwânà wa mukooko kumpala kwa difuka dya dyulu ne buloba.”

²²³ Pa nanku muntu wâkafûnda musambu wa ne: “Kudi Dîna Dipyadipya Difundiibwe Mu Butumbi” awu, nwènù nuvwa ne meeji mîmpè, kadi yèyè kavwa mu Mifundu to. Nwamonu anyi? Dîna adi dyakafundiibwa mu Butumbi pavwa dyulu ne buloba. . . kumpala mene kwa dyulu ne buloba kubangabi.

Pààkashiibwà Mwànà wa mukooko, mènà etu akafundiibwa mu Mukanda wa Mwoyi wa Mwànà wa mukooko.

224 Lekelaayi—lekelaayi nnupeleleku anu kaaMufundu kakese kamwepele cyanaana. Nudiku mwa kushaala kasunsa kamwe cyanaana anyi? Nkafume ku dimvwila mu meeji anu patudi twakulangana apa. Ngeela meeji ne ndi mwa kubuulula anu mwaba awu mene. Ncyèna mutwishiibwe to. Nenku mpindyewu numfwileku luse bwa dinulama mukùngùlù bulewu nunku ewu, kadi nkaavwa mumane anu kunwambila ne netwikale tukaadi mundankulu; katwena banji anu kumùfika menemene to. Kadi ndi—ndi muswe anu ku—kwangata eci nunku, anu Mufundu umwepele cyanaana ùdì ùtàngilà ciine aci.

Buululaayi pamwe naanyi mpindyewu mu Mukanda wa Loomo, nenku ndi muswe nubalè pamwe naanyi bwalu ebu. Mpindyewu, anji indilaayibi tumone, Loomo, ní ndi mwa kupapeta, anu lwà kaaba kiine aka. Mpindyewu twangataayi Loomo 8, nenku—nenku tubangilaayi ku mvensa wa 28 wa nshapita wa 8 wa Loomo. Nenku ndi muswe nucibale mu nyuma wa disambila pamwe naanyi mpindyewu. Teelejaayaaku anu mwaba ewu mpindyewu cidì Nzambi mwambe.

Nenku tudi bamanye ne maalu ónsò adi akwata mudimu pamwe bwa dyakalenga dya aba badi banange Nzambi, dya aba badi . . . babiikidiibwe bilondeshile kiiipacila kende.

Bwalu aba baakadyanjilaye kumanya, . . .

225 Aci cidì cinupa . . . Nudiku mwa kubala pamwe naanyi anyi? “Bwalu ewu . . .”

Bwalu aba baakadyanjilaye kumanya, yèyè wakadyanjila kabidi kubalongolola (eyo) bwa kwikalabo bakumbanangane ne cimfwanyi cya Mwanende, bwa yèyè ewu ikale mwanaabute munkaci mwa bânà baabo bààbûngì.

Kabidi aba baakadyanjilaye kulongolola, yèyè wakababiikila kabidi; ne aba baakabiikilaye, yèyè wakababingisha kabidi; ne aba baakababingishaye, yèyè wakabatumbisha kabidi.

226 Kacya anu ku difuka dya dyulu ne buloba! Pààkatàngilà Nzambi panshi . . . Mpindyewu, Nzambi kèna ulombola mudimu Wende, wàmba ne: “Ee, mpindyewu, Ndi muswe ku- . . . Kaa, netwikale mwa kwenza cinyi mpindyewu?” Nwamonu anyi? Kakwena kantu nansha kamwe . . .

227 Nwavulukaayi anu ne, bubi, mpekaatu, mbwakane bunyangakaja. Dyabulu kèna mwa kufùka to. Muntu ne muntu, nwènù bônso, nudi nuumvwa aci anyi? Aci ki Dilongesha dya ekeleeziya ewu. Dyabulu kèna mwa kufùka to. Yèyè udi mwa kunyangakaja cidì Nzambi mufùke. Mpindyewu, dinyangakaja

ncinyi? Mwaba ewu, nwênù bônso nudi numweka bu bantu bakole, pamwe ne bônso. Teelejaayaaku eci nunku. Twêtù tudi bantu bàkaadì baselangane. Nenku nwênù balume bàkaadì baselangane ne bakaji bàkaadì basediibwe nudi mwa kusòmba pamwe mudi mulume ne mukajende, ne bakaji biine abu badi anu mushindu umweumwe byenze bu ne bòbò kabatuku kacya... Badi virgo paucidi anu mushaale ne bayeebe apu. Bwa aci ncyà bushuwa. Mpindyewu, aci ncikumbanangane ne mikenji ne cyanyishiibwe bilondeshile mikenji, ne ncîmpè. Ncidi Nzambi mutume dîyì bwa kwenza nanku. Mukaji wa cyanaana udi mwa kwenza cyenzi cimwecimwe cya mukajeebe aci; umwe wa kudibo, wêwè udi mwakane ku mèsù kwa Nzambi; kadi cyenzi cimwecimwe aci ne mukaji wa cyanaana, wêwè udi mupiishiibwe kumpala kwa Nzambi, dipiila dya lufu. Cidi ncinyi ciine aci? Bwakane bunyangakaja, nwamonu's, bwakane bunyangakaja. Mpindyewu, dyabulu kèna mwa kufùka to, kadi yèyè udi unyangakaja cikaadì Nzambi mumane kufùka.

²²⁸ Mashimi ncinyi? Mbulelela bunyangakaja. Muntu kampana yèyè mwambe ne: “Kaa, tangilaayi, s'muvwa mmu diisambombo diloolo, pa dîbà citeema, eyo, divwa Bill Branham usanganyiibwa mu Jeffersonville,” mmwômò. “Mu cinwinu cya maala a kapyà cya mwa Antz mwamwa, mukwacike,” mashimi. Civwa ncinyi? Mvwa mu Jeffersonville. Aci mbulelela. Civwa mbwakane bunyangakaja buvwija mashimi. Nudi bumvwe cîndì muswe kwamba aci anyi? Nwamonu's, mashimi adi anyangakaja bulelela. Ncintu kampana cidi cyambe mwaba wúmvrà nsanganyiibwa. Mpindyewu, bu wikala mwambe ne: “Mu ekeleeziya, munkaci mwa kuyiisha,” mmwômò. Aci ki bwakane. Mmwambe bulelela. “Mu cinwinu cya maala, munkaci mwa kunwa maala,” mashimi. Mmunyangakaje; nudi numona's, bulelela bunyangakaja. Nudi bumvwe cîndì muswe kwamba aci anyi? Bubi bwônso ebu mbwakane bunyangakaja.

²²⁹ Lufu, ncinyi? Mwoyi, munyangakaja. Dîsaamà? Bukole bwa mubidi, bunyangakaja. Wêwè udi ne cya kwikala muntu mwîmpè, wa makanda. Eyo. Pawikala usaamasaama, ncinyi aci? Bukole bwebe bwa mubidi mbunyangakaja. Nwamonu anyi? Ki cyônso cidiku aci. Ncinyi ciine aci? Nuvwa kwônso eku bakaji batekete, balenga kwîsù; ne balume baa makanda, balenga kwîsù. Mpindyewu nukaadi nwele minyengu, nukulakaja. Ncinyi aci? Mwoyi, munyangakaja, nwamonu's, munkaci mwa kunyunguluka kadi kwalukila cyakabidi. Nwamonu anyi? Nenku bikengela bwa kwalukilawu. Dînà dya Mukalenge dibeneshiibwe! Nzambi utu mulaye bwa kuwaluja. Nenku anu mudibi cya bushuwa ne udi—ne udiku (tudi bamanye ne wôwò awu udi mwaba ewu), nenku anu mudibi cya bushuwa ne udiku, Nzambi neikale ne cya kuwaluja. Yèyè wakalaya ne wakadicipa bwa kuwaluja. Ki cidi ciwufila.

230 Mpindyewu, mmushindu kaayi, bivwa bikengela twikale bantu baa mushindu kaayi? Monaayi mpindyewu mudi bintu ebi byenzeka. Mpindyewu, aba baakadyanjilaYe kumanya, Yêyè wakababiikila; aba baakabiikilaYe, Yêyè wakababingisha. Dìbà kaayi? Kumpala kwa difuka dya dyulu ne buloba, kumpala mene kwa dyulu ne buloba kubangabi. Mpindyewu, bu twêtù mwa kwangata Mufundu ewu ne kuwùbingisha bulelela, tudi bafwanyine kwangatapu mèbà ne mèbà, kadi katwena—katwena baswe kwenza nanku to. Kadi bubu bwònsò bùdi panwapa ebu, mbwakane bunyangakaja buvwijiibwe bubu. Ki cyòcì aci cidi dyabulu wenza.

Mpindyewu, paudi ufika pa cipimu cya didyambwila bujitu, ne umanya cidi cibi ne cidi cîmpè, udi ne cya kwela nyima ku maalu mabi ebe awu. Bwalu, udi mulela mu mpekaatu, mufwimba mu bubu, mulwe pa buloba ebu mwikale wamba mashimi. Pashiishe mu bushuwa bwa bwalu udi—udi mulela ku dijinga dya disangila dya mulume ne mukaji, nenku dìbà adi udi ne cya kulediibwa cyakabidi, bwa wêwè kupeta Dilediibwa dipyadiya, bwa kubwela mu Dyulu. Bwalu, ewu mushindu wa dilediibwa dyûdi naadi panwapa edi . . .

231 Nudi numona mwaba udi Bantemu baa Yehowah bafwanyine kwikala baye kule mu ntupakanyi menemene mwaba awu, pa kwela meji ne Dilediibwa dipyadiya ndibiika dya ku lufu dya mubidi anyi? Nudi numona, kacyenaku mwa kwikala aci to. Nwamonu anyi? Cidi ne cya kwikala cintu kampanda . . .

232 Nwênù, nudi mu cipoolo cya dìbà. Nenku cintu cimwepele cidi cya Cyendelelele cidi anu cintu kampanda citu kacyi ne ntwadijilu anyi ne ndekeelu to. Cyònsò cidi cya Cyendelelele kacituku ne ntwadijilu, anyi kacadyakwikalaku ne ndekeelu to. Nwamonu anyi? Nenku wêwè mwikale citupa cya Nzambi, Nyuma udi munda mwebe awu katu mwanji kwikalaku ne ntwadijilu anyi kaadyakwikalaku ne ndekeelu to, nenku wêwè udi wa Cyendelelele pamwe ne Nyuma udi munda mwebe awu. Nwamonu anyi? Byenze mudi di—di—dinanga dya *Agapao*, pasiishe didi dipweka too dikashaala dinanga dya *phileo*, pasiishe dipweka dikafika too ne ku dinanga dya dyalakana. Didi ditungunuka anu ne kupweka ditungunuka anu ne kupweka, ditungunuka ne kupweka mu dinyanguka too ne mudidi dikashaala mushiki naka wa bukooya bumwepele. Ee, mushindu umwepele, Yesu wàkalwa panshi apa mutuulukile ku cibandilu cimwecimwe aci, bwa kajuululula ne kwalujulula ku mushindu wa mutambe kutumbuka, kuumusha ku mushindu wa mutambe kupwekela; kuumusha ku lufu kufikisha ku Mwoyi, kuumusha ku disaamà kufikisha ku bukole bwa mubidi, kuumusha ku bubu kufikisha ku bwakane. Nwamonu anyi? Yêyè wakuumuka ku Mutambe kutumbuka kulwa too ne ku mutambe kupwekela, bwa kwangataYe mutambe kupwekela kumufikisha ku Mutambe kutumbuka. Yêyè wakashaala mêmè bwa mêmè

mpete mushindu, ku ngàsà Wende, wa kushaala Yèyè, mupyanyi wa Nkwasa wa butumbi mu Butumbi. Nudi bumvwe cîndi muswe kwamba aci anyi? Bintu abi.

Mpindyewu tangilaayi. Kale wawa pavwa dyulu ne buloba ebu kabiyi byanji kubanga mu tupwishipwishi mwamwa, paakamona Nzambi civwa ne cya kwenzeka, anu piine apu Yèyè kukumona wèwè, Yèyè kummona mêmè, Yèyè kumona nkùpà yònsò, lujiji lwònsò, ludimba lwònsò, kajijijijiji kònsò. Cyònsò civwàku mwa kwikala pa buloba aci, Yèyè wakacimona anu piine apu. Cya bushuwa, Yèyè wakacimona.

²³³ Mpindyewu, Yèyè kaakamba ne: “Nêntumè Mwan’Anyi panshi bwa kuMulekela kufwaye, nenku pàmwàpa muntu kampanda neikaleku mwa kuMuumvwila luse. Ne neciikale bwalu bwa bukuate ne bya luse, pàmwàpa misangu mikwabo muntu kampanda mmufwanyineku kusungidiibwa” to.

²³⁴ Yèyè ukaavwa mudyanjile kumanya ne wasungidiibwa nganyi! Eyowa’s, mukalenge. Wàkamba ne: “Ndi mukine Esawu, ne munange Yakobo,” kumpala mene kwa yònsò wa kudibo kayi nansha mwanji kupeta mushindu wa kujaadika civwaye to, bwalu Yèyè uvwa mumanye civwabo. Yèyè uvwa mumanye. Yèyè mmumanye kantu ne kantu. Yèyè ukaavwa mumanye cyùvwà wèwè awu mwa kwenza, kumpala kwa kuyi mwanji kulediibwa, anyi kwa dyulu ne buloba kabiyi byanji kubanga.

²³⁵ Tangilaayi mpindyewu. Anu bu munudi bamanye, mêmè ewu ntu—ntu—ntu muntu wa bingoma. Ntu—ntu munange bingoma. Nenku mukaaji kampanda wa mu Texas mwamwa, ngeela meeji ne mmu Texas, mmuntwadile cingoma cya Swift, cya Swift cya mazaji nkama yibidi ne makumi abidi. Mvwa mucijingejeje be. Ndi muswe kucikenketa. Nkaacingoma kakese kaa bukole bupite. Nkaa mazaji makumi abidi ne abidi, dizaji dimwe diikàle ne tundimba makumi anaayi ne mwandamukulu. Nenku udi mwa kwelamu tundimba atu ne byanza. Kadi, cyapu ncyambe cyôcì ne: “Kwenji nanku to; mbya njiwu mibi be.” Kadi udi mwa kwela tundimba mu dizaji adi bwa kuyadi mu mètres cinunu ne nkama yitaanu ku kasunsukila kaa kasunsa, kadi mwikale anu kacya wacilama mwaba waci awu. Makàsà cinunu ne nkama yitaanu ku kasunsukila kaa kasunsa, aci’s kilomeeta mujima ne citùpà ku kasunsukila kaa kasunsa. Mu ngaakwilu mukwabo, kabemba kasòmbè, mu ntanta wa mètres lukama ne makumi mwandamukulu ne asatu. Wasa kabemba aku, umona masala apeepuka kumpala mene kwa cingoma kukukùkulacì. Nudi numona anyi? Ciine aci, kadi udi ucyangata, katupa kaa kabeetelele kaa kaci kaa kwela ku dînù aka, nenku ukabweja mu kapyà keebe kaa cingoma aku, ne upomgolola ndambu mukwabo bûngì ebu mwômò amu, anu bûngì bukumbane bûdì mufwanyine kulama ne kaci kaa kwela ku dînù; nenku wasa ngulube wa diitu lwà mundekeelu mwa citanda eci emu, yèyè kacya anu wàsòmba mukutangile. Mbwalu

kaayi abu? Dizaji didi disunsuluka, bwalu diyaaya lubilu lukole be, kadiy- . . . Nenuku udi mwa kwadija cilàmbà kuumukila apa too ne padiye apu, kadi kwakumonaku nansha kasùnsukilà kàmata pa cilàmbà apu to. Bidi anu byalukila; kî nku—ku butu, butu bwa volcan to, kadi bidi biya kule kupita apu. Bidi byalukila ku acides ya ntwadijilu yìdi yènza cyamu cya kabanda ne cya plomb bìdi munda amu abi. Bidi byalukila muvwabi kukaadi bidimu mìliyaalà lukama. Mpindyewu, kaadizaji kakese nkòkò aka, kaadizaji kaa tundimba makumi anaayi ne mwandamukulu kândi mukwate mu cyanza aka, kadi mu kasunsukila kaa kasunsa kadi kalonda aka kiikale kaalukila ku civwaku kukaadi bidimu mìliyô lukama. Nenuku bu dyulu ne buloba pàmwâpa mwa kushaalaku kabidi munda mwa bidimu bikwabo mìliyô lukama, nkafwanyine kwalukila cyakabidi ku dizaji, nkafwanyine kwalujiibwa cyakabidi, bwalu mbifwanyine kudiyenza buludi cyamu cya kabanda.

²³⁶ Mpindyewu tangila cyàkenzà Nzambi, nenuku dîbà adi neuMunange. Pashiishe newalukile kumbelu, nenuku mu dinda ulaala kalu mwikishe. Nenuku—nenuku ne—nenuku nenuMunange kupita bya kwònsò eku. Mpindyewu, Nzambi m’Mwenji wa makumi a bya diibaka naabi. Mbanganyi batu bamanye aci? Yèyè m’Mwibaki. Eyo. Teelejaayaaku ne ntema yònsò. Mpindyewu, Nzambi kale menemene wawa, anyi, mutubo bamba . . . Mpindyewu netwangate mmwenenu wa balondolodi baa bikondo pa bwalu abu. Nzambi, kukaadi bidimu mìliyaalà lukama, pakaavwaYe ujinga kwenza dyulu ne buloba, ee, Yèyè kubanga anu cyanaana. Mpindyewu, Yèyè uvwa . . . Uvwa ne mmwenenu kampaanda mu meeji Ende.

²³⁷ Mpindyewu wèwè newàmbè ne: “Kadi Yèyè munene mushindu awu, Mwaneetu Branham, mmunyi mwakiitabilaYe dyabulu bwa kwenzaye mpekaatu?” Ee, Yèyè’s uvwa mumanye, kumpala mene kwa dyabulu kufukiibwaye, ne yèyè awu ki wíkala dyabulu. Butumbi’s we! Kadi mpindyewu ngaavu kudyumvwa mutendeleedi be. Kaa, ekelekele! Yèyè’s uvwa mumanye, kumpala mene kwa dyabulu kufukiibwaye, ne yèyè awu ki wíkala dyabulu. Mpindyewu udi ukonka ne: “Kadi bwa aci udi wamba bishi?” Udi wamba ne: “Úvwa wànji kumulekela bwa kwikalaye dyabulu bwa cinyi?” Mbwa Yèyè kujaadikiibwa ne ùdi Nzambi. Kì bwa cinyi Wákacyènza. “Bwa cinyi kùvwakù bantu babi? Bwa cinyi?”

²³⁸ Ukàvwakù kumpala nganyi, m’Musungidi anyi nngènzàmpèkààtu? Ukààvwakù kumpala nganyi? Musungidi. Ukàvwakù kumpala nganyi, m’Mwondopi anyi mmubeedi? Byakaanyishiibwa bwa ngènzàmpèkààtu kwikalayeku bwa cinyi? Bwalu byambiibwa bya Yèyè awu bidi m’Musungidi. Bu ne kacya kakuvwaku kwanji kwikala ngènzàmpèkààtu to, Yèyè nunku kî mmumanyiibweku bu Musungidi to. Aleluuyah! Yèyè udi mwa kwenza ne maalu ònsò aye kwobeka ku butumbi

Bwende. “Mufwimbi udi mwa kwambila...Anyi, dibungu didiku mwa kwambila mufwimbi ne: ‘Wāngenji nunku’ anyi?” Udi pa lukata lwa difwimba naalu nganyi? Udi ne diima nganyi? Diima didi mu byanza bya nganyi? Pôlò wakamba ne: “Kaa, muntu mukutakane naanyi we, Yèyè kaakambaku ne Wakajuula Pâlò mu kiine kiipacila aka anyi?” Cya bushuwa’s. Yèyè’s uvwa mucimanye. Kumpala kwa kwikalaku dyulu ne buloba, Yèyè ukaavwa mumanye ne cikampanda neciikale cikansanga. Ki kulekelaYe bwa mpekaatu kwikalayeku, bwa Wamona mwa kwikala Musungidi. Wākalekela bwa dīsaamà kwikaladiku, bwa Wamona mwa kwikala Mwondopi. Wākalekela lukinu bwa lwikaleku, bwa Wamona mwa kwikala Dinanga. Cya bushuwa, ncyakenzaYe. Yèyè udi Nzambi, ne abi mbyambiibwa Byende. Nenku bikengela Yèyè kwikala ne cintu kampanda bwa kuleeja patooke byambiibwa Byende abi.

²³⁹ Mmunyi mûdì mufwanyineku kumanya ne bufuku budiku, mmunyi mûdì mufwanyineku kumanya ne budiku? Bu ne byônsò bivwa anu mundaamuunya pa mundaamuunya, mmunyi mûvwà mufwanyineku kumanya ne bufuku budiku? Kudi bufuku, mbwa bumone mwa kujaadika ne mundaamuunya mudiku. Cya bushuwa, bwôbù budiku. Amen. Nudi numona cyakenzaYe anyi?

²⁴⁰ Kadi pavwaYe kwaka, kumpala kwa difuka dya dyulu ne buloba, kumpala kwa kwangataYe dībà dya kale edi ne kudinyungulujaYe ne kudiseemejaYe pawipì ne mutooto wa kale utudi twètù basômbèlepu mpindyewu ewu, buloba ebu, nenku Yèyè wakabufwimba mwaba ewu ku dībà, ne Wakabuteeka bwikale bunyungulukila dībà. Twāmbè ne, ki dībà *edi*. KubufwimbaYe lwà ku *elu* luseke, ne kubulekela bulebelele mwaba awu munda mwa bidimu mīlyaalà lukama. CivwaYe wenza aci ncinyi? Ma-gaz kampanda. KunyungulukilaYe lwà ku *elu* luseke, kwenzaYe cikwabo cintu. CivwaYe munkaci mwa kwenza mwaba awu aci ncinyi? Ndambu wa binshidimba. KunyungulukilaYe lwà ku *elu* luseke, ne civwaYe munkaci mwa kwenza kwine eku aci ncinyi? Wenza ndambu wa kālisiyumù. CivwaYe munkaci mwa kwenza aci ncinyi? Úvwa utwenza wêwè ne mêmè. CivwaYe munkaci mwa kwenza aci ncinyi? Byenze bu mwenji wa makumi a bya diibaka naabi mwikale uteeka mabaya ende a ibidi-ku-inaayi ne ibidi-ku-mwandamukulu, ma-triplex ende, a dilamika mu nseke, mwikale mumanye anu ne nnzubu búngì kaayi yivwaye ne cya kwibaka. Nenku twètù mbatwènzè ne bintu dikumi ne bisambombo bya ku buloba, nenku Yèyè uvwa munkaci mwa ditwenza twètù bônsò, mwikale utwadija mwaba awu kumpala mene kwa dyulu ne buloba kufikabi ku diikalaku. Ne Yèyè. . . Buloba buvwa mwa kwikala buleepakanangane mwine musangu awu; ncyèna mumanye civwàbu to. CivwaYe wenzela ngólò, ne cyamu cya kabanda, ne cyamu cya kabanda cya kàlaabi, ne mâyi, ne bintu byônsò abi ncinyi? Yèyè m’Mwenji wa makumi a bya

dyasa naabi. Ùdi mwa... Mwibaki, Yèyè uvwa munkaci mwa kwadija bintu byònsò mwaba awu, kukosa ne kusonga bintu byònsò. PaakamanaYe kubyenza byònsò, civwa anu difukuka dinene dya volcan. Ki kulekelaYe ntutu ya kale ya volcan ayi bu yidi yilaadila mayi mwaba awu munda mwa bidimu miliyò lukama, bwa kwenza ndambu wa kàlisiyumù. Ncinyi ciine aci? S'ncitupa cyebe wèwè.

²⁴¹ Nenuku pashiishe, kumpala kwa kwikalaku kaamwoyi nansha kakese pa buloba ebu, mibidi yetu yivwa milaadika mwaba ewu. Aleluuyah! Kumpala kwa dimata nansha dimwe dya citaleela kufikadi pa buloba, twêtù tuvwa balaadika mwaba ewu. Pavwa Adama wenda tamakatamaka mu budimi bwa Edena apu, mèmè mvwa mulaadika mwaba ewu. Amen. Eyowa's, mukalenge. Kaa, butumbi's we! Pavwa Bakèlùbà, mitooto ya mu dinda yimba pamwe, ne pavwa bânà baa Nzambi beela mbila ya disanka apu, mèmè mvwa mulaadika mwaba ewu mwindile anu mpuuya wa mwoyi bwa kulwawu. Mvwa mwaba ewu. Yèyè ukaavwa mungenze mwaba ewu, mulekele mubidi wanyi mulaale mwaba ewu. Eyowa's, mukalenge. Bu kabiyi nanku to, mmufwanyine kwikala mufumine penyi? Huh? Mòwò mwine wakafika mwaba ewu bishi? Nzambi's ngukaavwa muwulaadike mwaba ewu. Nzambi's ngukaavwa muwènzè. Twâkenjiibwa ne bintu dikumi ne bisambombo: pituloolo, binshidimba, ne bukènkè bwa mu cibwashibwashi, ne bikwabo. Nwamonu's, tuvwa balaadika mwaba awu.

²⁴² Pashiishe cyàkenzekà ncinyi? Ki Nzambi kwambila Nyuma Mwîmpè, netwangate bwalu abu anu mu mushindu wa cimfwanyi cyanaana ne: "Mpindyewu patukaaku Wèwè, ndaaku Wèwè ukenze mananga ne buloba bwabwa. Bwalu, Mèmè ndi dinanga, ne Wèwè udi cintu cipatula ku Mèmè, pa nanku mpindyewu ndaaku Wèwè ukenze mananga ne buloba." Ki Nyuma Mwîmpè munene awu, mutudi tucinka's, kupatukaye mwaba awu; tudi twamba anu mu mushindu wa cimfwanyi mpindyewu. Kabivwa mushindu awu to. Mu bushuwa bwa bwalu, Nyuma Mwîmpè ne Nzambi badi ne kiipacila kamwe, kiipacila kamwe, Mupersona umwe. Numfwileku luse. Nenuku twâmbè anu ne Yèyè wakabaalula mapwapwa Ende e kuàbwikila mu nyungulukilu yònsò wa buloba, ki kubangaYe kulaadila. Adi dilaadila ndya bishi adi? Mushindu utu nzoolo wenza ne bânà bende awu, wenza cyoku cyoku, wenza mananga ne: "Cyokò, cyokò, cyokò." Kaa!

²⁴³ "Éyì mwoyi we, patuka!" muvwaYe wela mbila. Ùtàngila eku ne eku. "Ndi muswe bulenga bwikale pa buloba ebu. Wèwè bukènkè, patuka!" Nyuma Mwîmpè wenda wendakana's. Nenuku paakenzaYe nanku, ndi ntangila; civwà cìlwà, kudi kasulu kapweka kwinsi kwa kakuna muntu mwamwa naka, mwamwa naka mùùmukila kàlisiyumù kiikàle kapongoloka, kabwelakanangana ne binshidimba. Bidi munkaci mwa

kudivunga byenza cinyi? “Mwoyi, patuka!” Ki kaacilòngò kakese kaa Paasaka kupatulaku mutu kafumina mwinshi mwa lubwebwe kampana. “Lwâku apa, Taatù, anji tangilabi cyacya.”

²⁴⁴ “Cyacya cidi cimweka cîmpè. Wèwè tungunuka anu ne kulaadila.” KulaadilaYe e kupatulaYe bilòngò. KupatulaYe bukwamici bwònsò. KupatulaYe mwoyi wa bukwanyama. Nyuunyi kubanga kubuuka yipatukila mu lupwishi. Paanyima paa mutanci, ki muntu mulume kumwenekaye ne mukaji; muntu kumwenekaye, ne muntu uvwa byònsò bibidi mulume ne mukaji. Kadi, kî ncilùmaacikàjì to. Bivwa anu ne, anu mu yèyè amu, muvwa nyuma wa bukaji.

²⁴⁵ Wèwè mwangate mulume ukàadi muvwijiibwe cilùmaacikàjì cya menemene, udi mwa kwikala anu mu yèyè, bamwenze anu bîmpè ebi, kadi kwikale cintu cipampalamuke. Ne paudi wangata mukaji kampana, muswe kwikala kukosa nsuki yende cisuba ne kuvwala cinsalabeeta, ùpâtuka kwaka, wâmba ne: “Nzambi abeneshiibwe’s we, mêmè’s nênkwambilè!” Kudi cintu cipampalamuke. Mukaji utu ne nyuma wa bukaji, ne mulume udi ne bulume. Tutu bamanye aci. Ne nwènù nutu bamanye aci. Muntu mukaji utu ne mmwenekelu mwîmpè, padiye uteeta kwikala, kwenza maalu bu muntu mulume anyi?

²⁴⁶ Mona’s, mvwa musòmbè musangu kampana, pâmvwà mukubi wa nyama ya mwitu mwaba ewu, nenku mvwa musòmbè mu bis mwikale mbànda nya kuntwaku ntuuta mukaji awu mapi pa cibelu, ne cyanza cyanyi, mwikale nyiikilangana nende, kadi nciyi mumanye ne mmuntu mukaji to. Úvwa muvwale cimwe cya ku bifulu bya booshi baa sudir abi, ne binete bya binene bya dikuba naabi mèsù abi mushindu *ewu*, ne mêmè musòmbèlè lwà paanyima apu, yèyè ulonda bwalu kampana bwa cintu kampana civwa cyenzeke. Yèyè ne: “Udi mumanye’s,” ki yèyè awu ne, “makeelela diloolo awu’s,” mwikale anu ne mmwenekelu wa muumakane webe wa dikema, mwikale unwa mucu wa mfwanka. Yèyè ne: “Makeelela diloolo, nkwambila’s, mulumyana awu kusenunukaye, kuulu kwa cintu aci. Kwambaye ne: ‘Ekelekele!’ kukulukaye kuntwaku wenda usenunuka’s.” Yèyè ne: “Kadi mêmè kufwa mu tuseku mûntù nciyiku mwanji kuseka to kacya bandela.”

²⁴⁷ Ki mêmè paanyi mufwe mu tuseku, nudi bamanye’s, mushindu *ewu*. Mêmè ne: “Mulume naanyi, aci’s civwa cibula cya bushuwa, kî mmwômò anyi?” Basòmbè mwaba awu’s tuiikilangana mushindu awu. Kadi bu ne yèyè kavwaku muumushe cintu aci ne mukùpe mutu to, wa bwalu úvwa ne cikutu cya nsuki lwà kumutu aku, bileeja ne mmuntu mukaji. Ngákadyùmvwa mashaadile bikole mûmvwà nciyiku mwanji kudyumvwa to kacya bandela. Mêmè—mêmè ne: “Udi muntu mukaji?”

Yèyè ne: “Ee, kadi!”

248 Mémè ne: “Umfwileku luse.” Kacya ncivwaku mwanji kumona cya mushindu wawa to. Mpindyewu, aci, ncyà bushuwa.

249 Ngákamòna cibayabaya cifunda dîngà dituku, cyakamba kuntupisha ne disanka’s. Cívwa ne cintu cinene cifundapu, ne: “Bainábànzà bakaadi pa kuvwala bilàmbà.” Mundamunda mémè kwamba ne: “Nzambi atumbe’s bwa ciine aci.” Nwamonu anyi? Kadi, mémè kulwa kujandula ne, bivwa anu mbilàmbà bya mushindu kampanda bimana kwenza, nudi bamanye’s. Mvwa—mvwa mémè ndyambidila ne ncyà bushuwa ne bavwa mwa kuvwala bilàmbà. Ki mûngààkadyàmbidilà cya bushuwa. Cyàmba ne: “Bainábànzà bakaadi pa kuvwala bilàmbà.” Mémè ne: “Nzambi atumbe’s bwa bôbô abu. Ncintu cîmpè. Aci, ncyà bushuwa ne ndi nsakidila Nzambi bwa aci.” Kadi, monaayi’s, bivwa mbilàmbà bya mushindu kampanda bikaavwabo bôbô bamane kwenza, cintu kampanda. Cívwa ne cya kwikala cintu kampanda bwa kusekeshangana, mu ditunga edi, kî mmwômô anyi? Eyo.

250 Pashiishe paalu Adama kumweneka. Kadi Adama uvwa udyumvwa anu nkaayende, pa nanku Yèyè kupatula lubadi mu luseke lwende e kwenza Eva, cintu cyangata ku cikwabo cimwenzela yèyè. KwenzaYe. . . KupatulaYe nyuma wa bukaji mu Adama, ne kumwelaYe mu mukaji, nyuma wa dinanga, wa bukaji, wa musangeelu, wa kalolo. Ki kushiyaYe nyuma wa bulume mu Adama. Mpindyewu, piikalabi ne kudi cintu cya cishiilangane, kudi dinyangakaja mu mwaba kampanda. Mpindyewu, ne bubidi bwabo bavwa umwe.

251 Pa nanku twânjì twangataayi kaadinaya kakese kumpala kwa twêtù kujikija. Ulwâlwa ewu ki. . . Apa, ki Adama nyèyè ewu mukwate Eva ku diboko bapatuka benda bendakana. Mémè ntu munange muyiiki ewu be. Ki bapatuka apu, nudi bamanye. Ki Eva ne: “Kaa, munanga wanyi, muwâmbì ne wèwè ngudi mwenze?”

“Eyowa’s, mémè’s ngudi mwinyike mènà awu.”

“Kadi wawa udi umubiikila ne nganyi?”

“Wawa dyende nkabalu. Uh-huh.”

“Wawa ki nganyi?”

“Wawa nngombe. Uh-huh.”

“Wèwè ngudi mumwinyike nanku anyi?”

“Eyowa. Uh-huh.”

252 “Udi ubiikila wawa ne nganyi lwà kwaka naka, yibidi yidi misòmbè pààpa mitwangane mitu yaya?”

“Ayi nnyuunyi ya nkusu.”

253 “Aa, ngumvu. Ngumvu.” Ki bàtùngunuka mushindu awu. “Kadi ewu udi apa ewu ki nganyi?”

“Ndi mbiikila wawa ne, *cikampanda*, ne ewu ewu.”

254 Nenku: “Aa, ngumvu. Uh-huh. Mbilenga be.” Ki ntambwe kukungulaye. “Wawa udi umubiikila ne nganyi?”

“Wawa nntambwe.”

“Ewu ewu ki nganyi?”

“Cisumpantambwe.”

255 Nenku, kaa, byenze mùdì . . . “Aa, ngumvu.” Anu mùdì tumpusu twânà’s, nudi bamanye, eku ne eku tudila nyâwù nyâwù.

256 Ki, paanyima paa mutanci, mukaji ukenzakana. Yêyè ne: “Munanga wanyi, tangila kwaka, dîbà dikaadi dyamba kubwela. Dîbà dyākànyì dya kuya mu ekeleeziya.”

Nudi bamanye’s, kùtu anu cintu kampanda pàkaadi dîbà dyamba kubwela apu, udi umvwa dijinga dya kukuukwila. Pawikala kuyi uya mu ekeleeziya diloolo adi to, udi umvwa dijinga dya kubwela mu cibambalu kampanda, kubala Bible. Mbanganayi batu baswe kwenza nanku awu, bwa kuya paa nkaayeebe? Nwamonu anyi? Cidi anu munda mwa muntu bwa kwenza nanku awu. Bikengela wikale wenza nanku.

“Dîbà dya kuya mu ekeleeziya.”

257 Mpindyewu, kabaakambaku ne: “Mpindyewu, indila kakese mpindyewu, mpindyewu, Jones ngwa mu Assemblées, twêtù peetu nyawu tudi baa . . .” To, kacivwa cintu cya mushindu awu piine apu to, nenku baakaya anu kuya. Kabavwa ne ekeleeziya mwine to, ne nkwasa mwimpè wa kusòmba mushindu awu. Baakaya anu mwinshi mwa katedrale kanene menemene kaa mu diitu, e kutwabo binù.

258 Nenku Kafulu kaa bukênkè kaka kavwa kalembelele muulu amu mu cipuka amu. Nwamonu anyi? Ndi mwa kuumvwa Dìyì dipweka dyakula dyamba ne: “Bânà Baanyi bāsànkì pa buloba, leelu, udi Mukalenge Nzambi webe mukupeeshe ewu anyi?”

259 “Eyowa, Mukalenge, tudi basanke leelu ewu.” “Kî mmwòmò anyi, munanga wanyi?”

260 “Eyo. Eyo, munanga wanyi, tudi basanke.” “Mukalenge, ncyà bushuwa ne tudi tuKwanyisha. Mpindyewu nyewu nkaadi ndyolola bwa kulaala.” Nwamonu anyi? Ki mulume kwolola diboko dyende dinene adi, ne mukaji kulaadilapu, pa diboko dya mulume apu, ki mulume kulaadikaye panshi cisumpantambwe ne ntambwe, ne bintu byònsò bwa kulaalabi; mu ditalala dya dikema.

261 Ki Nzambi utuuluka ne ulwa baMushindikije mwaba awu, kaa, kudi musumbà wa Banjelo, Ngabùdyèlè, bifukiibwa Byende bya mu Dyulu abi. Ki bapweka babwela anu biteketebitekete menemene mu nzubu wa bulaalu biikàle bendela ku nsongo ya makàsà, nwamonu’s, benda bakenzakana. Ngabùdyèlè

kwambaye ne: “Vwila kuneeku, Taatù. Vwila kuneeku. Tangila apa. Nyèyè ewu. Mona, bâna Beebe mbòbò aba badyòlòle panshi balaale.”

²⁶² Mbanganyi mwaba ewu bàkaadiku baye ku luseke lwà bulaalu, bamwe baa ku nwènù baamaamù, wèwè pamwe ne papa, nwela mwànà wa balume mutekete awu dîsù, mwànà mutekete wa bakaji awu, nwanji nuvulwijanganaku ne: “Kî—kî mmukufwane anyi, ku mushindu *kampanda* ne mushindu *kansanga* wawa?” Nukaadiku benze ciine aci? Mona’s, misangu yàbùngì mêmè ntu anu nya ncyambila Meda, ncyamba bwa Joseph. Yèyè neàmbè ne: “Bill, yèyè’s udi ne mpala dipomà anu webe awu.”

²⁶³ “Eyo. Kadi, Meda, yèyè’s udi ne mèsù manene menze anu bu ebe awu.” Bwa cinyi? Yèyè udi citupa cya ku dyetu dis- . . . Ncipeta cya ku dyetu—disangila dyetu.

²⁶⁴ Mpindyewu, ki Taatù kwamba, udi mwa kwamba eci pa bwalu bwine ebu. Yèyè ne: “Udi mumanye’s. . .” Ki Ngabùdyèlè ne: “Udi mumanye’s, mmukufwane anu Wèwè menemene.” Ki mmwenekelu udi nende Nzambi; uditangilebi. Ki mmwenekelu udi nende Nzambi. Mmufwanangane nebe. Wèwè udi kànà Kende. Mbanganyi badi bamanye aci? Nwamonu anyi?

²⁶⁵ Mpindyewu tangilaayi. Mushindu wa mwoyi udi mutambe kupwekela utudi naawu ngwèpì? Ludimba. Mushindu wa mwoyi udi mutambe kutumbuka ngwèpì? Muntu. Cya bushuwa. Neku mushindu udi mutambe kutumbuka ngwèpì? Wakatungunuka anu kubangila ku wa mutambe kupwekela, wenda ubànda, kuumukila ku ludimba kuya ku *cikampanda* ne ku *cikansanga*, ne ku nyuunyi, too, ne bikwabo, mu mishindu ya mwoyi ya mitambe kutumbuka, ne mwalubi kufika ku mushindu wa mutambe kutumbuka uvwa mwa kulwa, ki pa dîbà adi kwenjiibwawu mu cimfwanyi cya Nzambi. Ki bwalu abu’s. Kadi mukaji yèyè kaakenjiibwa mu cimfwanyi cya Nzambi to, kadi mu cimfwanyi cya mulume. Nwamonu anyi?

Mpindyewu, mpindyewu, ki bòbò abu’s. Neku Nzambi ubatangila, wamba ne: “Eyo, mbamweke—mbamweke balenga.”

²⁶⁶ Civwa ncinyi, mwaneetu? Kabavwaku ne cya kufwa to. Aci civwa anu dyanza dya kumpala dya kâlisiyumù, dya kumpala dya binshidimba, ki bintu byònsò kubanga mushindu awu. Kî mbilenga anyi? Kadi mpekaatu kulwa kadi kunyangakaja dizola adi. Mpindyewu, Nzambi. . . Nzambi wakamwitabila bwa ènzè cinyi? Bwa cinyi Wakiita bwa mpekaatu kwikalaye mushindu utwäbyämbi katanci aka ewu? Yèyè wakamwitabila bwa Wamona mwa kujaadika ne Yèyè m’Musungidi. Yèyè ngwákacyènza. Wàkalekela dîsaamà dilwa, bwa Wamona mwa kujaadika ne Yèyè m’Mwondopi. Wàkalekela lufu lulwa, bwa kujaadika ne Yèyè ki Mwoyi. Nwamonu’s? Wàkalekela bintu

byònsò bya bibi ebi byenzeka, bwa kujaadika ne Yèyè mmwîmpè, civwaYe aci. Netu- . . .

²⁶⁷ Nwênù's badi bamba bwa dimba dya muyiiki wa bupikudi! Mona's, mwaneetu, paalwa Yesu, Ekeleeziya ewu—ewu neimane kwaka ku mibangubangu ya buloba ebu ne neĩmbè miyiiki ya bupikudi, piikala Banjelo biinyike mitu yabo, kabayi bamanye ne citudi twamba mene ncinyi to. Ee, bôbò kacya kabatuku bajimine to. Kí mbamanye maalu atudi bapicile to. Twètù ki badi bamanye ne kwikala mujimine ne kwikala mupetulula kudi kuumvwija cinyi. Kaa, s'tudi mwa kwela mbila mikole bwa butumbi Bwende's! Yèyè kî m'Musungidi bwabo bôbò to. Bôbò kabavwaku dijinga ne disungidiibwa to. Yèyè kavwa Mwondopi bwabo bôbò to. To. Butumbi's we! Yèyè kèna—Yèyè kèna Mwoyi bwabo bôbò to. Cya bushuwa. Bôbò kabavwaku bafwe mu mpekaatu ne mu matomboka to. Twètù mbavwa bafwe, kadi tukaadi bavwijiibwe ne mwoyi. Ki bwalu abu's. Citwàmbà ncinyi, ne bifulu byetu bya butumbi byumusha ne: "Kaa, wèwè ki Révérend *Kampanda*" anyi? To, to, to, to, to. Butumbi bwònsò kudiye Yèyè! Ki mudibi. Ki bwalu abu's. Dìbà adi ki ditwalondelangana muyiiki wa mutudi bacimune. Abidi adi panshi aa netùbyümvwè bîmpè menemene.

²⁶⁸ Dìbà adi, dìbà adi mu cyòcì aci kuntwaku, dìbà adi cyàkenzekà ncinyi? Nzambi wakamba anu cyanaana ne: "Ee, mbipiciibwe mwine anu ne Mémè munyangakaje binshidimba Byanyi ne kàlìsiyumù aka. Byònsò byamanyi kunyanguka" anyi? To, to. Yèyè's ukaavwa mumanye ne nebiikale mushindu awu.

Mpindyewu, mpindyewu, piikalabi ne Nyuma Mwîmpè mmungenze cîndì eci, mwikale ndya byakudya ne mbipingaja mu mubidi wanyi, ngenda ngwibaka too ne ku cîndì mpindyewu eci. Mpindyewu, kadi paabi, mêmè's mvwa mwenjiibwe mu mmwenekelu kampanda. Cimfwanyi cyònsò cyàkamònà Nzambi, kumpala kwa difuka dya dyulu ne buloba, ciikàle cibobe, cidì cishaala cimweneke cya balenga ne byanza. Nwamonu anyi? Ncipatukile mu mukaji, bu mwakambaYe ne necipatukile mu yèyè; musangu ùdì ùlondà, cidì cifumina kudi Nzambi. Cyakavwila musangu awu, ku mukaji; cidì civwila ewu musangu, ku Mulume. Nwamonu anyi? Cyakavwila musangu awu, ku dijinga dya disangila dya mulume ne mukaji; cidì cilwa ewu musangu ku Dìyì dyakula dya Nzambi. Nwamonu anyi?

²⁶⁹ Mwaba awu, mpindyewu, kudiku cidì mwa kungenzela bibi anyi? To, mukalenge. Kakwenaku cidì mwa kutwenzela bibi to. Pòlò wakamba ne: "Nansha mene bintu bidiku mpindyewu ebi, bintu bicilwalwà, màsaamà, lufu; kakwena cyatupandulula ne dinanga dya Nzambi didi mu Kilisto to." Kakwenaku cidì mwa kutupandulula to.

²⁷⁰ Anu múnkaadi mulondelonde kaabwalu kakese aka. Kukaadi kunshaadila nsuki mitwe ku yitaanu bwa mêmè

kutuuka dibàla, dya mutu bu diyi edi. Nenku mvwa munkaci mwa kwela cisaku ku twine tukese atu mwaba ewu kukaadi matuku, ki mukajaanyi ne: “Billy, wêwè’s ukaadi pa kutuuka dibàla.”

Mêmè ne: “Kadi ncyèna mujimije nansha lumwe lwa ku yôyi to.”

Yèyè ne: “Yidi penyi?”

²⁷¹ Mêmè ne: “Yivwa penyi kumpala kwa mêmè kuyipeta?” Nwamonu anyi? “S’yidi anu kuvwayi pâmvwà nciyi mwanji kuyipeta apu.”

Mpindyewu, kuvwa musangu kampanda, kukaadi bidimu lukama, nsuki eyi kayivwaku mene mwaba ewu to, kadi yivwa pambelu apa mu lupwishi. Ncyà bushuwa anyi? Pashiishe kukaadi bidimu bitwe ku makumi ataano, kubangayi kutoloka ku mutu kwanyi eku. Mmifumine penyi? Mu lupwishi’s. Nenku mpindyewu yikaadi munkaci mwa kwalukila kuvwayi aku. Ncyà bushuwa anyi? Kayivwaku to, pashiishe yôyi kwikalaku, nenku mpindyewu kayicyenaku to. Ncinyi aci? Cidi ciyènzè cidiyi eci ncinyi? Nzambi! S’ki Yèyè awu. Úvwa muzole dizola, e kwamba ne: “Mushindu awu ki wúndi Mêmè muswe bwa yèyè kwikala.”

²⁷² “Wêwè lufu, kalonda keebe kadi penyi? Lukita, bucimunyi bwebe budi penyi?” Nudi mwa kunjũika dimwe dya ku matuku adi panshi aa kubangila patudi apa. Ncyèna mumanye to. Kadi, mwaneetu, ncyakwikala mufwe to. Aci ndi nkwambila. To, mukalenge. Kaa!

Netubiike, (Aleluuyah!)

Netujuuke!

Mu dinda adi dya dibiika dya ku lufu,

Paakoseka milonda ya lufu,

Netubiike, (Aleluuyah!) netujuuke!

Kakwenaku cidi mwa kumpangisha bwa kujuuka to. Kakwena démons búngì bukumbane mu iferno mujima yidi mwa kumpangisha bwa kujuuka to. Kakwena cintu nansha cimwe mwaba nansha umwe cikumbane mwa kumpangisha bwa kujuuka to. Ndi ne mulayi wa Nzambi. Ndi ne Nyuma Mwîmpè. Ndi ne Zoe, Mwoyi wa Cyendelele wa Nzambi, musòmbèle munda emu. Cibidibidi cya kale eci cyakafuma kwaka, ki Nzambi kulaadila buloba bwa kumpatulamu. Kadi pìikalà Ewu wàkalàadila buloba bwa kumpatulamu awu. . .

²⁷³ Pângààkafikà bukole bukumbane, mpindyewu, musangu wònsò wúmvwà ngumvwa ngonga wa ku ekeleeziya, Cintu kampanda civwa cyakula naanyi, mucikàle kânà kakese menemene. Ne Mwanjelo wakaakwila mu cipuka, ne: “Kunuku maala anyi mfwanka to. Ndi ne mudimu wa wêwè kwenza. Kukooyishi mubidi webe, anyi kwikadi wenda ne bakaji anyi

bikwabo to. Wêwè, Ndi neebe ne mudimu wa wêwè kwenza pawakola.”

“Udi nganyi Wêwè’s? Udi nganyi Wêwè?”

²⁷⁴ “Aci neushiishe kutamba kucimanya matuku kumpala.” Paanyima paa matuku, ki Yêyè ulwàlwa ewu. Ûdi ulembelela muulu mwamwa dîbà dya dibatiiza. Ûdi udileeja Yêyè mwine. Ûdyàmba Yêyè mwine. Wàndamuna. Ntu m’Mumona mwimane kwaka, myaba yònsò, ku nseke yònsò.

²⁷⁵ Mmunyi muwenzà, piikalabi ne Yêyè ngudi mungenze cîndi eci, nciyi ne disungula nansha dimwe . . . ? Kî mêmè wâkayakù kuntwaku bwa kwamba ne: “Mpindyewu, Charlie Branham, nda ukasele Ella Harvey bwa nwênù kumpatula mu buloba” to. To, mukalenge. Nciwvaku ne disungula nansha dimwe dya ciine aci to. Nzambi ngudi mucyènzè.

Nenku piikalabi ne Yêyè ngudi mungenze cîndi eci, kakuyi disungula; nebitambe kwikala munyi, piikalà Nyuma Mwîmpè awu mubange kundaadila, mêmè ngamba ne: “Eyowa, Mukalenge, Wêwè ki Mufuki wanyi. Ndi muKunange, ne ndi nKwitaba bu Musungidi wanyi!” Neundaminyine mu lupwishi amu bishi? Kwêna mwa kucyenzaku to, mwaneetu. Kwêna mwa kucyenzaku to.

²⁷⁶ Nzambi kakenzaku katupa nansha kamwe kaa kâlisiyumù aku to, anyi kaa binshidimba, anyi nî nkaa cinyi cikwabo, kàvwàku mwa kwikala—kwikala kaa dijimija to. “Bònsò badi Taatù mumpe, kumpala kwa difuka dya dyulu ne buloba, nebalwe kûndi Mêmè.” Èyi! Ndi ndyumvwa anu mwa kwela mbila; s’ndi nzwambidilamu. “Bònsò badi Taatù mumpe nebalwe kûndi Mêmè, ne nansha umwe wa kudibo kaakujimina to, kadi Nèmmujuule cyakabidi ku dibiika dya ku lufu.” NgâkaMuumvwa ubiikila, pângàakalwà kudiYe. Mmunyi mudibo mwa kundama mu lupwishi lwa buloba’s? Kakwenaku bajiki baa bitalu bûngî bukumbane pa buloba ebu bwa kundandakajabo mumpala ne cikasu, bafwanyineku kundama mu lupwishi lwa buloba to. Dîngà dituku nênjuukè ne nêngiîmanè mufwanangane Nende, musukula mu Mashi Ende, mulèla ku Nyuma Wende! Aleluuyah! Angata mangumba ônsò audi muswe kwangata awu; mêmè nêngàngatè Yesu. Amen!

²⁷⁷ Mwena cyapu kampanda cya assurance kulwaye kûndi. Wilmer Snyder, mulunda wanyi mwîmpè. Yêyè ne: “Billy, ndi muswe bwa kukusumbisha kabeji kaa assurance [insurance mu Anglais—Muk.]”

²⁷⁸ Mêmè kwamba ne: “Mêmè’s nkaadi nende.” (Mukajaanyi kungoosha dîsù, byenze bu udi wamba ne: “Awu mafi aukaadi wamba ngaa cinyi, mulumyana?”)

Yêyè ne: “Wêwè udi ne assurance [insurance]?”

Mêmè ne: “Eyowa’s, mukalenge.”

Yèyè ne: “Ngwa cyapu kaayi nanku awu? Ngwa bishi awu?”

279 Mêmè kwamba ne: “Ditwishiibwa [assurance—Muk.] dibeneshiibwe, Yesu ngwanyi mêmè, kaa, nkaadyosha kaayi aka kaa butumbi bwa Nzambi’s we! Mupyanyi wa lupandu, lumpetela kudi Nzambi, mulela ku Nyuma Wende, musukula mu Mashi Ende.”

280 Yèyè ne: “Aci ncîmpè, Billy, kadi kacyakukubweja mu nkita to.”

281 Mêmè ne: “Necimpatulemu.” Aleluuyah! Ncyèna ndubakaja meeji bwa ne mmwa dibwela bishi to; cilumbu ncyà dipatukamu.

282 Nenku, mêmè nkaadi ne assurance [insurance] udi ungambila ne: “Mêmè ngwâjuula. Bônso badi Taatù muMpe m’Baanyi.” Cyàkenzà papa wanyi nansha ciikàle cinyi, nansha cyàkenzà maman, ní civwa cinyi. “Bônso badi Taatù ùMpà, nebalwe kùNdi, ne muntu nansha umwe kèna mwa kulwa to padi Taatù Wanyi kayi mumukoke.” Aleluuyah! CivwaYe ubakokela ncinyi? “Nkaavwa mudyanjile kubamanya kumpala kwa difuka dya dyulu ne buloba. Pângàakashipà Mwânà wa mukooko apu, ngâkamushipa pamwe Nende.” Amen. “Mêmè nkaavwa mudyanjile kulongolola Ekeleeziya.” Ncinyi cidi cipete didyanjila-kulongolodiibwa? Ekeleeziya. Wèwè udi ubwela mu Ekeleeziya munyi? “Ku Nyuma umwe tudi babatijiibwe bônso mu Mubidi umwe.” Yèyè ukaavwa mumanye, kumpala kwa difuka dya dyulu ne buloba ne, twêtù aba netwikaleku. “Nenku aba baakadyanjilaYe kumanya, Yèyè mmubabiikile. Aba badiYe mubiikile, m’Mubabingishe. Aba badiYe mubingishe, Ukaadi mumane kubatumbisha.”

283 Mu Mikanda ya Nzambi, Yèyè’s ukaadi mwambe ne Neapetangane naanyi kwòkù aku. Kakwena démons yònsò yidi mifume mu iferno yidiku mwa kubalama mwaba mukwabo nansha umwe anyi kubapangisha bwa kufikabo kwaka to, bwalu Nzambi ukaadi mumane kwamba nanku, nenku aci ncikose bwalu. Piikalàbi ne bidimu miliyaalà lukama kumpala kwa dyulu ne buloba kufukiibwabi, mitooto ya mu dinda yakimba pamwe ne bânà baa Nzambi bààkeela mbila ya disanka, kumpala kwa kwikalaku difuka dya dyulu ne buloba, nwamonu’s, kumpala kwa kwikalaku difukiib-...Nenku Banjelo abu ne bikwabo bavwa mu disanka, beela mbila bwa ciine aci, kumpala kwa kwikalaku difuka dya dyulu ne buloba, dyabulu neandameku mene mu lupwishi lwa buloba bishi’s? Kèna mwa kucyenzaku to. Nwènù nudi mu bulelela.

284 Tumonaayibi, mpindyewu. Edi ndyanyi díbà dya cyena mungalaata dîndi mubambakaje, mwaba ewu. Tukàadi tusunsa makumi abidi kumpala kwa díbà dikumi ne dimwe. Tùdi anu tusunsa makumi abidi kumpala kwa díbà dikumi. Mmwòmò

anyi, Mwaneetu Wood? Mmwômò, tusunsa makumi abidi kumpala kwa dîbà dikumi. Bantu bônso badi ne disanka anyi?

Kaa, ndi ndyumvwa anu bu udi utungunuka ne
lwendu,
Ndi ndyumvwa anu bu udi utungunuka ne
lwendu;
Nzubu wanyi wa mu Dyulu udi ubalakana ne
mwîmpè,
Ne ndi ndyumvwa anu bu udi utungunuka ne
lwendu.

Kaa, ndi ndyumvwa anu bu udi utungunuka ne
lwendu,
Ndi ndyumvwa anu bu udi utungunuka ne
lwendu;
Nzubu wanyi wa mu Dyulu udi ubalakana ne
mwîmpè,
Ne ndi ndyumvwa anu bu udi utungunuka ne
lwendu.

²⁸⁵ Nutu banange misambu ya kale ayi mushindu awu anyi? Kuvwa mukwabo wa kale utuvwa ne ciibidilu cya kwimba, cintu bu cya ne: “Ngàsà ne luse byakampeta. Ki Mutooto wa Dinda kukenkeshawu.” Ngwèpì mwine awu’s, Mwaneetu wa bakaji Gertie? Tumonebi. Mmunyi. . . Ngwèpì awu, Mwaneetu Neville? Nwamonu’s, cintu bu ne: “Ngàsà ne luse byakampeta. Ki Mutooto wa Dinda wa Ubalakana awu kuleejawu Yawu. . . ? . . . minnyungulukile.” Uh-huh. Eyo. “Mu nkuruse.” Tùpèèshèku cyona mwaba awu tûng, mwaneetu wa bakaji, ne: *Pabwîpì Nè Ku Nkùrusè*. Seemenenaku apa, Mwaneetu Neville. Kaa, mèmè ntu munange yôyi eyi. Mbanganyi batu banange misambu ya kale yitu misonzola ayi? Udi mwa kwangata yebe yônso yûdì muswe ya kutupika kuya muulu ya mijiki ya dizunzuja ayi. Umpè mèmè ewu wa ne: “Apa ki paakampetela ngàsà ne luse.” Ki wôwò awu. Eyo, biteketebitekete mpindyewu:

Yesu, undame pabwîpì ne ku nkuruse,
Mwaba awu mpokolo wa mushinga mukole,
Wa cyanaana bwa bônso, musulu wa
lwondapu,
Upweka ufumina ku mukuna wa Kalvariyo.
Mu nkuruse, mu nkuruse,
Mwikalè bwanyi butumbi kashidi;
Too ne paapeta musuuka wanyi mwambwibwe
Diikisha dyanwamwa dya musulu.

²⁸⁶ [Mwaneetu Branham wabangi kwimbila mu matama *Pabwîpì Nè Ku Nkùrusè*—Muf.] Kaa, bilenga kaayi’s we! Anji elaayibi meeji! Kadi ambaaayi tûng bu ne kakuvwa Musungidi? Anji ambaayi tûng bu ne katuvwaku ne diine Diyì edi? Anji amba tûng bu ne Yèyè kí mmukubiikile? Anji amba tûng bu

ne Yêyè kavwaku mudyanjile kukumanya, kadi wêwè mwikale usanganyibwa pambelu apa ne bakwabo baa pa buloba apa aba diloolo edi? Nudi baMunange anyi? Kaa, kelekeleelee! Kanupu mwoyi masangisha a mu dinda to, mpindyewu, pa dîbà citeema ne tusunsa makumi asatu.

Mu nkuruse, mu nkuruse,
Mwikalè bwanyi butumbi kashidi;
Too ne paapeta musuuka wanyi mwambwibwe
Diikisha dyanwamwa dya . . .

²⁸⁷ Mpindyewu tupeeshaaku cyona cya *Mwaba Ku Mpokolo*. Musambu mwîmpè wa kale ewu wa ne: “Kudi mwaba ku Mpokolo.” Mbanganyi badi bawumanye? “Mwaba, mwaba, eyo, kudi mwaba, mwaba ku Mpokolo.” Panudi nuwimba mpindyewu apu, mu cimùmà cyònsò olola anu cyanza, ku luseke lwebe aku, ulabule mwaneetu awu ku cyanza. Nudi bamanye’s, kudi mwaba mpindyewu bwa ba-Méthodistes bònsò. Kudi mwaba bwa ba-Baptistes. Kudi mwaba bwa beena Mpenta. Kudi mwaba bwetu bònsò mpindyewu, ku Mpokolo. Mbanganyi badi bamanye musambu wa kale ewu? Kaa, ncya bushuwa ne nudi bawumanye. Bamwe ba kunudi nwênù baa bikondo bya kale mpindyewu, ewu musambu, mmusambu mulenga wa kale wa beena Kentucky mpindyewu.

Mwaba, mwaba . . .

Labulanganaayi ku cyanza.

. . . eyowa, kudi mwaba,
Kudi mwaba ku Mpokolo bwebe wêwè;
Mwaba, mwaba, eyowa, kudi mwaba,
Kudi mwaba ku Mpokolo bwebe wêwè.

Kaa, mwaba, mwaba, kudi mwaba bûngì
cyanaana,
Kudi mwaba ku Mpokolo bwebe wêwè;
Kaa, mwaba, mwaba, eyowa, kudi mwaba,
Kudi mwaba ku Mpokolo bwebe wêwè.

²⁸⁸ Mpindyewu, ndi ne kantu kakese kaa dinupapula naaku. Mayiisha ònsò a matuku mashaale aa, ne mikanda, ne byònsò, nebabange kubisumbishila mundekeelu mwa luseke lukwabo lwa ekeleeziya mwamwa, mu lumingu lùlwalwà elu, mu masangisha; mikaba ya mêyì ne bikwabo, ne byònsò abi, mu mushindu wa mfundilu mulenga wa dikema. Nekwikale meesa paanyima pàâpa lwà mundekeelu mwamwa, mu cimwe cya ku bibambalu. Nenku bidì bifunda abi, mayiisha a matuku mashaale aa, ne yimwe ya ku mikanda mifunda yîtù mipatuke ku mbangilu ayi, mu mikanda mipyamipya, mfundilu mupyamupya, nebaadije byònsò abi, ne mu nde—ndekeelu wa citanda mwamwa, mu diloolo dya diisàtù dilwalwà edi.

Nenku tudi batekemene ci—cikondo cilenga mu Mukalenge. Nulwayi, mu nyuma wa disambila, mpindyewu. Mpindyewu, nubiiikile babeedi beenu ne bantu badi ne ntatu, nubafundile mikanda. Nubabweje munda emu. Netwikale anu. . . Nzambi neénzè anu maalu ne bukole. Ne tudi bamanye ne Yèyè neàcyènzè mpindyewu.

²⁸⁹ Nenku mpindyewu ndi muye kudi bantu bônso bâmvwà paanyi mumanye ne, bavwa ne kaacintu kampanda abu. Kwôkò kwikale cintu kampanda cidi kacyi mu njila mpindyewu, vulukaayi ne, ndi munwâmbile kukaadi ntanta mule ne, netucilongolole. Ne ndi mumanye ne nudi anu bamanye ne kukaadi mwaba ewu nyuma mushiilangane ne ewu uvwaku awu. Nwamonu anyi? Nwamonu anyi? Nwamonu anyi? Aci ncyà bushuwa. Bwa mpindyewu, kanumulekeledi uya kabidi to. Ndi nnwomekela bujitu abu kumpala kwa Yesu Kilisto ne, kanumulekeledi uya to. Shaalaayi anu nende mwaba ewu, nwamonu's, lamaayi bintu byônso byolola biikàle batungunuke nuya anu kumpala. Nudi bânà baa muntu. Kî mmwaneetu wa balume anyi wa bakaji udi wenza cintu kampanda cya cibi to; nyuma wa dyabulu awu ngudi ubwelamu. Nwamonu's, yèyè udi unyunguluka eku ne eku. Nenku ikala anu umvwila mwaneenu wa balume anyi wa bakaji awu luse, ne umanye ne n'Sataana udi munubwelele awu. Wèwè mwikale umvwa kaacintu kampanda pa bwalu abu, umushe kaacintu aku munda mwebe ne lukasa lwônso, nwamonu's, bwalu nekakudye bu kamunguji. Eyowa, nekakudye. Pa nanku, shaala kule ne kaacintu aku. Ikala anu muvuluke.

Kudi mwaba, mwaba, mwaba bûngì cyanaana,

Kudi mwaba bwa ba-Méthodistes, mwaba bwa ba-Baptistes, mwaba bwa ba-Presbytériens. Kudi mwaba bwa bônso.

Mwaba, mwaba, eyowa, kudi mwaba,
Kudi mwaba ku Mpokolo webe wèwè.

²⁹⁰ Nanku, mbanganyi badi bavuluke musambu wetu wa kale wa ditangalajangana naawu awu?

Angata Dîná dya Yesu wëndè naadi,
Wèwè mwânà wa kanyinganyinga ne dikenga;
Nedikupe disanka ne busambi,
Nda naaDi kwônso kúyaayà.

Ndi mufwanyine kujinga bwa washaalaku neetu, wèwè Mwaneetu Jeffreys, wèwè ne Mwaneetu wa bakaji Jeffreys, ne nsongaalume ayi, ne bôbô bônso.

Nenku pashiishe twinamina Dîná dya Yesu,
Tuona mikookwela ku makàsà Ende; (Kaa,
ekelekele!)
Mfumumu wa bamfumumu mu Dyulu netuMwase
cifulu cya butumbi,
Paaajika lwendu lwetu.

Angata Dîna dya Yesu wëndè naadi,
 Ûdyàngàtè bu Ngabu leelu ewu;
 Kaa, paasemena diteeciibwa,
 Nungana Dîna dya Cijila adi mu disambila.

Kaa, mêmè's ndi munange aci. Kadi nwênù? Dîna dilengele
 dya Yesu adi's we! Mpindyewu, tujuukilaayi kuulu mpindyewu
 mene, patudi munkaci mwa kwimba mpindyewu apa. Eyo.

Angata Dîna dya Yesu wëndè naadi,
 Wèwè mwàna wa kanyinganyinga ne dikenga;
 Nedikupe . . . (. . . ? . . .)

Kaa, dya bupole be!
 Ditekemena dya buloba ne disanka dya Dyulu;
 Dîna dya mushinga (Kaa, Dîna dya mushinga),
 Kaa, dya bupole be!
 Ditekemena dya buloba ne disanka dya Dyulu.

²⁹¹ Eci ncishiilangane ndambu mpindyewu. Twinyikaayi mitu
 yetu mpindyewu, nenku, ne ditalala dyònsò, twèlàayi cianza
 cimwepele muulu. Twàmbàayi ne:

Twinamina Dîna dya Yesu,
 Tupona mikookwela ku makàsà Ende,
 Mfumu wa bamfumu mu Dyulu netuMwase
 cifulu cya butumbi,
 Paajika lwendu lwetu.

Dîna dya mushinga, Eyi dya bupole be!
 Ditekemena dya buloba ne disanka dya Dyulu;
 Eyo, Dîna dya mushinga, Eyi dya bupole be!
 Ditekemena dya buloba ne disanka dya Dyulu.

²⁹² Biikàle anu batungunuke ne kwinyika mitu yetu, tudi
 twamba . . . [Mwaneetu Branham wabangi kwimbila mu matama
Angàtà Dîna Dya Yesu Wëndè Naadi—Muf.]



TWÊTÛ KATWÈNA DÌNGUMBA BWÀ CINYÌ? LUA58-0927

(Why Are We Not A Denomination?)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisambombo diloolo, matuku 27 a ngondo wa citeema, cidimu cya 1958, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2016 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org